

O Le Liahona


Mausali le i Ai o le Mana o le Perisitua i Aiga, i. 28

Nofoaga Autu mo le Autalavou
Matutua: O Se Nofoaga e
Faapotopoto Ai, Aoao, ma Fai
ai Faauga, i. 42

Pe Ua Lava Mea Ua Ou Iloa? i. 48

O Melania Sa Avea o se
Uo Moni, i. 60





© 2011 JAMES C. CHRISTENSEN, UA TAOFIA AIA TATAU UMA. LAISENEINA E IE GREENWICH WORKSHOP, INC.

Amiomama, saunia e James Christensen

“Ia tuu le amiomama e teuteuina ai ou mafaufauga e le aunoa; ona solo malosi ai lea o lou lototele i luma o le Atua; ma . . . o le a avea le Agaga Paia ma au soa e le aunoa” (MF&F 121:45–46).

Na saunoo Peresitene Thomas S. Monson e uiga i le amiomama, “O le a manaomia le tele o le lototoa pe a outou tumau i le nofo mama ma le amiomama, i le lotolotoi o mafaufauga ua taliaina i le taimi nei”

(“Ia Outou Maua le Lototoa,” Liahona, Me 2009, 125).




Liahona, Iuni 2012

SAVALI

- 4 Savali a le Au Peresitene Sili: Valaauina e le Atua ae Lagolagoina e Tagata**
Saunia e Peresitene Henry B. Eyring
- 7 Savali a Faiaoga Asiasi: Faiaoga Asiasi—o se Tofiga Paia**

I LE FAAVAA

Luma: Ata na tusia e Craig Dimond. Tua: Toefuataiga o le Perisitua Mekisateko, saunia e Walter Rane © IRI.



TALA FAAALIA

- 13 O Le Olioli i le Faamamaluina o le Aso Sapati**
Saunia e Elder Marcos A. Aidukaitis
Talu ai matou te le i misia lava le auai atu i le lotu ao matou tafafao, o lea sa tupu ai se mea matagofie.
- 20 Galue e Tusa ma Uunaiga**
O e iloa faatosinaga a le Agaga i lou olaga?
- 28 O Le Mamalu ma le Faatulagaga o le Perisitua**
Saunia e Peresitene Boyd K. Packer
O aooga ma le molimau a se Aposetolo i le perisitua paia.

MATAGALUEGA

- 8 O Mea Laiti ma Faatauavaa**
- 10 O Le Mea Ua Tatou Talitonu I Ai: O le Anapogi e Faamalo-sia ai i Tatou Faaleagaga ma Faaletino**

- 12 Auaunaga i le Ekalesia: O Le Gafatia o Auaunaga e Taitaiina e le Autalavou**
Saunia e Norman C. Hill
- 16 Tala Faamamai o le Talalelei: Faitalia ma Musumusuga**
Saunia e Elder Bruce R. McConkie
- 24 O Tatou Aiga, O Tatou Auaiga: Fefautuaai Faatasi i le Faaipoipoga**
Saunia e Randy Keyes
- 38 O Leo o le Au Paia o Aso e Gata Ai**
- 74 Tala Fou o le Ekalesia**
- 79 Manatu mo Afiafi Faaleaiga**
- 80 Seia Tatou Toe Feiloai: O Se Leo o le Faititili, o se Leo o le Filemu**
Saunia e Kristin Boyce



42

42 Faapotopoto i se Lotogatasi o le Faatuatua

Saunia e Stephanie J. Burns

O nofoaga autu mo le autalavou matutua ua avea ma nofoaga o potopotoga—e faamasani ai, e iloa ai le lotogatasi, ma aoao ma fefaasoai i le talalelei.



Vaai pe mafai ona e mauaina le Liahona o loo natia i le lomiga lenei. Faateite: O le sueina o le a avea ma se galuega faigata.

34 O Ou Tiute i le Perisitua Arona

Saunia e Paul VanDenBerghe

O a tiutetauave o tiakono, aoao, ma ositaulaga?

46 Fesili ma Tali

O isi taimi ou te lagona ai le lofi-tuina pe a ou mafaufau atu i mea uma e tatau ona ou faia e ola ai i le talalelei. O fea ou te amata ai?

48 Ua Lava Mea Ua E Iloa

Saunia e Elder Neil L. Andersen

Afai e te lagona e tapulaa lou malamalama faaleagaga, atonu e tele atu mea o loo e iloa nai lo mea ua e manatu i ai.

50 Malolo mo se Misiona

Saunia e Elyse Alexandria Holmes

I le 18 o ona tausaga, sa ofoina atu ai ia Viliamu Hupoate se konekarate e taalo lakapi ai faapolo-fesa. Sa i ai sa na filifiliga e fai.

53 Mai le Misiona: O Le Vavega o le Faamaloloina Faaleagaga

Saunia e Elizabeth Stitt

54 Pepa Lautele o I Ai se Savali: Tootuli Faamaulalo

55 O lea Mataupu ma lea Mataupu: Mataupu Faavae ma Feagaiga 135:3

56 O Fea O Le A Tau Atu I Ai A'u Filifiliga?

Saunia e Adam C. Olson

O ana filifiliga ua tuanai sa taitaieseina ai o ia. Ae o filifiliga fou na toe aumaia ai Karina.

58 O Se Faaitaiga Lelei Atu

Saunia e Shaneen Cloward

O se aafiaga tiga sa aoaoina ai au ia ou naunau atili e faalogo i o'u taitai o le Ekalesia.

56



63

60 O Se Uo Moni

Saunia e Sarah Chow

O uo moni e fesoasoani le tasi i le isi e tausi poloaiga.

62 O La Tatou Itulau

63 O Faamanuiaga o le Galue Malosi

Saunia e Elder Per G. Malm

O le faamaoni i galuega faaletino o se tasi lea o auuala e fai ai le mea sao.

64 Aumaia o le Peraimeri i le Fale: Ou Te Filifili le Mea Sa'o e ala i le Ola ai i Mataupu Faavae o le Talalelei

66 O Se Malaetaalo mo Carly

Saunia e Chad E. Phares

E lelei tele Carly i le fesoasoani atu i isi, ma sa tonu i nisi o ana uo e fesoasoani atu foi ia te ia.

68 O Le Lesona a le Au Liki Laiti

Saunia e Lindsay Stevens

Sa aoao e Linisei le tapuai i lona tuagane laitiiti.

70 Mo Tamaiti Laiti

81 Faatusa o Tagata o loo i Mau o le Tusi a Mamona

Suga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Paul B. Pieper

Fautua: Keith R. Edwards, Christoffel Golden Jr., Per G. Malm

Pule Faatonusili: David L. Frischknecht

Faatonusili e Faafuaina ma Faatonutonu:

Vincent A. Vaughn

Faatonu o Karafi: Allan R. Loyborg

Pule Faatonutonu: R. Val Johnson

Pule Faatonutonu Lagologo: Jenifer L. Greenwood, Adam C. Olson

Au Faatonu Fesoasoani: Susan Barrett, Ryan Carr

Aufaigaluega Faatonutonu: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekirk, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Pule Faatonusili o Faatufugaga: J. Scott Knudsen

Faatonusili Tusiata: Scott Van Kampen

Pule i le Gaosiga: Jane Ann Peters

Au Mamanu Sinia: C. Kimball Bott, Colleen Hinckley, Eric P. Johnsen, Scott M. Mooy

Aufaigaluega e Mamanuina ma Gaosia: Collette Nebeker Aune, Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonnesia, Italia, Iapani, Kiripati, Korea, Lativia, Lituania, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatename. (E eseese lava gagana.)

© 2012 Puletaofia e le Intellectual Reserve, Inc. Ua taofia aia tatau uma. Lomia i le lunaita Setete o Amerika.



E mafai ona kopi tala ma ata o le Liahona mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

June 2012 Vol. 36 No. 6. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Faapoopoga o loo maua i le Initoneti Liahona.lds.org



MO LE AUTALAVOU

Afai e te fiafia i le tusiga a Elder Neil L. Andersen o loo i le itulau e 48, e mafai ona e faafofoga i le lauga atoa i le **conference.lds.org**. Sue le konafesi aoao o Oketopa 2008.

MO TAMAITI

Faitau e uiga ia Carly (itulau e 66) ma matamata a o ia taalo i le malaetaalo fou i le **liahona.lds.org**.

AUTU I LENEI LOMIGA

E ta'u mai e numera le itulau muamua o le tusiga.

Agaga Paia, 16, 20, 80

Aiga, 68

Alofa, 66, 68

Anapogi, 10

Auauna atu, 12, 66

Aufono, 24

Autalavou, 12

Faaiipoipoga, 24

Faamanuiga, 70, 72

Faatuatua, 48, 70

Faauo, 60, 66

Faiaoga asiasi, 7

Faitalia, 16, 56

Galue, 69

Galuega faafaifeautalai, 40, 50, 53

Lagolagoina, 4

Lotogatasi, 42

Mea e faamuamua, 46, 50, 56

Molimau, 48

Musumusuga, 16, 20, 38, 39, 41

Perisitua, 28, 34, 70

Salamo, 56

Samita, Iosefa, 54, 55

Sapati, 13

Sefuluai, 64, 73

Taitai o le Ekalesia, 4, 28, 58

Tatalo, 54

Tusi a Mamona, 81

Upu o le Poto, 60

Usiusitai, 13, 56, 58, 60

I LAU GAGANA

O loo maua le Liahona ma isi tusi a le Ekalesia i le tele o gagana i le **languages.lds.org**.

**Saunia e Peresitene
Henry B. Eyring**

Fesoasoani Muamua i le Au
Peresitene Sili



Valaauina e le Atua

AE LAGOLAGOINA E TAGATA

I le avea ai ma tagata o le Ekalesia, e masani ona valaaulia i tatou e lagolago tagata i valaauga e galulue ai. I tausaga ua mavae, sa faailoa mai ai e se tagata aoga e 18 tausaga le matua le uiga o le lagolago o auauna a le Alii. O loo faamanuiaina pea a'u e ala i lana faataitaiga faatauva.

Sa faatoa amata lona tausaga muamua i le kolisi. E lei atoa se tausaga talu ona ia papatiso ae tuua lona aiga e amata ana aoaoga i se iunivesite tele. O iina sa avea ai ua ma ona epikopo.

A o amata le tausaga aoga, sa fai se ma faatalanoaga puupuu ma ia i le ofisa o le epikopo. E itiiti lava sina mea o ou manatuaina o lena talanoaga muamua, vagana ai sa ia faamatala e uiga i ona luitau i se nofoaga fou, ae o le a le galo ia te au le ma talanoaga lona lua.

Sa ia talosaga mai e fia vaai ia te au i lo'u ofisa. Sa ou te'i ina ua ia fai mai, "E mafai ona ta tatalo faatasi, ma e mafai ona ou faia le tatalo?" Sa ou tau fai atu i ai ua uma ona fai lau tatalo ma faamoemoe foi sa faapena o ia. Peitai, sa ou ioe atu i ai.

Sa amataina lana tatalo i se molimau na te iloa o le epikopo ua valaauina e le Atua. Sa ole atu i le Atua e ta'u mai ia te a'u le mea e tatau ona ia faia i se mataupu e tele sona taunuuga faaleagaga. Sa ta'u atu e le alii talavou i le Atua na te mautinoa ua uma ona iloa e le epikopo ona manaoga ma o le a tuuina atu fautuaga e manaomia ona ia faalogo i ai.

A o tautala o ia, sa oo mai i lo'u mafaufau ni tulaga lamatia faapitoo o le a feagai ma ia. Sa faatauva le fautuaga ae sa tuuina atu ma le manino lelei: tatalo e le aunoa, usitai i poloaiga, ma ia aua le matau.

O lena alii talavou, e tasi le tausaga i le Ekalesia, sa aoao e ala i faataitaiga mea e mafai ona fai e le Atua i se taitai a o lagolagoina o ia e le faatuatua ma tatalo a i latou e valaauina o ia e taitai. Sa faaaliga e lena alii talavou mo a'u le mana o le tulafono o le finagalo autasi i le Ekalesia (tagai i le MF&F 26:2). E ui ina valaau e le Alii ia Ana auauna e ala i faaaliga, ae seiloga e lagolagoina i latou e i latou ua valaauina i ai e tautuaina, ona faatoa mafai lea ona latou galulue.

O la tatou palota lagolago, tatou te faia ai ni folafolaga faamaoni. Tatou te folafola atu e tatalo mo auauna a le Alii ma o le a Ia taitai ma faamalositia i latou (tagai i le MF&F 93:51). Tatou te tautino atu o le a tatou vaavaai ma faamoemoe e lagona musumusuga mai le Atua i a latou fautuaga ma soo se taimi e faatino ai a latou valaauga (tagai i le MF&F 1:38).

O lena folafolaga o le a manaomia ona faafouina i o tatou loto e le aunoa. O le a taumafai lou faiaoga o le Aoga Sa e aoao atu i le Agaga, ae e pei foi ona e ono faia, atonu e fai e lou faiaoga ni measese i luma o le vasega. Peitai, o oe e mafai ona e filifili e faalogo ma vaavaai mo taimi e mafai ona e lagona ai le oo mai o musumusuga. O le aluga o taimi e itiiti ni measese o le a e mataua ae tele atu faamaoniga o loo lagolago e le Atua lena faiaoga.

A tatou sii se lima e lagolago se tagata, tatou te tautino e galulue mo po o le a lava le faamoemoega a le Alii e valaauina ai lena tagata e ausia. A o laiti le ma fanau, sa valaauina lo'u toalua e aoao tamaiti laiti o le matou uarota. Sa le gata ina sii lo'u lima e lagolago o ia, ae sa ou tatalo foi mo ia ma talosagaina le faatagaga e fesoasoani atu ai ia te ia. O lesona sa ou mauaina o le talisapaia o mea e fai e tamaitai



ma le alofa o le Alii i tamaiti o loo faamanuia ai pea lo'u aiga ma lo'u olaga.

Sa ma talanoa talu ai nei ma lena alii talavou sa lagolagoina lona epikopo i tausaga ua mavae. Sa ou iloaina ai sa lagolagoina o ia e le Alii ma tagata i lona valaauga o se faifeautalai, o se peresitene o le siteki, ma o se tamā. Fai mai o ia ina ua faaii le ma talanoga, “O loo o’u tatalo pea mo oe i aso uma.”

E mafai ona tatou filifili e tatalo i aso uma mo se tagata ua valaauina e le Atua e auauna ia i tatou. E mafai ona tatou faafetaia se tagata sa faamanuiaina i tatou e ala i lana auaunaga. E mafai ona tatou filifili e laa i luma pe a talosaga mai se tagata ua tatou lagolagoina mo ni volenitia.¹

O i latou o e lagolago i auauna a le Alii i Lona malo o le a lagolagoina e Lona mana e le mafaatusalia. Tatou te manaomia uma lava lena faamanuiaga. ■

FAAMATALAGA

1. Tagai i le *Aoaoga a Peresitene o le Ekalesia: Iosefa F. Samita* (1998), 217–18.

AOAO ATU MAI LENEI SAVALI

Auma ona faasoa atu le savali, mafaufau e faitau atu le upusii lenei: “O le a avea oe e le Alii e fai ma meafaigaluega i Ona aao pe afai e te lotomauualalo, faamaoni, ma filiga. . . . O le a e lagonaina se malosiaga faaopoopo pe a lagolagoina oe e le faapotopotoga ma faamanuiaina i le tofiga” (*O Le Aoaoga Atu, E Lei Se Isi Valaauga E Sili Atu* [1999], 20). Ia faataaliolio le aiga i se mea faitino mamafa ma fai atu i se tagata se toatasi e taumafai e sii i luga. Ia faaopoopo atu i ai se tagata se toatasi i le taimi, ma valaaulia isi tagata o le aiga e fesoasoani e sii i luga le mea faitino. Talanoa po o le a le mea e tupu pe a fesoasoani i ai tagata uma. Mafaufau e faamamafa atu le fautuaga a Peresitene Eyring e uiga i auala aoga e mafai ona tatou lagolago ai isi i o latou valaauga.

AUTALAVOU

Faafetai i Lo'u Faiaoga o le Aoga Sa


Taofia le igoa

O la'u vasega i le Aoga Sa e le o taimi uma e faa-aloalo ai. Ese lo'u fiafia e faalogologo i le lesona i vaiaso uma lava, ae o isi taimi e foliga ai e pei e le fia faalogo isi tagata o la'u vasega. E masani ona talanoa le tasi i le isi pe taaalo i taaloga faaeletonika a o taumafai le matou faiaoga e aoao i matou. O le mea e faanoanoa ai, o isi taimi e avea ai a'u ma se vaega o le faafitauli.

I se tasi vaiaso sa sili atu lo matou ulavavale nai lo le mea sa masani ai, ma na oo ane i le faaiuga o le vasega, na toetoe lava a tagi lo matou faiaoga, ona sa leai ma se isi na faalogo i lana lesona. A o matou savavali ese mai le potuaoga, sa ou lagona le faanoanoa mo ia.

O le Aso Sa na sosoo ai, sa faamatala mai ai e le matou faiaoga sa tele ina tatalo o ia i lena vaiaso, e saili mo le taitaiga, ma sa oo atu se manatu ia te ia e tatau ona ia faaalua se ata Lotu ia i matou. Sa ia amataina le ata, lea sa faatatau i le soifuaga o Iesu Keriso ma vavega sa la faia.

A o ou mafaufau i le ata i lena afiafi, sa ese se mea sa ou lagonaina. Sa faafuasei ona ou iloaina sa ou lagonaina le Agaga, sa sili atu nai lo se isi lava taimi ua tea. O le taimi lava lena sa ou filifili ai sa ou mana'o e fai ni suiga i lo'u olaga ina ia [ou] avea atili ai e pei o le Faaola, ma sa ou iloaina o le aafiaga i le Aoga Sa i lena aso, sa matuai faamalosa ai la'u molimau. Ou te faafetai lava i lo'u faiaoga o le Aoga Sa ma mea uma sa ia faia mo le matou vasega i vaiaso uma. ■



TAMAITI




O Le Lagolago o Lona Uiga o le Fesoasoani

Fai mai Peresitene Eyring, a sii o tatou lima e lagolago tagata, ua tatou folafola atu e fesoasoani ia i latou e fai le mea ua valaauina i latou e fai.

O le fea o tamaiti o loo i luga o loo lagolagoina se taitai po o se faiaoga?

- • • O nisi nei o tagata tatou te lagolagoina: perofeta, au epikopo po o le au peresitene o le paranesi, taitai misiona o le uarota po o le paranesi, faiaoga o le Peraimeri, taitai o le Peraimeri.
- Tusi i lalo pe talanoa ma ou matua i se mea e mafai ona e faia e lagolago ai nei tagata.





Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaoga fesili e fesoasoani ai ia te oe e faamalosa ai ou uso ma aveia ai le Aualofa ma se vaega ola o lou lava olaga.

Faiaoga Asiasi— o se Tofiga Paia

I le aveia ai ma faiaoga asiasi, ua i ai sa tatou misiona taua faaleagaga e faatau-nuu. “O le epikopo o le leoleo mamoe faauuina o le uarota, e le mafai ona ia vaavaaia uma ia mamoe a le Alii i le taimi e tasi. E faalagolago o ia i faiaoga asiasi musuia e fesoasoani ia te ia.”¹ O le sailia ma le mauaina o faaaliga i le po o ai e tatau ona tofia e vaavaaia ia uso taitasi e taua naua.

O musumusuga e amatalia a o talanoaina ma le agaga tatalo e sui o le au peresitene o le Aualofa ia manaoga o tagata taitoatasi ma aiga. Ona, faatasi ai ma le faamaoniga a le epikopo, e tuuina atu e le au peresitene o le Aualofa le tofiga i se auala e fesoasoani ai i uso ia malamalama o faiaoga asiasi o se tiute-tauave taua faaleagaga.²

O faiaoga asiasi e faamaoni lo latou iloa ma le alolofa i uso taitasi, fesoasoani ia te ia e faamalosa lona faatuatua, ma tuuina atu i ai le auunaga pe a manaomia. Latou te sailia le uunaiga faaletagata lava ia, ia iloa pe faapefea ona tali atu i manaoga faaleagaga ma le faaletino o uso taitasi latou te asia.³

“E aveia faiaoga asiasi ma se galuega a le Alii pe a tuu atu la tatou tulimataiga i tagata ae le o pasene. O le mea moni, e le uma lava faiaoga asiasi. E mafuli i se ala e ola ai nai lo se feau.”⁴



Mai Tususiga Paia

Mataia 22:36–40; Ioane 13:34–35;
Alema 37:6–7

FAAMATALAGA

1. Julie B. Beck, “O Le Aualofa: O Se Galuega Paia,” *Liahona*, Nov. 2009, 114.
2. Tagai i le *Tusitaulima 2: Taitaiina o le Ekalesia* (2010), 9.5; 9.5.2.
3. Tagai i le *Tusitaulima 2*, 9.5.1.
4. Julie B. Beck, *Liahona*, Nov. 2009, 114.
5. Eliza R. Snow, i le *O Afafine i Lo'u Malo: O Le Talaaga ma le Galuega a le Aualofa* (2011), 116.
6. Eliza R. Snow, i le *O Afafine i Lo'u Malo*, 50.

O Le a se Mea e Mafai ona Ou Faia?

1. E mafai faapefea ona ou alualu i luma i lo'u gafatia e faatauunu lo'u tiutetauave taua o le aveia ma se faiaoga asiasi?
2. I le aveia ai ma se faiaoga asiasi, e mafai faapefea ona ou fesoasoani i isi uso e faatau-nuu lo latou tiutetauave o ni faiaoga asiasi?

Faatuatua, Aiga,
Toomaga

Mai lo Tatou Talafaasolopito

Sa aoao mai e Eliza R. Snow, le peresitene aoao lona lua o le Aualofa, “Ou te manatu o le tofi o se faiaoga o se tofi e maualuga ma paia.” Sa ia fautuaina faiaoga asiasi “ina ia faatumulia i le Agaga o le Atua, o le poto, o le lotomaulalo, o le alofa” a o lei asiasi atu i aiga ina ia mafai ona latou iloa ma taulimaina manaoga faaleagaga faapea foi ma manaoga faaletino. Sa saunoa o ia, “Atonu e te lagona e tautala atu i upu o le filemu ma le mafanafana, ma afai e te maua se uso o maalili, ia e aveina o ia i lou loto e faapei ona e opoina o se tamaitiiti i lou fatafata ma faamafanafana [ia te ia].”⁵

A o tatou agai i luma i le faatuatua e pei ona sa faia e uso o le Aualofa i aso anamua, o le a tatou maua le Agaga Paia e faatasi ma i tatou ma ia musuia ia iloa ai auala e fesoasoani atu ai i uso taitoatasi tatou te asia. “Tuu atu ia i [tatou] e saili le poto ae le o le pule,” na saunoa ai Sister Snow, “ma o le a [tatou] maua ai lea o le mana uma [tatou] te maua ai le poto e faaogaina ai.”⁶

O Mea **Laiti** & **Faatauva**a

“O mea laiti ma faatauva e faataunuu ai mea tetele”
(Alema 37:6).

O Tulaga Mataina a le Aufaipese a le Tapeneko



E faitau miliona tagata i le lalolagi atoa e masani i musika a le Aufaipese a le Tapeneko, pe e ala i pesepesega a le aufaipese i le konafesi aoao, po o le polokalama faalevaiaso ua 83 tausaga le umi o le *Musika ma Afioga Tulei*. Ae peitai, o se tulaga faaleiloa tele ia faamatalaga auilili o aso taitasi e faatatau i lenei vaega o tagata pepese.

O le Aufaipese a le Tapeneko e 360 tagata pepese volenitia o i ai e i le va o le 25 i le 60 tausaga le matutua. I aluga o tausaga, ua 28 atunuu ua malaga i ai le aufaipese ma na faafiafia i setete e 37 faapea Uosigitone, D.C. E masani lava ona latou felelei faatasi o se vaega i se eria latou te faafiafia ai. Mai iina latou te o ai i ni pasi se 11, ma e mulimuli atu ai ni pasi se 4 o atopau ma taavaletoso e 4 o loo aveina atu ia mea e faaaoga e le



aufaipese. Ona latou malaga lea i ni aai eseese, o nisi taimi e 6 i le 10 itula le mamao.

A o femalagaa'i, e tofua tagata taitasi o le aufaipese ma le pine lanumoana e lolomi ai le faailoga a le aufaipese ma le igoa o le tagata. Ua uma ona vaetofia tagata uma o le aufaipese ma le faili e avea o ni “faifeautalai musika”; e fai ma sui o le Ekalesia i soo se mea latou te faimalaga i ai.

Pe a le malaga tagata o le aufaipese, e masani lava o le latou vaiaso e aofia ai, pe a ma le tasi le aso o le vaiaso e faataitai ai, faatasi ai ma le tuufaatasia o le *Musika ma le Afioga Tulei*, o se polokalama e faasalalauina faavaomalo i le televise ma le leitio i taeao o Aso Sa taitasi.

O tagata o le Ekalesia e taliaina i totonu o le aufaipese e taulimaina lava e pei o se valaauga. Pe a latou

O MEA MONI MALIE E UIGA I LE AUFAlPESE

- O laei o loo ofuina e tamaitai o le aufaipese ua mama-nuina ma suiina e se komiti e vaaia laei.
- Pe a ma le 20 ulugalii faaipopo i totonu o le aufaipese ma le Faili a le Lotoa o le Malumalu.
- Ua lua lipine musika palatinamo ae lima auro ua maua e le aufaipese.
- Na faafiafia le aufaipese i ni sauniga faatautoga o ni peresitene se toalima a le I.S.

auai i le aufaipese, e tau atu ia i latou e mafaufau i le taimi e tautino atu ai e tutusa lava e pei o auuna atu o se peresitene o le korama a toaina po o se peresitene o le Aualofa i se uarota. O le taimi lava e talia ai i latou i le aufaipese, e mafai ona latou nonofo ai pea e oo i le 20 tausaga, pe seia atoa le 60 o o latou tausaga.

FILIFILIINA O MUSIKA MO SAUNIGA A LE EKALEZIA

- la mautinoa ua faafesootai muamua atu le pulefaamalumu o le sauniga ao le i amataina, e aumai ai se faaamonia o musika ia ua filifilia.
- Faafesootai muamua atu le ta piano, ina ia iloa e ia pese e aoao ai mo le sauniga.
- Mo sauniga faamanatuga, mafaufau i le agaga o le a aumai e viiga taitasi. O viiga amata i le sauniga faamanatuga e faaalua ai le viiga ma le faafetai i le Atua ma mo le Toefuataiga o le talalelei. O viiga o le faamanatuga e tomanatu ai i le faamanatuga po o le taulaga a le Faola. O viiga faai e mafai ona musuia ai le aulotu e toe tautino atu i feagaiga na latou faafouina, ma e mafai ai ona molimau atu i mataupu faavae o le talalelei na aoaoina e tagata o le au paia.
- Mo sauniga a le Aualofa po o le perisitua, ia feutagai ma le faiaoga. Atonu e mafai ona ia fautua mai se pese e faatatau i le lesona. Afai e leai se pese e manao ai le faiaoga, e tatau i taitai ona fautua atu se viiga e fesoasoani i le autu o le lesona.

Tagai i Musika, 121-23; Tusitaulima 2: Taitaiina o le Ekalesia (2010), 14.4; 14.6.

Pe E Te Iloaina ia Tamaitai i Tusitusiga Paia?

Vaai pe mafai ona e faafetauia ia faamatalaga o tamaitai mai tusitusiga paia ma o latou igoa. Faaaoga mau e faatatau i ai pe a e manaomia le fesoasoani.



A. Maria,
tina o le Alii



E. Sarai



I. Ana



O. Eva



U. Apiso



F. Sara



G. Eseta



L. Maria,
uso o Mareta



M. Ema Samita



N. Ruta

1. Sa faamafanafanaina a'u e lo'u toalua ina ua ou faanoanoa i la'u fanau tama, o e na o i se malaga lamatia (tagai i le 1 Nifae 5:1, 6).
2. Sa avea a'u ma se auauna i le fale o le Tupu o Lamona ma sa tele tausaga na ou liliu atu ai i le Alii, a o le'i liliu mai le tupu (tagai i le Alema 19:16).
3. Ina ua maliu lo'u toalua, sa ou "pipii atu" i le tina o lo'u toalua ma fai atu ia te ia e fai lona nuu mo'u nuu o lona Atua mo'u Atua (tagai i le Ruta 1:14, 16).
4. O loo ta'ua lou igoa i le Feagaiga Fou faapea ma le Tusi a Mamona. Ua faamatalaina au o se "sa matua silisili ona lalelei ma paepae" ma "o se ipu pele ma filifilia" (tagai i le 1 Nifae 11:13; Alema 7:10).
5. Sa ou "[filifilia] lea mea lelei" e ala i le faalogo i fetalaiga a Iesu Keriso ina ua Ia asiasi mai i lo'u aiga i Petania (tagai i le Luka 10:42).
6. Sa anapopogi lou nuu mo au ina ua lamatia lou lava ola e ala i le aioi atu i le tupu e faasaoina i latou (tagai i le Eseta 4:16).
7. O le uiga o lo'u igoa o le "tina o tagata ola uma" (tagai i le Kenese 3:20).
8. Sa taua au "o se tamaitai filifilia" i le Mataupu Faavae ma Feagaiga, ma sa ou faia "se filifliga o viiga paia" (tagai i le MF&F 25:3, 11).
9. Sa avea au ma se tina ua oti lana tane pe a ma le 84 tausaga, ae ou feiloai loa i le pepe o Iesu i le malumalu (tagai i le Luka 2:36-38).
10. Ina ua suia e le Alii le igoa o la'u tane, na Ia suia foi lou igoa ia faauigaina "purinise" (tagai i le Kenese 17:15).

Talii: 1. E; 2. U; 3. N; 4. A; 5. L; 6. G; 7. O; 8. M; 9. I; 10. F

O Le Anapogi

E FAAMALOSIA AI I
TATOU FAALEAGAGA
MA FAALETINO

Ua avea le anapogi ma se vaega o le talalelei a Iesu Keriso talu mai taimi o le Feagaiga Tuai (tagai, mo se faataitaiga i le, Tanielu 9:3; Ioelu 2:12). O le anapogi e faamalosia ai faaleagaga ia tagata ma faateleina ai le tauaogaina o a latou tatalo (tagai i le Isaia 58:6–11). O aso nei, e anapopogi tagata O Le Ekalesia a Iesu Keriso o le Au Paia o Aso e Gata Ai ma tuuina atu tupe na semanu latou te faaluina i meaai i le Ekalesia e fesoasoani ai i e matitiva ma le tagolima.

“Ua atofaina e le Ekalesia le Aso Sa e tasi i masina taitasi, e masani lava o le Aso Sa muamua, o se aso o le Anapogi. O le faamamaluina o lenei Aso Sa anapogi e aofia ai le le ‘ai ma le le inu mo ni taumafataga sosoo se lua [o se periota e 24-itula], auai i le sauniga anapogi ma molimau, ma le tuuina atu o se taulaga anapogi e fesoasoani ai i le tausiga o e o loo manaomia le fesoasoani.

“O lau taulaga anapogi e tatau ona le itiiti ifo ma le tau o aiga e lua e te le'i taumafaina. Afai e mafai, ia e limafoai ma tuuina atu ia sili atu nai lo lenei tau.

“E le gata i le faamamaluina o aso anapogi ua faatulagaina e taitai o le Ekalesia, ae e mafai foi ona e anapogi i soo se aso lava, e tusa ma ou manaoga ma manaoga o isi. Ae peitai, e le tatau ona e anapogi faalausosoo pe [anapogi] foi mo ni vaitaimi uumi.”¹ O

e o i ai se tulaga faalesoifua maloloina e faateleina le faaletonu pe a anapogi e tatau ona faaoga tatau le atamai e fetuutuunai ai lo latou ala.

E anapopogi tagata o le Ekalesia mo faamoemoega eseese. Mo se faataitaiga, e mafai ona tatau anapogi ma tatalo mo se tagata o le aiga o ma'i. E mafai ona tatau anapogi e faailoa atu le agaga faafetai i le Atua, e atiina ae se lotomaulalo faateleina, e foia se vaivaiga po o se agasala,

ia maua musumusuga mo o tatau tiutetauave faale-Ekalesia, ma isi lava mea. O le anapogi e fesoasoani tatau te lagona ai le agaalofa ia i latou o e aafia soo i le fiaaai. O le anapogi foi e fesoasoani i o tatau agaga e manumalo i le tino. ■

FAAMATALAGA

1. *Faamaoni i le Faatuatua* (2004), 21.

Mo nisi faamatalaga e uiga i lenei autu, tagai i le Mataio 6:16–18; Alema 5:46; 6:6.



ATA NA SAUNIA E TALAI MEHMOOD, JOHN LUKE, MA WEIDEN C. ANDERSEN; FAAMATALAGA MAI LE MO SE FAIMI FAAPENE, SAUNIA E ELSPETH YOUNG


O le Aso Sa anapogi e aofia ai le tuuina atu o molimau i le sauniga faamanatuga.



O le anapogi o lona uiga o le volenitia e le ai pe inu mo le faamoemoega o le faalatalata atili atu i le Alii ma talosaga atu mo Ana faamanuiaga.



Ua uunaia i tatou ia limafoai i a tatou taulaga anapogi: e faaaoaga e le Ekalesia le tupe e fesoasoani ai i e matitiva ma le tagolima.



E sili atu le tauaogaina o le anapogi pe a o faatasi ma le tatalo.



O le anapogi e masani ona faatinoaina e tagata talitonu faamaoni. Mo se faataitaiga, o tagata lutaia anamua, sa anapopogi mo Eseta ina ia mafai ona ia talosaga atu i le tupu mo le puipuiga o lona nuu (tagai i le Eseta 4:16).

“[O le anapogi] e faigofie ma atoatoa, e faavae i luga o mafuaaga ma le poto, ma e le gata ua faamaonia ai o se fofo i le fesili o le tausia o e matitiva, ae o le a tauia lelei ai i latou ua tausia le tulafono. O le a . . . tuuina atu ai le tino i le agaga, ma siitia ai le fesootaiga ma le Agaga Paia, ma mautinoa ai le malosi faaleagaga ma le mana o loo manaomia tele e tagata o le atunuu. Ona o le anapogi e tatau ona o faatasi ma le tatalo, o lenei tulafono o le a aumai ai tagata e faalatalata atu i le Atua.”

Peresitene Iosefa F. Samita (1838–1918), Aoaoga a Peresitene o le Ekalesia: Iosefa F. Samita (1998), 203.

O LE GAFATIA O AUAUNAGA E TAITAIINA E LE AUTALAVOU

Saunia e Norman C. Hill

Efiafia tagata Nigeria e fai mai o i latou e nonofo i lalo “o se la sau a Aferika.” O le vevela i talane o le ekueta e na o se tamai eseesega lava e tusa lava pe o le a le vai tau. O lea la, ina ua fai le matou galuega faatino i Aferika atoa ia Aokuso, sa amataina i le 7 i le taeao ina ia mafai ona tele se mea e mafai ona fai i taimi mālū o le taeao.


Faatasi ai ma suo, lako, ma sapelu, sa matou galulue ai e faamama le vao ma la’u le lapisi mai fanua tuufua e lata i le falelotu o le matou Uarota o Yaba i le Siteki o Lagos Nigeria. Ina ua mavae ni itula se tolu o le galuega, na matou faamamaina le tusa ma le tolu eka (1.2 ha) o le fanua e fa eka (1.6 ha).

“O le a se tou manatu ae faauma loa si vaega laitiiti lenei ae toe fuafua se isi aso e faauma ai le faamamaina o le fanua?” o le fesili lea a le epikopo.

O le lagona mai o le epikopo e Emanuelu, le peresitene o le korama a le au aoao, sa faaali mai ai lona faagaulemalie.

“Afai ae tatou tuua le vaega lenei e le faia, o le a leai se tasi o le autalavou e lagona e tele se mea na latou faia i le aso,” o lana tala lea. “Se faamolemole, sei tatou faaumaina.”

Talu ai o vao sa pe a ma le ono futu (1.8 m) le maualuluga i le tele o vaega [o le fanua], sa latou punitia ai la matou vaaiga ma faafaigata ai ona matou iloa pe o le a se telē o le fanua na totoe.



“Uso Hill, sei ta vaai pe o le a le umi ta te faamamaina ai se auala lauiti, atonu pe na o le lua futu le lautele,” o le tala lea a Emanuelu. “A vave ona ta faia, o le a iloa e isi e mafai ona vave uma nai lo le mea latou te manatu i ai.”

O alii talavou, sa vaevaeina i ni vaega se lua, ma sa galulue i le aso atoa i itu faafeagai o le fanua. Sa leai se tasi na asaina le gaogaosa o le vao i le isi itu. Faatasi ai ma se papatua tiga, sa ou tootuli ifo ai e saili se toomaga a o faaauau ona sasa ese le vao i se sapelu. O le popole, sa o mai ai nisi o le autalavou e vaai pe mafai ona latou fesoasoani ona tuu mai lea o o latou tauau ina ua latou vaaia i maua ma Emanuelu o galulue e faasaga mai le tasi i le isi. I ni nai minute ae ma fetau loa, ma sa faalogoina se alaga laitiiti o le fiafia. O le vaaia o le asaga, na amata galulue taitoalua ai loa isi e fai foi faapena.

E le’i atoa se itula, ae matou faamaeaina loa. O le fiafia i le faamalieina, sa tau fai faamālō ai le tasi i le isi—ae maise lava ia Emanuelu, o lē sa saunia moni se ala mo isi e mulimuli ai.

Sa ma manatu ma le epikopo o i maua, i lo ma matutua ma le atamai, ua ma iloaina mea e mafai ona ausia e nei alii talavou. Sa le gata ina ma vaaia ni alii vevela, ma lelavava, ae



TUUINA ATU I LE AUTALAVOU SE AVANO A AUAUNA ATU AI

“E toafia ni au peresitene o tiakono ma aoao e

na o le valaauina o se tasi e faia se tatalo pe tufa le faamanatuga? Uso e, o i latou nei o ni agaga faapitoo moni lava, ma e mafai ona latou faia mea e tauaogaina pe a tuu i ai se avanoa!”

Elder Neal A. Maxwell (1926–2004) o le Korama a Aposetolo e Toasefululua, “Unto the Rising Generation,” *Ensign*, Ape. 1985, 11.

sa vaaia e Emanuelu se avanoa mo ana uo e atiina ae ai le malualii ma le talitonu o le tagata ia te ia lava. Sa ia iloaina o le tuuina i ai o se taumafaiga faaopoopo o le a aumaia ai le faamalieina sili atu ia i latou nai lo le faamaeaina o le galuega i se taimi mulimuli mai. Sa ia faamanatu mai ia i maua le malosi o le autalavou o le Ekalesia ma le auala e faamanuina ai i tatou uma pe a latou faia se saofaga ma taitai ai.

Sa ou iloaina e le manaomia ona tatou faatali mo le tatou autalavou ia tuputupu ae—e mafai ona latou faia se eseesega i le taimi nei pe a tatou faataga i latou. ■

Saunia e Elder
Marcos A. Aidukaitis
O Le Fitugafulu



O Le Olioli

I LE FAAMAMALUINA O LE ASO SAPATI

O le ola ae o se tagata o le Au Paia o Aso e Gata Ai i se siosiomaga e le o ni AAG, o se tasi o aafiaga fiafia o lo'u olaga talavou. O le mea e sili ona ou manatuaina o le faatasitasi lea ma aiga ma uo mo ni aso fanau, aso malolo, taaloga soka, ma o nisi foi taimi o se *papakiū* a le aiga. O le isi mea manaia ou te manatuaina o le o faatasi lea o se aiga i le lotu i Aso Sa.

O le tausia o le aso Sapati ia paia ma tapuai i lo tatou Tama o i le Lagi ma Lona Alo, o Iesu Keriso, o tulaga faavae ia ma masani a lo matou aiga. I le aveai o se talavou i le Ekalesia, ou te naunau lava e taalo soka i po o Aso Lua, peitai ou te naunau foi e alu i sauniga faamanatuga, Aoga Sa, ma le au perisitua i Aso Sa. E ese le manaia o faaloga e mafuta ma o matou uso ma tuafafine i le talalelei ma o lea matou te le vavevave ai e o i le fale pe a uma.

Ou te lei talisapaia moni le faataitaiga lelei na faia e o'u matua i tausaga o lo'u talavou, vagana ai ina ua ou faaipoipo ma fai so'u lava aiga. I le aveai o se tamā o le aiga, sa ou malamalama atili ai i le taua o le "alu i le fale tatalo ma osi a'e i luga [a tatou] faamanatuga i le aso paia [o le Alii]" (MF&F 59:9). Na ou malamalama atili ai i faamanuiaga sa Ia folafola mai ia i latou o e tausia lenei poloaiga.


Ou te malamalama lelei i lo matou fiafia ma a'u uo a o matou talavou, pe a mafai ona

ta'u atu e le tasi i le isi faapea matou te lei misia lava se sauniga faale-Lotu i le tausaga atoa. Atonu matou te lei iloa atoatoa le mea sa tupu ia i matou o se taunuuga o lo matou auai ma le faamaoni, ae sa matou tausisia i matou ma le le pona mai le lalolagi. E le gata i lea, sa fiafia o matou loto, sa fiafia o matou foliga, ma sa atoatoa moni lava lo matou olioli (tagai MF&F 59:9, 13–15).


O Se Tu ma se Aga Masani o le Aso Sapati

E tele tausaga o i ai se tu ma se agamasani a a'u ma lo'u toalua ma le ma fanau o le faaaluina lea o le taumafanafana i se matafaga laititi i tafatafa o lo matou fale i Pasila i saute. O nisi taimi matou te siitia ai ona o galuega, ae tusa lava po o le a le mamao o lena tama'i matafaga, e fai lava la matou malaga faaletausaga ma lo matou naunautai ma le fiafia. E faapena foi ona malaga mai aiga lautele ma uo i mea mamao ina ia mafai ai ona matou faatasitasi taitasi i le tausaga. Sa vave ona o mai tagata uma i le taimi e mafai ai ma nonofo ai foi i le umi e mafai ai.

I lena tamai matafaga e tele avanoa matagofie na maua ai e lo matou aiga e tuputupu ae ai faaleagaga ma mo aoaoga faaletalalelei. O le toatele lava o o matou aiga lautele e le auai i Le Ekalesia a Iesu Keriso o le Au Paia o Aso e Gata Ai, ma sa latou lei maua o matou talitonuga faalelotu. Ia i latou, o le aso o le Alii sa na o se tasi foi aso e taaalo ma



Ou te molimau atu e maua le olioli ma faamanuiaga i le tapuai i le Atua i Lona aso paia— e aofia ai ma faamanuiaga e le mafai ona tatou vaai i ai i le taimi nei.



*O le solia o le Sapati
semanu e faigofie
ona fetuunai i le
taimi o la matou
tafaoga faaletausaga
i le matafaga, ae e lei
misi lava lo matou o
i le lotu i Aso Sa.*

fiafia ai. Talu ai o le toatele o le aiga e i ai i le matafaga i faaiuga o vaiaso nai lo isi aso o le vaiaso, o lea e le gata ina latou faamoemoe matou te i ai ma auai i gaoioiga i Aso Sa ae faapena foi ona talosagaina pea lava pea—e aofia ai foi ma le ma fanau.

Sa laiti le ma fanau ma faatoa aoao e faa-aoga upumoni o le talalelei. Sa o se mea manaia ia i latou le faaososoga o le auai i gaoioiga faatasi ma o latou tausoga ma uo i Aso Sa. O le faaaluina o taimi ma le aiga o se vaega taua o le talalelei, ma e faigofie ai foi ona fetuunai le soli o le Sapati. E le gata i lea, o le iunite aupito lata ane o le Ekalesia i lena taimi e silia ma le 60 maila (96 km) mai le matafaga. Sa mamao a matou uo ma tuaoi o la matou au paia, ma e leai lava se tasi o i latou o le a iloina pe na matou nonofo i le matafaga ae le o i le falelotu ma auai i a matou sauniga o le Aso Sa. Sa matou o i le lotu i le tausaga atoa, ma sa mafai ona faatasitasi lo matou aiga lautele mo na o ni nai vaiaso i le tausaga.

Ae ui o lea, sa lei misi lava lo matou o i

le lotu i Aso Sa—e le'i misi faatasi lava! Sa matou manatuaina aoaoga a le Alii:

“Ma ina ia mafai ona e tausii atili atoatoa oe lava i le le pisia mai le lalolagi, ia e alu atu i le fale tatalo ma osi a’e i luga au faamanatuga i lo’u aso paia;

“Aua e moni o se aso lenei ua tofia mo oe e te malolo ai mai au galuega ma avatu ai au tapuaiga i le Silisili Ese. . . .

“Ae ia manatua i le aso lenei, le aso lea o le Alii, ia e avatu ai au taulaga ma au faamanatuga i le Silisili Ese. . . .

“Ma i le aso lenei, aua ne’i e faia ai se isi lava mea, tau lava o le saunia o au meaa i le manatu tasi o le loto ina ia atoatoa lau anapogi, po o, i ni isi upu, ina ia atoatoa lou olioli” (MF&F 59:9–13).

Sa matou filifili e tausii lenei poloaiga, ma sa ma aoaoina la ma’ua fanau e tatau ona latou tausii foi. E lei pine ae malamalama i latou e sili atu ona taua le tapuai i le Atua i Lona aso paia nai lo le faamalieina o aiga ma uo pe faamalieina foi o latou lava manaoga.





Faamanuiaina e ala i le Usiusitai

I Aso Sa i le matafaga, matou te alapo ai, fai o matou ofu mo le tapuaiga i le Aso Sa, ona matou o lea i le taavale i se falesa e latalata ane. A o alu le matou taavale ma i le gasologa o lena aso atoa, matou te fiafia ai i le filemu ma le olioli sa folafola mai e le Alii ia i latou o e tausia Ana poloaiga. Sa matou iloa ai o lenei lagona o le filemu ma le olioli, e le maua mai i le lalolagi.

Ina ua mavae ni tausaga o lenei faiga faifai pea, sa tupu mai se mea matagofie. Sa le toe fesili le ma fanau i le taua o le tapuai i le Atua i Lona aso paia, ma sa amata foi ona fesilisili tausoga o le ma fanau pe mafai ona matou o i le lotu! Ma te lei iloina, sa lagonaina foi lea lava lagona o le filemu ma le olioli e nai o matou tei pe a matou foi mai a matou sauniga. Na iu ina tulai mai se faamanuiaga sili. Ina ua aveva nisi o na tamaiti ma talavou, sa fai atu le toalua o i latou mai se tasi o o matou aiga, “Ua ma fia aveva ma Au Paia o Aso e Gata Ai.” E lei leva ae papatiso uma le aiga. Talu ai nei, o se tasi o le fanau, ua foi mai ua mae’a le misiona, ma ua faaipoipo i le malumalu.

O loo matou o pea lava i lena matafaga i tausaga taitasi, ae ua iloa e tagata uma o le a le i ai lo matou aiga i taaloga i le Aso Sa.

Nai lo lena, matou te o i le lotu ma tapuai i le Atua faatasi ai ma tagata o o matou aiga e auai mai ma i matou—o se vaega ua faatuputupulaia pea i tausaga taitasi!

A matou toe tepa i na tausaga ma mafau-fau i le filifiliga sa matou faia, matou te faafetai i le Atua mo le fesoasoani mai ia maua le lototoa e faia ai le mea sa’o ma aoao le ma fanau e faia foi lea mea e tasi. E leai so ma masalosalo o lena faaiuga na faamalolosia ai le ma fanau faapea foi lo matou aiga lautele. Na matou maua ai le filemu sa folafola mai e le Alii, ma faia ai se matafaioi taua i le liuaina o tagata o le aiga, ma faamanuiaina ai i matou i se lotomalie e le maua i nisi gaoioiga e faia i Aso Sa e le faatumuina ai le agaga.

Ou te molimau atu o le olioli ma faamanuiaga e maua mai i le tapuai i le Atua i Lona aso paia—e aofia ai faamanuiaga e le mafai ona tatou vaai i ai i le taimi nei. Ma ou te molimau atu “amuia le nuu e fai Ieova mo latou Atua” (Salamo 144:15). ■

O loo matou o pea lava i lena matafaga i tausaga taitasi, ae ua iloa e tagata uma o le a le i ai lo matou aiga i taaloga i le Aso Sa. Nai lo lena, matou te o i le lotu ma tapuai i le Atua faatasi ai ma tagata o o matou aiga e auai mai ma i matou

Faitalia *ma* Musumusuga



Sa soifua Bruce R. McConkie i le aso 29 o Iulai, 1915, i Michigan, ISA. Sa lagolagoina o ia i le Aufono Muamua a Fitugafulu i le 1946 ma faauuina o se Aposetolo i le 1972. Sa maliu o ia i le aso 19 o Aperila, 1985. O le lauga lenei sa tuuina atu i le Iunivesite o Polika Iaga i le aso 27 o Fepuari, 1973.

Saunia e Elder Bruce R. McConkie (1915–85)
O Le Korama a Aposetolo e Toasefululua

*Ua faamoemoe
tatou te faia mea
uma i le malosi
tatou te mafaia
ona saili lea mo
se tali mai le
Alii, se faailoga
mautinoa ua
tatou ausia le
faaiuga sa’o.*

Ao tatou i ai i le afioaga o le Atua lo tatou Tama Faalelagi, sa faaeeina mai ia i tatou le faitalia. O lenei mea na tuuina mai ai ia i tatou le avanoa, le faamanuiaga, e filifili ai mea o le a tatou faia—e fai se filifiliga saoloto, e le taofiofia. . . . Ua faamoemoe tatou te faaoga mea-alofa ma taleni ma gafatia, o le magafagafa ma le filifiliga ma le faitalia lea ua faaeeina mai ia i tatou.

Ae i le isi itu, ua poloaiina i tatou e saili le Alii, ia talosagaina Lona Agaga, ia maua le agaga o faaaliga ma musumusuga i o tatou olaga. Tatou te o mai i le Ekalesia ona tuu mai lea e se taitai faauuina ona lima i luga o o tatou ulu ma fai mai, “Talia le Agaga Paia.” O lenei mea ua tuu mai ai ia i tatou le mea-alofa o le Agaga Paia, o le aia tatau lea i le mafutaga faifaipea a lena sui o le Aigaatua, e faavae i le faamaoni.

Ma o lea ua tatou fetaia’i ai ma ni fautuaga

se lua. O le tasi, e tatau ona taitaiina i tatou e le agaga o musumusuga, le agaga o faaaliga. O le isi, ua tatou iinei i lalo o se faatonuga e faaoga o tatou faitalia, e filifili ai mea e ao ona tatou faia e i tatou lava; ma e manaomia ona tatou ausia se paleni lelei i le va o nei mea e lua. . . .

O lea, pe afai e mafai, ou te fia tuuina atu ni tulaga se tolu e suesue ai, lea atonu, e mafai ona tatou maua mai ai nisi o faaiuga sili ona aoga ma lelei i mea e tatau ona i ai o tatou olaga. O le a ou aumaia nei faataitaiga mai faaaliga ua tuuina mai e le Alii ia i tatou.

“Sa E Le Malamalama”

Tulaga e suesue ai numera 1: Sa i ai se alii e igoa ia Oliva Kaotui. . . . Sa ia tusitusia upu na faitau atu e le Perofeta a o nofo le Agaga i ona luga i le faagasologa o le faaliliuga (i le taimi na faaliliuina ai le Tusi a Mamona). O le taimi lena sa faalelava le matua po o le silafia faaleagaga o Uso Kaotui, ma sa ia sailia ma manao e fai se mea sa i tua atu o lona malosi faaleagaga i lena taimi. Sa oo ina manao o ia e faaliliu. Ma o lea sa ia [fai atu] ai i le Perofeta, sa molimoli atu e le Perofeta le mataupu i le Alii, ma sa la maua ai se faaaliga. Na fetalai le Alii, “Oliva Kaotui e, e moni, e moni, Ou te fai atu ia te oe, e pei ona mautinoa o loo soifua le Alii, o lē o lou Atua ma lou Togiola, o le a faapea lava ona mautinoa ona e maua o se malamalama e uiga i soo se mea e te ole mai ai i le faatuatua, ma le loto faamaoni, ma le talitonu o le a e maua.” Ma o le mea e tasi na te ono maua ua faamatalaina o “se malamalama e uiga i togitogiga o talafaamaumau tuai, ua mai anamua, ia ua i ai vaega na o a’u



tusitusiga paia na fetalaiā e ala i le faaaliga a lo'u Agaga.”

O le taulimaina ai o le faaaitauli faapitoa, na faaali mai ai e le Alii se mataupu faavae e faatatau i ai ma isi tulaga uma faapena: “Ioe, faauta, o le a Ou tau atu ia te oe i lou mafaufau ma lou loto, e ala i le Agaga Paia, lea o le a oo atu i ou luga ma lea o le a mau i lou loto. O lenei, faauta, o le agaga lenei o faaaliga” (MFF 8:2–3). . . .

. . . Ma sa ole atu o ia. Ma e pei ona outou silafia, na te le'i mafaia; sa matuai le mafai lava ona ia faaliliu. . . . Sa toe molimoli atu le mataupu i le Alii, o lana folafolaga lea sa laua taumafai e faafetauia; ma sa oo mai le tali, sa oo mai le pogai, sa le mafai ai ona ia faaliliu: “Sa e le malamalama; sa e manatu o le a Ou tuu atu ia te oe lenei mea, ae e te lei mafaufau i ai ae nao lou ole mai ai ia te a'u” (MF&F 9:7).

Ia, e foliga mai, na o le pau lenei o le mea sa faatonuina o ia e fai, ia ole atu i le faatuatua; ae o loo affi mai i le ole atu i le faatuatua le tulaga e manaomia muamua, ia tatou faia mea uma i lo tatou malosī e ausia ai le sini ua tatou sailia. Tatou te faaoga le faitalia ua faapea ona faaeeina mai ia i tatou. Tatou te faaogaina soo se taleni ma le gafatia ma le tomāi ua ia i tatou e maua ai avanoa o loo aafia ai. Ia, o le faaliliuga lea o le Tusi a Mamona, o le filifilia o se avā, o le filifilia o se galuega, o le faia o soo se tasi o mea taua e 10,000 e tutupu i o tatou olaga. . . .

“Aisea Ua E Fesili Mai Ai Ia Te A'u?”

Ia, o le tulaga e suesue ai numera 2: . . . Sa oo atu [Sa Iareto] i vai o le a latou sopoia, ma sa fetalai atu le Alii i [le uso o Iareto], “Fau ni vaa.” . . .

A oo ina tatou matutua i le faaleagaga, tatou te iloa ona faia se paleni i le va o le faaaogaina o o tatou faitalia e filifili ai mea e tatau ona tatou faia ma le taialaina e le agaga o musumusuga.

[O vaa] o le a faaaogaina i lalo o ni tulaga e uiga ese ma faigata, ma sa manaomia e [le uso o Iareto] se mea e sili atu nai lo mea na i ai ia i latou i lena taimi: sa ia manaomia se ea. Ma o se faaaitauli lena sa le oo i ai lona malosi. O lea sa ia molimoli atu ai le faaaitauli i le Alii, ma ona sa matuai le mafai lava ona oo i ai lona malosi e fofo ai le faaaitauli, o lea sa fofo ai e le Alii mo ia ma fetalai mai, “Fai le mea lena ma o le a outou maua ai le ea.”

Ona toe fesili lea o le uso o Iareto—ua ia maua le to’a aua sa talanoa i le Alii, aua sa talanoa atu o ia ma maua mai tali—: . . . “O le a se mea matou te faia mo le malamalama i totonu o vaa?”

Ma sa talanoa le Alii ia te ia e uiga i ai mo sina taimi, ona Ia fetalai mai lea: “O le a se mea tou te mananao ia ou faia ina ia outou maua se malamalama i totonu o o outou vaa?” (Eteru 2:23). I se isi faaupuga, “. . . Ua ou tuuina atu ia te outou le faitalia; ua faaeina atu ia te outou le gafatia ma le tomali. O laia e fofo le faaaitauli.”

Ia, sa maua e le uso o Iareto le savali. Sa alu ae o ia i luga o se mauga na taua o Selema, ma fai mai le tala, sa ia “gaosi mai se papa ni maa laiti e sefulu ma le ono; ma sa papae ma manino ia maa, e pei lava o se tioata manino” (Eteru 3:1). . . .

Ma sa faapea ona fai e le Alii le mea na talosagaina e le uso o Iareto, ma o le taimi lena na vaai ai o ia i le tamatamai aao o le Alii; ma, a o i ai i lena siosiomaga, sa ia maua se faaaliga na sili mamao atu nai lo soo se isi lava mea na maua e soo se perofeta e oo atu i lena taimi. Sa tele atu mea na faaali mai e le Alii ia te ia e faatatau i Lona natura ma uiga nai lo se isi lava taimi muamua seia tau mai i lena taimi, ma sa oo

mai nei mea uma ona sa ia faia mea uma na mafai ona ia faia ma ona sa filifili faatasi ma le Alii.

O loo i ai se paleni tutusa i le va o le faitalia ma musumusuga. Ua faamoemoe tatou te faia mea uma i lo tatou malosi tatou te mafaia ona saili lea o se tali mai le Alii, o se faailoga mautinoa ua tatou ausia le faaiuga sa’o; ma o nisi taimi, i le fiafia, ma le isi, tatou te maua upumoni ma le malamalama faaopoopoina tatou te le’i mafaufauina.

“Latou [te] Taupulepule Ai i le va o Latou Lava ma A’u”

O lena, o le tulaga e suesue ai numera 3: I talaaga o le popofou o le Ekalesia, sa poloaiina ai e le Alii le Au Paia e faapopototo i se nofoaga faapitoto i Misuri. . . . Ia matau le mea na tupu. O le Alii o loo fetalai:

“Ma o lena e pei ona Ou tautala atu e uiga i la’u auauauna o Eteuati Paterika, o le laueleele lena o le laueleele lea o lona alaafaga, ma i latou o e ua ia tofia mo ona fesoasoani; ma o le laueleele foi lea o le alafaga o ia o le ua Ou tofia e tausia lo’u faleteuolola;

“O le mea lea, ia tuu atu ia te i latou e aumai o latou aiga i le laueleele lena, e pei ona latou taupulepule ai i le va o latou lava ma a’u” [MF&F 58:24–25; ua faaopoopo le faamamafa]. . . .

Tou te silafia, na fetalai le Alii e “faapopototo” i Siona. Ae peitai, o faamatalaga ma feutagaiga, o le faapefea ma le o afea ma tulaga, e tatau ona iloiloa e le faitalia o i latou o e ua valaauina e faapopototo, ae e tatau ona latou filifili ma le Alii. . . .

Ia, ina ua uma ona ta’u atu e le Alii lena mea i le Au Epikopo Pulefaamalumu o le Ekalesia, sa Ia tuuina mai le mataupu faavae

na taitaia ai lena tulaga, ma e taitai ai i tulaga uma. Ma o se tasi lenei o a tatou upumoni mamalu ua faaalua mai. Na Ia fetalai:

“Aua faauta, e le tatau ona ou poloai atu i mea uma; aua o ia o lē e tau faama-losia i mea uma, o ia lava lea o se auauna paie ma lē poto; o le mea lea e le maua e ia se tau.

“E moni Ou te fai atu, e tatau i tagata ona auai ma le naunautai i se faamoemoega lelei, ma fai mea e tele i lo latou lava loto malie, ma aumai le amiotonu tele” [MF&F 58:26, 27; ua faaopopo le faamamafa]. . . .

Ia, o tulaga na e tolu e sutesue ai; sei o tatou o mai la i le faaiuga na faali mai. . . .

. . . Afai e te iloa ona faaaoga le faitalia ua tuuina mai e le Atua ia te oe, ma afai e te taumafai e fai a oe lava faaiuga, ma afai e te oo i faaiuga e lelei ma sa’o, ma e filifili faatasi ma le Alii ma maua mai Lana faamau-faailoga o le faamaoniga o faaiuga ua e faia, mo se mea e tasi; ma mo se isi mea, o le a e maua le tau tele o le ola e faavavau, o le siitia i le aso o le gataaga. . . .

Ua foai mai e le Atua ia i tatou le poto i nei mea. Ua foai mai e le Atua ia i tatou le lototele ma le malosia e tutu ai i o tatou lava vae ma faaaoga lo tatou faitalia ma gafatia ma malosia o loo ia i tatou; ia sei o tatou matuai faamaulalo ma usitai i le Agaga ia gauai atu o tatou loto i Lona finagalo, ia maua mai Lana faamaoniga, faamaufaa-iloga o le faamaoniga, ina ia maua i o tatou olaga, i lena auala, le agaga o faaaliga. Ma afai tatou te faia faapea, o le a le fesiligia lava le taunuuga: o le filemu i lenei olaga; o lona matagofie ma le mamalu ma le malualii i le olaga a sau. ■

O sipelaga, faailoga, ma mataitusi tetele ua faalaugatasia.



GALUE E TUSA MA Uunaiga

O se faamanuiaga i tagata uma o le Au Paia o Aso e Gata Ai le maua o musumusuga i aso taitasi e ala i le Agaga. O le agavaa i le, ma le nau-nau e usitai i uunaiga faaleagaga, e mafai ai ona tatou maua le taita-iga e finagalo le Tama Faalelagi e faamanuia ai i tatou. Ua faasoa mai e le toatolu o le au paia auala na latou faalogo ma tali atu ai i uunaiga a le Agaga, ma, o le tau, na maua ai faamanuiaga e tele.

Sa Manaomia Lo'u Toe Foi i Tua

I se tasi po, a o ou galue o se taitai perisitua i le siteki i Loulé, Potukale, sa ou momoliina atu nisi o le autalavou i o latou aiga ina ua uma se gaioiga a le siteki. Sa leva le afiafi, ma a'o alu atu la'u taavale i le fale ina ua uma ona momoli le autalavou, sa ou afe i se auala pogisa i se eria maotua e tau leai ni taavale. O le auala na ou uia ai se auala laupapa laitiiti ma vaaia ai se sulu o emo mai i lo'u itu taumatau i lalo o le vaitafe e pei o se afi.

Ona o le susu o le ea o le po, sa ou faapea ai, e tusa lava foi pe o i ai se afi, o le a vave ona pe i le susu, o lea na ou toe taulai ai i le auala i luma.

Ae peitai, sa na o ni nai mita na ou alu ai, ae ou faalogoina se leo na fai mai, "Taofi!" Sa ou te'i aua sa ou alu na o a'u, ae sa ou le ano i ai ma faaauau ona ou alu. Ona oo mai lea o se leo o le faititili, "Taofi ma toe foi i tua!" Sa vave ona ou toe liliuina le taavale ma toe foi i tua. A o ou faia, sa ou fesili atu i le Tama Faalelagi,

"le Alii e, o le a lea mea?" O le taimi lava na ou oo ai i le auala laupapa, sa ou oso ai i fafo mai le taavale, ma sa oo mai i le taimi lava lena le tali a le Alii, aua na ou faalogoina le taulaga mai a se tagata i lalo, "Faamolemole, fesoasoani mai!"

Sa toetoe lava a leai se malamalama, ma sa le mafai ona ou iloa se mea na vagana ai se tamai sulu, lanumoli sa emoemo mai lalo. Sa i ai se vanu tifato i lalo ifo o le auala laupapa, ma o le tau leai o se malamalama, sa ou le iloa ai pe faapefea ona ou fesoasoani. Sa faavave ona ou viliina se numera telefoni mo faalavelave faafuasei, ma sa le'i umi ae oo atu tagata laveai e fesoasoani.

O lena sulu itiiti sa sau mai i se taavale na oso ese ma le auala ae sa i ai ni tagata se toalima. E toalua na maliliu, ae na semanu e oo i se tulaga sili atu ona leaga pe ana ou le faalogo i le leo o le Agaga Paia.

Ou te molimau atu e talanoa mai le Alii ia





i tatou e ala mai i le Agaga, a le o se leo malu po o se leo o le faititili. Ou te faafetai ona sa ou faalogo i ai i lona po. Ou te iloa o loo soifua le Alii, ma e alofa o Ia ia i tatou, ma o le Agaga Paia e fesootai mai ia i tatou. Pau le mea e tatau ona tatou faia o le mataala i Lona siufofoga. ■ Nestor Querales, Potukale

Sa Ou Filifili e Faalogo

O tausaga ua mavae sa amata ai ona faalavelave soo mai se lagona e tatau ona ou tuufaatasia se tusikuka a le aiga, e aofia ai ni fua o kuka mai i lo'u aiga lautele. Sa ou faataatiaina ese lea manatu. Sa masani ona ou mafaufau ifo ia te au lava, "E leai so'u taimi e fai ai se na tusikuka faavalevaleyale! O loo i ai sa'u fanau pisi e toaono! O le faiga o tusikuka e mo ituaiga tina o loo faatoa tau amata ona faia-ni falaoa, ma ni pani sinamoni. E leai so'u taimi mo lona mea!"

Sa tumau lava ia te au lea lagona malosia mo le tele o tausaga seia oo i se tasi aso, sa ou filifili ai loa e mafaufau loloto i ai. Ae sa ou mafaufau po o ai o lo'u aiga o le a fia auai ai. Sa na o a'u le tagata o lo'u aiga e auai i le Ekalesia, ua maliliu o'u matua, e leai ni ou uso ma ni tuagane, ma o le toatele lava o lo'u aiga lautele e mamao mea e nonofo ai. Ae peitai, sa ou filifili lava e faalogo i le uunaiga.

Sa ou faafesootaia lo'u aiga, ma faamatala i ai o loo ou tuufaatasia se tusikuka a le aiga ma valaaulia i latou e aumai ni fua o kuka. I le aluga o le tausaga na sosoo ai, sa ou maua mai ai ni nai fua. Sa auina mai foi e nisi o lo'u aiga ni tala ma ni ata o le aiga. O lenei mea sa uunaia ai au e faatalanoa nisi o tagata sili ona matutua o lo'u aiga na soifua pea ma ao mai lo'u talafaasolopito faaleaiga, lea na ou filifili foi e faaafua i le tusi.

I le tuufaatasia ai o le tusi, sa ou iloina ai, ou te le'i iloina le toatele o tagata o le aiga



O LE A TAITAI OE E LE AGAGA

“O le meaalofa o le Agaga Paia, afai e te faatagaina, o le a taitalaina ma puipuia oe, ma e oo lava i le faasa’oina o au amioga. O se leo faaleagaga e oo mai i le mafaufau o se manatu po o se lagona e tuu i totonu o lou loto. . . . E le o faamoemoaina e te ola i lenei olaga e aunoa ma le faia o ni mea sese, ae o le a e le faia lava se mea sese matuia e aunoa ma le lapataia muamua o oe e uunaiga a le Agaga Paia. O lenei folafolaga e faatatau i tagata uma o le Ekalesia.”

Peresitene Boyd K. Packer,
Peresitene o le Korama a
Aposetolo e Toasefululua,
“Fautuaga i le Autalavou,”
Liahona, Nov. 2011, 18.

o e na auina mai ia fua o kuka. Ona o lenei mafuaaga, sa ou filifili ai e faaaofia ai ma se gafa o le aiga. Sa ou fesili atu mo faamatalaga a tagata uma, tusi le gafa o le aiga, ma tuu loa i le tusi.

A o ou toe tilotilo tasi i le tusi ua maea, sa ou sueina i le itulau o le gafa o le aiga ma oo ai ina lofituina a’u i le Agaga. Sa maligi ou loimata ina ua ou manino lelei i le mafuaaga na tatau ai ona ou tuufaatasia lenei tusikuka “faavalevalea”. Sa laititi lava se mea e uiga i fua o kuka. Sa ou tuufaatasia igoa ma aso o augatupulaga o o’u tuua. Ua mafai nei ona faia galuega o le malumalu o nei tagata uma. Ma le isi, sa ou faasaosaoina ni tala matagofie mo tupulaga i le lumanai.

O le taimi nei o loo matou fesootai pea e le aunoa ma nisi o o’u tausoga ma fiafia ai i se mafutaga matagofie faatasi ma lo’u aiga lautele. A ou vaai i la’u tusikuka, e masani ona ou mafaufau i le mau, “O le mea lea, aua le faavaivai i le faia o mea lelei, ona o lo o outou faataatiaina le faavae o se galuega tele. Ma o mea iti e tutupu mai ai mea tetele” (MFF 64:33). O loo ou maofa pea pe a ou nofo ma mafaufau i le fiafia ma mea matagofie uma na oo mai ona o le usitai i se uunaiga ma tuufaatasi ai se tusikuka faatauva. ■

Nancy Williamson Gibbs, Colorado, ISA

Na Lagona Lava o le Mea Sa’o Lea

E tele auala e fesootai mai ai le Agaga. Sa ou oo i ni taimi o le toafilemu, lagona o le mafanafana, ma le manino o le mafaufau. O nisi o o’u manatu sili ona malolosi e oo mai o se lagona o le moni po o le sa’o. E faigata ona faamatala le lagona, ae e i ai iina pe a e iloina lava e moni se mea pe e manaomia ona e faia se mea.

O se tasi o aafiaga sili ona mamana na ou maua i lenei lagona o le taimi na sue ai so’u fale e faatau. Sa ou nofofua ma sa ou mafaufau mo ni nai tausaga e faatau so’u fale. Sa ou ta’u atu i le tagata o le ofisa faatau fale le mea sa ou sailia, ma sa ia faia se galuega lelei tele i le sueina o fale e fetau ma la’u faamatalaga. Na te faaali mai ia te au ni fale, ae ou te musu ai leaga ou te le’i lagonaina o le fale sa’o lea. Sa amata ona ia fesili mai pe o a mea ou te le manao ai i ia fale taitasi ina ia ona faaali faalelei mai ia te au ni fale e fetau ma lo’u manao. O le mea na leaga ai, sa le mafai ona ou faamatalaina lelei atu mea na misi.

Mulimuli ane, i se tasi aoauli sa ma savavali ai i totonu o se fale sa le tutusa lona manaia ma nisi o fale sa ma matamata ai. Sa fai si taugata teisi atu nai lo isi fale. Sa fetau ma la’u faamatalaga o le mea sa ou ta’u i ai sa ou manao ai, ae sa le atoatoa e pei o isi fale sa





ou vaai i ai. Ae ui i lea, ina ua uma ona ma matamata i totonu, sa ou fai atu i le tagata faataufale, sa ou manao ou te tauofo i ai. Sa foliga mai sa fai si ona te'i i lo'u naunau e faagaoioi vave loa. Pe a mafaufau atu i lo'u faatuatuai i masina na muamua atu, sa sa'o o ia i lona faate'ia. Peitai o le lagona e faapea, o le fale lenei e tatau ona ou nofo ai sa toetoe lava a lofituina. Ou te le'i lagonaina se manao e taofi sei mafaufau i ai.

Sa tuu i ai la'u ofo, ma sa taliaina e tagata na faatau maia le fale la'u tauofo, e ui lava i le mea moni e faapea, sa le o le ofo aupito maualuga lea na latou mauaina. Sa ou fai atu i lo'u aiga sa ou iloina sa tatau ona ou nofo i lona fale, e ui ou te le'i iloina pe aisea.

Sa fai si vave ona ou iloina le mafuaaga sa tatau ai ona ou nofo iina. Sa ou feiloai i se tamaitai i le uarota a le au nofofua i totonu o se masina talu ona ou siitia atu i le fale. O le silia laitiiti ma le tausaga mulimuli ane, sa ma tootutuli ai i le fatafaitaulaga i le malumalu, lea na faamauina ai i maua o se tane ma se ava.

E moni lava e galue le Alii i auala ofoofogia. Sa leai ma so'u mafaufau sa Ia taitaiina atu au i se faaipoipoga e faavavau ina ua Ia fesoasoani mai ia te au e filifili se fale. Na pau le mea na ou iloina sa taialaina au e fai lenei laasaga, ma ua ou iloa nei o lona taitaiga na sau mai i Lona Agaga. ■
Jeffery Stockett, luta, ISA

O FAAMOEMOEGA E VALU O FAAALIGA

Na aoao mai Elder Dallin H. Oaks o le Korama a Aposetolo e Toasefululua, e valu faamoemoega e fesootai mai ai le Agaga:

E molimau: O le Agaga e mafai ona molimau mai o lesu o le Keriso ma e moni le talalelei.

E vavalu: I totonu o tuaoi o eria o tiutetauave o se tagata, e mafai ai ona musuia se tagata e valoia le mea o le a tupu i le lumanai. O le perofeta, peteriaka, e oo foi ia i tatou e mafai ona maua faaaliga faavaloaga.

E faamafanafana: O le Agaga e mafai ona faamafanafana ia i tatou e pei ona la faamafanafanaina Iosefa Samita i le Falepui-pui i Liperate: "Ia filemu lou agaga; o lou tiga ma ou puapuaga o le a nao sina minute laitiiti" (MF&F 121:7-8). O le faamafanafanaga foi e fesootai ma faamanuiaga faaleperisitua, faaaliga i e pele ua maliliu, ma le faamagaloga o agasala.

E siitia: E mafai e le Agaga ona sii ae i tatou mai le atuatu-vale, lagona o le le atoatoa, po o se tulaga o le vaivai faale-agaga. E oo mai a o tatou faitau i tusitusiga paia pe fiafia i musika lelei, ata, po o tusi faitau.

E faailoa: Atonu e tuu atu ia te oe ia upu e te tautala ai

i se tulaga faapitoa. Sa ta'u atu e le Alii ia Iosefa Samita ma Sini Rikitone, "Aua o le a tuu atu ia te oulue i le itula tonu lava, ioe, i le minute tonu lava, mea e te lua fai atu ai" (MF&F 100:6). I nisi o taualumaga paia, sa tuuina mai ai faafesagai ia faamatalaga mai avefeau faalelagi. O isi taimi, e faailoa mai ai faamatalaga e musumusuga malu a le Agaga.

E taofia: O lenei ituaiga o faaaliga o le a taofia i tatou mai mea e le tatau ona tatou faia. E masani ona oo mai o se mea e te'i ai, ae tatou te le'i ole atu mo se taitaiga i se mataupu faapitoa.

E faamautinoa: E mafai ona e maua se faamautinoaga e ala i le Agaga pe a uma ona folasia atu se auala faapitoa o faatinoga ma tatalo ia iloa pe o le filifiliga sa'o lea.

E uunai malos: O lenei ituaiga o faaaliga e le sailia ae e oo mai o se fafagu i se tagata i se faatinoaga e le'i fuafua-ina. O lenei ituaiga o fesootaiga mai le Agaga e seasea ina tupu, ae o le mea lenei, e taua ai.

Mai le "Faaaliga," i le *Iunivesite o Polika Iaga 1981-82 Lauga o Faesaite ma Faigalotu* (1982), 20-26.

FEFAUTUAAI FAATASI I LE Faaipoipoga

Saunia e Randy Keyes

I le avea ai ma se faufautua o faaipoipoga ma aiga i Vitoria, Kanata, sa ou fautuaina ai se ulugalii, o Papu ma Mele (ua suia ia igoa), o e sa masani ona i ai ni feeseeseaiga pe a la taumafai e fai faatasi ni filifiliga. I se

tasi o fonotaga, sa fai mai ai Papu ia te au, “Ou te taumafai e pulefaamalumalu ma fai mea uma, ae a faaali atu ou manatu o le mea e tatau ona fai, *na te le lagolagoina le perisitua!*”

Mai lana faamatalaga, sa mafai ona ou iloa ai sa le'i malamalama atoatoa o ia i le uiga o le faamatalaga e pulefaamalumalu. A faaipoipo ulugalii, la te faia se faigapaaga tutusa lea e taumafai ai e fai faatasi filifiliga i se agaga o le lotogatasi.

Sa ou faasoa atu i le ulugalii lenei nisi o mataupu faavae e uiga i le filifili faatasi lea sa ou aoaoina mai faataitaiga i fonotaga a le au perisitua. E ui o fono i le aiga e fai si ese o lona faamoemoega nai lo fono i le Ekalesia, ae e tele mataupu faavae e tutusa lava le aoga. A o tatou taumafai e faaoga nei mataupu faavae i o tatou aiga, e mafai ona fesoasoani e faamaalosi ai a tatou faaipoipoga i se auala e fiafia ai le Alii.



MATAUPU FAAVAE MUAMUA 1: FAIA O FAAIUGA AUTASI

I Fonotaga a le Au Perisitua

O au perisitene, aufono, ma au epikopo uma e galulue i luga o mataupu faavae o le maliliega autasi, lotogatasi. Sa faamalamalama mai e Elder M. Russell Ballard e faapea, o le Korama a Aposetolo e Toasefululua e o malilie faatasi i se filifiliga e tasi ae latou te le'i faatinoina soo se mataupu: “Matou te talanoaina ni mataupu eseese se tele, mai le taitaiga o le Ekalesia e oo i mea e tutupu i le lalolagi, ma matou te faia i le faamaoni ma le manino. O nisi taimi e fia ni vaiaso, masina, ma e seasea ona tupu, ae e tausaga foi ona faatoa fai lea o se faaiuga i mataupu e talanoaina.”¹ E taua tele le lotogatasi ma latou te le faia lava se faaiuga seiiloga lava e maua le loto e tasi.

Sa aoao mai e le Alii ia Iosefa Samita lena mataupu faavae e tasi o le lotogatasi i aufono: “Ma o faaiuga uma e faia e soo se tasi o nei korama e ao lava ina faia i le leo autasi o ia lava korama; o lona uiga, e ao i uso taitoatasi o korama taitasi ona ioe i faaiuga a le korama, ina ia faia a latou faaiuga i le mana po o le pule e tasi ia tasi ma le tasi” (MF&F 107:27).

Sa faamamafa mai e Elder David A. Bednar o le Korama a Aposetolo e Toasefululua lena mataupu faavae ina ua aoao mai, “E le mafai ona tatou maua musumusuga pe afai tatou te le lotogatasi.”² A tatou tasi i le faamoemoe ma le tatalo, tatou te valaaulia le taitaiga ma musumusuga mai le Agaga Paia.

I le Aiga

O le mataupu faavae o le lotogatasi e tatau mo aufono a le au perisitua, ma e tatau foi mo faaiipoipoga. Ua aoao mai le Usoga e faapea, o le aufono a le aiga, o le aufono taua lea o le Ekalesia.³ Ia matau latou te le i aoao mai e faapea o le tane o le aufono sili lea ona taua po o le ava o le aufono e sili ona taua. O lena aufono e aofia faatasi uma ai i laua.

E le o se mea e le masani ai mo ulugalii le tauivi ina ia oo i se faaiuga autasi, ae maise lava



pe afai o le mataupu o loo soalaupuleina e taua. Ma le isi, afai e sili atu le popole o taitoalua i le sa'o o le tagata lava ia nai lo le mauaina o le autasi, “e motusia ai fesootaiga ma le Tama Faalelagi, o le taimi foi lena e motusia ai fesootaiga i le va ma taitoalua. Ma o le a le faalavelave mai lava le Tama Faalelagi. E masani lava e le solia e Ia se mea e lei valaauliaina o Ia i ai.”⁴ O le ki o le matuai valaaulia lava—nai lo le vavaeseina—o lo tatou Tama Faalelagi i a tatou soalaupulega. Afai tatou te galulue faatasi ma le lotomaulalo ma faalogo le tasi i le isi, tatou te maua faamanuiaga taua o le taitaiga a le Alii.

E taua le faia o filifiliga autasi faatasi ai ma le taitaiga a le Agaga—ae maise lava pe afai o le faaiuga e le foliga mai o le filifiliga aupito sili lea ona lelei. Sa faamalamalama mai e Perisitene George Q. Cannon (1827–1901), Fesoasoani Muamua i le Au Perisitene Sili e faapea, e lagolago e le Alii le filifiliga a taitai e afaatasi ma o le a Ia faaleleia atili la latou fuafuaga-e-fai-si-le-atoatoa ma o le a “faaopopo i ai e ala mai i Lona poto ma le mana ma faia ai ia tauaogaina.”⁵ O lena folafolaga ua ofoina atu i aufono uma, e aofia ai ma ulugalii.

Ae peitai, o le faia o faaiuga e le faapea o taimi uma e tatau ai ona faia i le faagasologa aloaia. Ua aoao mai Elder Ballard e faapea “afai e talanoa le tane ma le ava, o loo la faia se aufono faaleaiga.”⁶

Ma le isi, e pei foi ona le poloaiina i tatou e le Alii i mea uma, e le faapea o faaiuga uma e tatau ona fai ai e ulugalii ni fonotaga. E tatau i ulugalii ona faatuatua le tasi ma le isi e fai ia faaiuga i aso uma e faavavau ona i ai ni

E pei foi ona tau-mafai aufono a le au perisitua mo le lotogatasi o a latou faaiuga, ae o le lotogatasi i le faaiipoipoga e taua tele.

taunuuga laiti. Faatasi ai ma le taitaiga mai le Alii, o tusitusiga paia, ma saunoaga a perofeta, latou te iloiloaina ai na faaiuga e manaomia ai ona talanoaina faatasi.

MATAUPU FAAVAE 2: AUAI ATOATOA

I Fonotaga a le Au Perisitua

I le fonotaga o le aoaoga faaleautaitai i le lalolagi atoa ia Novema 2010, sa faasoa mai ai e Julie B. Beck, peresitene aoao o le Aualofa, le mau lenei: “Tofi se faiaoga i totonu o outou lava, ma ia le tuu atu i tagata uma e tautala i le taimi e tasi; ae tuu atu i tagata e tautala taitoatasi mai ae tuu i isi tagata uma e faaalogologo i ana upu, ina a uma ai ona tautala mai o tagata uma, o le a faapea ona mafai ona faaga-eetia ai o tagata uma, ma ina ia mafai ona maua ai e tagata taitoatasi le avanoa tutusa” (MF&F 88:122). Sa mulimuli Elder Walter F. González o le Au Peresitene o Fitugafulu i ana saunoaga faatasi ai ma le mea na matauina e faapea, o le auai e uunaia ai musumusuga.⁷ A maua e tagata uma le avanoa tutusa e saofaga ai, o le a oo ina malosi atu ia manatu tuu faatasi o tagata taitoatasi.

I le Aiga

O le mataupu faavae o le auai ua aoao mai ai ia i tatou le taua o le tofusa o le ulugalii uma i le faagasologa o le faia o faaiuga. E le lava le fai e le tagata e toatasi o le ulugalii ia faaiuga uma ae na o le ioe lava i ai o le isi. E sili atu le faamanuiaina e maua e ulugalii a o latou tau fai saili i musumusuga ona faalogo lea o le tasi ma le isi i manatu ma lagona o le isi.

Na saunoa Peresitene Howard W. Hunter (1907–95): “O se alii e umia le perisitua e talia lana avā o se paaga i le taitaiga o le aiga ma le auai i le malamalama atoatoa e uiga, ma le auai atoatoa i faaiuga uma e faatatau i ai. . . . Ua faamoemoeina e le Alii ia avea le ava ma se fesoasoani i le tane (o le *meet* o lona uiga e tutusa)—o lona uiga, o se paaga tutusa ma e manaomia i le faiga paaga atoatoa.”⁸ Ua faia i tatou e fesoasoani le tasi i le isi. A tatou valaaulia ma talia le auai ai o o tatou taitoalua, e mafai ona tatou olioli i se tasi o faamanuiaga o le faaiipoipoga.

MATAUPU FAAVAE 3: PULEFAAMALUMALU MA LE AMIOTONU

I Fonotaga a le Au Perisitua

O le malamalama i le uiga sa’o o le *pulefaamalumu* e taua i le taitaiga o se fonotaga tauaogaina o le au perisitua. O i latou o e pulefaamalumu e “leoleo i luga o le ekalesia” (Alema 6:1) ma e nafa ma le faamautinoaina o loo faatinoina le lotogatasi, tutusa i le tofusao, ma isi mataupu faavae o le fefautuaai. Ua faamanatu mai foi e Elder Ballard ia i tatou o “i latou e umia le perisitua e le tatau lava ona faagaloina e leai sa latou aia e faaoga ai le pule o le perisitua e pei o se uatogi i luga o ulu o isi. . . . O le perisitua ua mo le auai atu, e le mo le faapologala; o le agalelei, e le o le fosi faamalosi; manatu alofa, e le o le pulea tutu. O i latou e manatu i se isi itu nai lo lena, ua galulue i latou i tua atu o tuaoi o le pule o le perisitua.”⁹

Ua faamanatu mai e Elder Ballard ia i tatou, o “i latou o e umia le perisitua e le tatau ona galoina i latou e leai sa latou aia tatau e faalala ai le pule o le perisitua e pei o se pate i luga o ulu o isi tagata.”

I le Aiga

O le tiute faapeteriaka o le tane o se tasi e pulefaamalumu i le aiga e le o le pule i isi ae ia mautinoa e manuia le faaiipoipoga ma le aiga. Sa faamalalama mai e Peresitene David O. McKay (1873–1970) e faapea, e i ai se aso o le a fai ai se faatalanoaga patino faaleperisitua o alii uma ma le Faaola: “Muamua, o le a Ia talosagaina se lipoti e tali atu ai e uiga i le lua mafutaga ma lau ava. Pe sa e taumafai malosi e faafiafia o ia ma mautinoa na taulimaina ona manaoga o se tagata soifua?”¹⁰

O le tane e tali atu i le tuputupu ae ma le fiafia o lana faaiipoipoga, ae o lenei tali atu e le faapea ua tuu atu ai ia te ia le pule i lana ava. O i laua uma e nafa ma le la faaiipoipoga. I fonotaga amiotonu o faaiipoipoga, e tau fai faasoa atu e le tane ma le ava se seti o uiga mama a faapea laua te faaogaina e fesoasoani la te taulai atu ai i le tasi ma le isi.

E mafai ona tatou suesue i nisi o nei uiga mama i le Mataupu Faavae ma Feagaiga 121:41: “E leai se mana po o se aafiaga e mafai pe tatau ona faatumauiina ona o le perisitua, nao i le faatauanau, i le tali-tiga, i le agamaualalo ma le agamalu, ma le alofa faamaoni.”



E le mafai ona tatou faaaogaina le perisitua e faamalosi ai le pule ma faatosinaga. O le mea lea, e le mafai ona tatou faaaogaina auala le amiotonu e faaali ai le pule malosi i faaiipoipoga. O le pule moni e pau lava le auala e oo mai ai o le tatou galulue faatasi i le amiotonu ma faapea ai ona agavaa mo faamanuiaga mai le Alii.

FAUSIAINA O SE FAAIPOIPOIGA E FAAVAVAU

O ulugalii e tauivi ma faaftauli o le puleaina po o feeseeseaiga i auala e taulima ai taimi, tupe, fanau, matua o taitoalua, po o se isi lava mea e tatau ona toe mafaufau e toe iloilo ia mataupu faavae autu na latou filifili e mulimuli ai i a latou faaiipoipoga. Mata e mafai ona latou faaleleia a latou faaiipoipoga e ala i le fatuina o se mamau lea e mafai ai ona latou filifili faatasi i le alofa faamaoni?

O mataupu faavae o le lotogatasi, auai, ma le pulefaamalumalu i le amiotonu e mafai ai ona tatou oo atu i se maliega talafeagai ma

o tatou taitoalua ma valaaulia ai le Agaga i totonu o o tatou olaga. O le faaaogaina o uiga mama o le alofa ma le agalelei o le a faamalu-luina ai le tele o finauga, e oo atu ai i le loloto o le faamalieina i faaiipoipoga, ma atiina ae ai se mafutaga e mafai ona tumau e oo atu i le faavavau. ■

FAAMATALAGA

1. M. Russell Ballard, *Counseling with Our Councils: Learning to Minister Together in the Church and in the Family* (1997), 18–19.
2. David A. Bednar, i le “Talanoaga Faavaega,” *Fonotaga o Aoaoga Faaleautaitai i le Lalolagi Atoa 2010*, lds.org/broadcasts/archive/worldwide-leadership-training/2010/11.
3. Tagai i le *Aoaoga a Peresitene o le Ekalesia: Spencer W. Kimball* (2006), 187.
4. M. Russell Ballard, “Aufono Faleaiga: O Se Talanoaga ma Elder ma Sister Ballard,” *Liahona*, Iuni 2003, 17.
5. *Gospel Truth: Discourses and Writings of George Q. Cannon*, sel. Jerreld L. Newquist (1957), 163.
6. M. Russell Ballard, “Aufono Faaleaiga,” *Liahona*, Iuni 2003, 14.
7. Tagai i le “Talanoaga Faavaega,” *Fonotaga o Aoaoga Faaleautaitai i le Lalolagi Atoa 2010*.
8. Howard W. Hunter, “Avea ma Tane ma Tamā Amiotonu,” *Liahona*, Ian. 1995, 61.
9. M. Russell Ballard, “Malosi i Fautuaga,” *Liahona*, Ian. 1994, 91.
10. David O. McKay, sii mai e Robert D. Hales, “Understandings of the Heart” (Brigham Young University devotional address, 15 Mat., 1988, 8), speeches.byu.edu.

I fonotaga o faaiipoipoga amiotonu, e taumafai uma ai le tane ma le ava—e ala i le faaaloalo, agalelei, ma le auai atoatoa—e fausia le mafutaga ma saili mo le lotogatasi.



O LE MAMALU MA LE FAATULAGAGA O LE Perisitua

Saunia e Perisitene Boyd K. Packer

Perisitene o le Korama a Aposetolo e Toasefululua



“O le pule ma le mana o le perisitua e fatu ai le faavae o mea uma tatou te faia i le Ekalesia,” o le saunoaga lea a Perisitene Boyd K. Packer, Perisitene o le Korama a Aposetolo e Toasefululua.¹ I le aluga o lana auaunaga i le silia ma le 40-tausaga o avea ma se sui o le Toasefululua, sa auiliili ai e Perisitene Packer lena faamatalaga, i se saunoaga umi e uiga i le perisitua—o lona taua, lona faaaogaina sa’o, ma ona ki. O fuaitau nei na ta’ua ai nisi o ana aoaoga autu e uiga i le perisitua, e aofia ai lana molimau o se Aposetolo a le Alii o Iesu Keriso.

O Ki o le Perisitua

I le 1976 sa faia ai se konafesi aoao faaleleria i Copenhagen, Tenimaka. Ina ua maea le sauniga faaiu, sa faapea ona manao ia Perisitene Spencer W. Kimball [1895–1985] e asiasi atu i Vor Frue Church, lea o loo tutu ai ia faatagata Thorvaldsen o le *Christus* ma le Au Aposetolo e Toasefululua. . . .

“I le pito i luma o le falelotu, i tua atu o le fatafaitaulaga, o loo tu ai se faatusa masani o le *Christus* ma Ona aao o loo aapa i luma ma e pei o loo faaloloa, o lima o loo faaalua ai faailoga o fao, ma le manua i Lona itu o loo iloa lelei atu lava. I ona itu o loo tutu ai faatusa o Aposetolo, o Peter e pito i luma i le taumatau ma isi Aposetolo i le faasologa.

“O le toatele lava o le matou vaega sa i ai latalata i le pito i tua o le falelotu faatasi ai ma le teufanua. Sa ma tutu faasasao ma Perisitene Kimball i luma o le faatusa o Peteru faapea ma

Elder Rex D. Pinegar ma Johan Helge Benthin, perisitene o le siteki a Copenhagen.

“I lima o Peteru, na faaalua i le maamora, ia se seti mamafa o ki. Sa tusi atu Perisitene Kimball i na ki ma faamalamalama mai lo latou faauigaina. Ona sosoo ai lea ma se faatinoga o le a le galo ia te a’u, sa faasaga atu o ia i a Perisitene Benthin ma se naunautai e le masani ai, ma tusi atu lona lima ia te ia ma faapea atu, ‘Ou te manao e te ta’u atu i tagata uma i Tenimaka, o a’u o loo umia ia ki! O loo tatou umia ia ki *moni*, ma tatou te faaaogaina i aso uma.’

“O le a le galo lava ia te au lena tautinoga, lena molimau mai se perofeta. O le faatosinaga sa malosi faaleagaga; ae o le lagona sa faaletino i lona aafiaga.

“Sa matou savavali atu i tua o le falelotu lea sa tutu uma ai le matou vaega. O le tusi atu i faatagata, sa saunoa atu ai Perisitene



E le o i ai i le perisitua le malosi e tatau ona i ai ma o le a le i ai seiiloga ua mausali le i ai o le mana o le perisitua i aiga.

Kimball i le teufanua agalelei, ‘O Au Aposetolo nei ua maliliu.’ Sa tusi mai lona lima ia te au, ma fai mai, ‘O Aposetolo soifua nei. O Elder Packer o se Aposetolo. O Elder Thomas S. Monson ma Elder L. Tom Perry o ni Aposetolo, ma o a’u o se Aposetolo. O i matou o Aposetolo soifua.

“E te faitau e uiga i le Au Fitugafulu i le Feagaiga Fou, ma o le toalua lenei o Fitugafulu soifua, o Elder Rex D. Pinegar ma Elder Robert D. Hales.’

“O le teufanua, o lē e oo mai i lena taimi sa leai ni ona lagona sa faaalua, ae na faafuasei lava ona maligi ona loimata.

“Sa ou lagonaina sa ou maua se aafiaga o le olaga atoa.”²

O Le Perisitua E Le Mavavaeeseina

“O le perisitua e sili atu nai lo o se isi o ona tofi. A maua e se tasi le Perisitua Arona po o le Mekisateko, e tuuina atu ia te ia e ala i le faaee o lima. A uma ona faaee atu le perisitua i ona luga, e faauuina o ia i se tofi i le perisitua. O tofi uma e maua mai o latou pule mai le perisitua.

“O le perisitua e le mavavaeeseina. E tutusa lava le tele o le perisitua e i ai i se toaina ma

se Aposetolo (tagai i le MF&F 20:38). A maua e se alii le perisitua, na te mauaina atoa lava. Ae peitai, e i ai tofi i totonu o le perisitua—vaevaega o le pule ma tiutetauave. E mafai e se tasi ona faaaoga lona perisitua e tusa ai ma aia tatau o le tofi ua faauuina pe ua vaetofia i ai o ia. . . .

“O ai lava e umia le Perisitua Mekisateko po o le perisitua maualuga atu ua umia uma foi le pule o le perisitua Arona po o le perisitua maualalo.”³

O Le Perisitua Sauniuni

“O le faamatalaga e faapea ua taua o le perisitua maualalo e le faapea e faaititia ai le taua o le Perisitua Arona. Na fetalai le Alii e manaomia i le Perisitua Mekisateko. (Tagai i le MF&F 84:20.) Soo se tasi e umia le perisitua maualuga e tatau ona lagona le fiafia tele e faataunuu sauniga o le Perisitua Arona, aua e taua tele faaleagaga.

“Ua ou tufaina le faamanatuaga a e o au o se tasi o le Korama a Aposetolo e Toasefulua. Ou te tau atu ia te outou, sa ou lagona le agaga faafetai ma le faamaualalo e le mafai ona faamatalaina e fai le mea e ono manatu i ai nisi o se galuega masani. . . .

“O aso anamua sa latou faamoemoe ma le fiafia i le togiola a Keriso e ala i le sauniga o le osigataulaga. Tatou te toe tepa i tua i lena lava mea e tasi na tupu e ala i le sauniga o le faamanatuga.

“O le osigataulaga na i ai muamua, ma le faamanatuga mulimuli ane, e totonugalemu ia Keriso, o le faamaligiina o Lona toto, ma le togiola sa Ia faia mo a tatou agasala. O aso na ma aso nei o le pule e faataunuu ai nei sauniga e a le Perisitua Arona lea.

“E moni lava o lenei tiutetauave o se tiutetauave paia ma e aofia ai oe i se faaleusoga ma na auauna anamua a le Alii. E leitioa a tatou lagona le faamaualalo tele pe a tatou auai i sauniga ua tofiaina i le Perisitua Arona. . . .

“O nai vaega toalaiti o outou o loo saofafai

mai nei iina o ni tiakono, aoao, ma ositau-laga, o le a i ai se aso e saofafai atu ai iinei o ni Aposetolo ma ni perofeta ma o le a pule-faamalumu i le Ekalesia. *E ao ona outou saunia.*

“O le mea lena e sa’o lelei ai lava le ta’ua o le Perisitua Arona o le perisitua sauniuni.”⁴

O Se Valaauina i Alii o loo Faamoemoe e Avea ma ni Faifeautalai

“O le tofi toeaina o se valaaua lea e mamalu ma paia, e i ai le pule ma le mana faaleagaga. O le upu ‘faamoemoe’ o lona uiga o loo tulimatai atu ma e mafai ona avea ma toeaina. O le taimi nei ou te tautala atu ia te i latou i le aso nei, ma le iloa atonu e toatele lava nisi o le a aoga i ai lena savali. . . .

“Afai o le a outou toe foi mai i le siosiomaga o loo tautalagia ai upumoni faaleagaga, o le a toe fetuleni mai i o outou mafaufau mea na outou manatu ua galo atu. O mea na le faaaogaina ma le faagaioioia o le a toe mapuna ae. O le a segia lo outou malosi faalemafaufau e malamalama ai i ia mea. . . .

“Afai o le a outou malaga mai ma faatasi ma le Au Paia, o le a vave ona outou toe malamalama i le gagana o musumusuga. Ma o le a sili atu ona vave ona outou iloa e foliga mai tou te lei o ese atu. Faauta i le matua taua tele o le iloa e outou, afai o le a outou toe foi mai, e mafai ona foliga tou te lei o ese atu lava. . . .

“O le a le pine ona outou faalogoina le atoatoa ma le sao i Lana ekalesia atoa ma Lona malo. Ona e iloa ai lea o le manaomia tele o oe iinei atoa ma le malosi o lou siufofoga ona o mea ua e iloa mo le togilaina o isi tagata.”⁵

Valaaua i le Perisitua

“O se valaaua e sili atu nai lo o se valaaulia po o se talosaga. O se valaaua mai le Alii e ala mai i Ana auauna filifilia. I tausaga ua mavae, a o avea Peresitene Spencer W. Kimball, ma peresitene o se siteki i Arisona, sa

i ai sona aafiaga i le tuuina atu o se valaaua. Sa i ai se avanoa i le au peresitene o le faalapotopotoga o Alii Talavou i le siteki. Sa tuua e Peresitene Kimball lana kesi i le faletupe, savalivali atu i le auala i se pisinisi e le mamao atu, ma faapea atu, ‘Siaki, e te mana’o e avea oe ma peresitene o Alii Talavou a le siteki?’

“Sa fai mai Siaki, ‘E, Spencer, e te le o faata-tau mai ia te au.’

“Sa fai atu o ia, ‘Toe o oe. O oe o se alii talavou, ma e te fiafia i tagata talavou. O le a avea oe ma se peresitene sili ona lelei.’

Ma o iina na tupu ai le mea sa mafaufau Peresitene Kimball sa o se talanoaga na sili ona le lelei ona sa teena e Siaki le valaaua. Sa toe alu atu o ia i le faletupe ma saofai i lana kesi, ma le le fiafia i lona toilalo. Ona oo atu lea ia te ia. Sa ia tuua lana kesi, savali atu i le auala—i le faitotoa lava e tasi, ma le tagata lava e tasi—sa valaau o ia i lona igoa atoa, ma faapea atu, ‘O le Aso Sa ua te’a sa fonu ai le au peresitene o le siteki e iloilo se avanoa i le au peresitene o Alii Talavou. Sa matou tatalo e uiga i ai. Mulimuli ane, sa matou o ifo i o matou tulivae ma fesili atu ma maua mai le musumusuga mai le Alii e tatau ona valaauina oe. I le avea ai ma se auauna a le Alii, ua ou iinei e tuuina atu lena valaau.’

“Na fai mai Siaki, ‘Ia, Spencer, pe afai o le itu lena ua e faupuina ai.’

“Ma sa ia fai atu, ‘O le itu lena ua ou faupuina ai.’”⁶

“E tatau i toeaina uma ona iloa o se valaaua e sili atu nai lo o se valaaulia po o se talosaga, e sili atu foi i lo o se tofiga. E masani ona tatou faalogo i faamatalaga e pei o le, ‘Ua talosagaina au e auauna o se fesoasoani i le au peresitene o le korama a le au toeaina.’ E sili atu ona talafeagai le faapea, ‘Ua valaauina au e auauna atu o se fesoasoani.’

“Tatou te le valaauina i tatou i tofi o le Ekalesia. Ae tatou te tali atu i le valaau a i latou o e pulefaamalumu ia i tatou. O le tiutetauave a i latou o e pulefaamalumu le

O le perisitua e le mavavaeeseina. E tutusa lava le tele o le perisitua e i ai i se toeaina ma se Aposetolo. A maua e se alii le perisitua, na te mauaina atoa lava. Ae peitai, e i ai tofi i totonu o le perisitua—vaevaega o le pule ma tiutetauave.

O le mana i le perisitua e oo mai e ala i le ola faatua-tua ma usiusitai i le faamamaluina o feagaiga. E faateleina i le faatinoina ma le faaaogaina o le perisitua i le amiotonu.

feutagai ma le agaga tatalo ma le Alii po o le a Lona finagalo e uiga i se tofiga i le Ekalesia. O le galueaiina foi lena o le mataupu faavae o faaaliga. Ona tuuina atu lea o le valaauga e le taitai pulefaamalumu o le o loo fai ma sui o le Alii.”⁷

O Le Taua o le Faauuina

“E faaeina atu le perisitua e ala i le faauuga, e le ala atu i le faia o se feagaiga po o le maua o se faamanuiaga. Ua faapena lava talu mai le amataga. E tusa lava po o a o latou manatu na maua mai se mea na faalogo o taua pe tusia foi, i le taimi ua tea po o le taimi nei, o se faauuga faapitoa lava i se tofiga i le perisitua o se ala lea, ma e na o le pau lena o le ala ua faaee mai ai pe o faaee mai ai nei.

“Ma ua faamanino mai e tasi paia na o le pau lava le faaeega sa’o o le perisitua e sau lea mai ‘se tasi ua i ai le pule, ma ua lauiloa i le ekalesia ua ia te ia le pule ma ua faauuina o ia i le ala e tatau ai e ao o le ekalesia’ [MF&F 42:11]. . . .

“Aua ne’i misia lena mea e tasi, faigofie, manino mautinoa: O le perisitua e faavavau lava ma le aunoa ona faaee atu e ala i le faauuga e mai se tasi o i ai le pule, ma e iloa e le Ekalesia o loo i ai ia te ia. Ma e tusa foi pe ua tuuina atu le perisitua, e leai se pule a se tagata e i tua atu o le mea e a le tofi faapitoa ua faauuina i ai se tagata. O na foi tuaoi e faatatau foi i se tofi e vaetofia i ai se tagata. O faauuga po o vaetofia e le faatagaina e leai se mea e ta’u atu ai, e leai se pule po o se mana o le perisitua.”⁸

O Le Mana o le Perisitua

“Ua lelei tele lo tatou tuuina atu o le *pule* o le perisitua. Ua toetoe o soo se mea ua i ai le pule o le perisitua. Ua i ai a tatou korama a le au toeaina ma faitaulaga sili i le lalolagi atoa. Ae peitai, o lo’u manatu, o le tuuina atu o le *pule* o le perisitua ua televave atu i

le tuuina atu o le *mana* o le perisitua. E le o i ai i le perisitua le malosi e tatau ona i ai ma o le a le i ai seiloga e mausali le i ai o le *mana* o le perisitua i totonu o aiga e pei ona tatau ai. . . .

“Ua ia i tatou le pule o le perisitua. I le mavae ai o mea uma ua tatou faamaopoopoina ma faatulagaina, ua oo nei i lo tatou tiute o le galueaiina o le *mana* o le perisitua i le Ekalesia. O le *pule* i le perisitua e oo mai e ala i le faauuina; o le *mana* i le perisitua e oo mai e ala i le ola faamaoni ma usiusitai i le faamamaluina o feagaiga. E faateleina e ala i le faatinoina ma le faaaogaina o le perisitua i le amiotonu.

“O lenei, tama e, ou te toe faamanatu atu ia te outou le natura paia o lou valaauga. Ua ia te oe le mana o le perisitua ua tuusao mai le Alii e puipui ai lou aiga. E i ai taimi o le a na o le pau lava le mea e tu atu o se talipupuni i le va o lou aiga ma faaososoga a le fili, o le mana lena. O le a e maua le taitaiga mai le Alii e ala i le meaalofo o le Agaga Paia.”⁹

“O le *mana* tou te maua lea e tusa ma mea tou te faia i lea meaalofo paia ma lē vaaia.

“Tou te maua le pule e ala mai i le faauuina o outou [i le perisitua]; a o le mana, tou te maua i le usiusitai ma le tauaogaina. . . .

“E maua le mana o le perisitua mai le faia o ou tiute i mea faigofie: auai i lotu, talia o tofiga, faitauina o tusitusiga paia, ma le tausia o le Upu o le Poto.”¹⁰

Auauna Moni a le Alii

“Tatou te le faalogo e faaaogaina e isi lotu Kerisiano ia ki o le perisitua. E foliga e ese lava le faamatalaina e nisi o i tatou e faapea o i tatou e le o ni tagata Kerisiano ae ua na o i tatou lava o loo i ai le pule ma le faatulagaga sa Ia faatulagaina.

“O le Toasefululua o loo i ai nei o ni tagata masani lava. E le o i latou, e pei foi o le uluai Toasefululua, o ni tagata iloga, ae a tuufaatasi o le Toasefululua e mamana.

“Matou te o mai mai ni galuega eseese. O i matou o saienitisi, loia, faiaoga.

“O Elder [Russell M.] Nelson o se fomai tipitipi ua leva o le fatu. . . .

“O nisi o i lenei Korama o ni alii o le militei—o se aliivaa, malini, pailate.

“Sa latou umia ni tulaga eseese i le Ekalesia: faiaoga o aiga, faiaoga, faifeautalai, peresitene o korama, epikopo, peresitene o siteki, peresitene o misiona, ma le mea e sili ona taua, o tane ma tama.

“O i latou uma o tagata aoga ma faiaoga o le talalelei a Iesu Keriso. O le mea ua tasi ai i matou o le alolofa i le Faaola ma le fanau a Lona Tama ma la matou molimau e faapea, o loo tu o Ia i le ulu o le Ekalesia.

“E pei lava o se tagata, o le Toasefululua e o mai mai amataga faatauvaa, e pei o taimi sa i ai o Ia iinei. O le Toasefululua soifua ua fusua faatasi i le galuega o le talalelei a Iesu Keriso. Ina ua oo mai le valaau, sa faataatiaese e i latou taitoatasi lana upega, i se faaupuga, ae mulimuli atu i le Alii.”¹¹

“Ou te faamaonia atu ia te outou o tamalii e 14 o e ua faauuina faatasi i matou o Aposetolo moni lava. I le lolafolaina atu o lenei mea, e le toe i ai se isi a’u faamatalaga nai lo mea ua aoaoina mai e le Alii, e le sili atu nai lo mea e mafai ona faaali mai i soo se tasi e saili atu ma se loto faamaoni ma le manatu tonu i ai mo se molimau patino a le Agaga.

“O nei tamalii o auauna moni a le Alii; ia usitai i a latou fautuaga.”¹²

O Se Molimau FaaAposetolo

“E tele ni tomai taua e le o ia te a’u. E tele naua ni mea o loo ou manaomia i au taumafaiga e auauna atu ai. E na o le tasi lava le mea, tasi le tomai taua e mafai ona faamatalaina ai. E pei o Peteru ma i latou uma o e na faauuina talu mai lena taimi, o loo ia te au lena molimau.

“Ou te iloa o le Atua o lo tatou Tama. Sa Ia faailoa mai Lona Alo, o Iesu Keriso, ia Iosefa



Samita. Ou te tautino atu ia te outou ou te iloa o Iesu o le Keriso. Ou te iloa o loo soifua o Ia. Sa soifua mai o ia i le vaeluaga o taimi. Sa Ia aoaoina mai Lana talalelei ma sa tofotofoina [o Ia]. Sa puapuagatia ma sa faasatauroina i le aso tolu. O Ia, e pei foi o Lona Tama, o loo i ai se tino o aano ma ivi. Sa Ia faia Lana Togiola. Ou te molimau atu ia te Ia. O loo avea au ma se molimau ia te Ia.”¹³ ■

FAAMATALAGA

1. “Auala e Tuuina Atu ai le Perisitua: O Le Aoaoga Faavae, le Mataupu Faavae, ma le Faiga Masani,” *Fonotaga o le Aoaoga Faaleautaitai i le Lalolagi Atoa*, 21 Iuni, 2003, 1.
2. “O Le Toasefululua,” *Liahona*, Me 2008, 85.
3. “What Every Elder Should Know—and Every Sister as Well: A Primer on Principles of Priesthood Government,” *Liahona*, Nov. 1994, 17; tagai foi i le *Ensign*, Fep. 1993, 8.
4. “O Le Perisitua Arona,” *Ensign*, Ian. 1982, 57–58.
5. “O Se Faatalosaga i e o loo Faamoemoe mo le Tofi Toeaina,” *Liahona*, Iuni 1977, 10, 11, 12.
6. “Auala e Tuuina Atu ai le Perisitua,” *Fonotaga o le Aoaoga Faaleautaitai i le Lalolagi Atoa*, 21 Iuni, 2003, 1–2.
7. “What Every Elder Should Know,” *Liahona*, Nov. 1994, 21–22.
8. “O Le Malumalu, o le Perisitua,” *Liahona*, Iulai 1993, 20, 21.
9. “O Le Mana o le Perisitua,” *Liahona*, Me 2010, 7, 9.
10. “O Le Perisitua Arona,” *Liahona*, Ian. 1982, 60, 62.
11. “O Le Toasefululua,” *Liahona*, Me 2008, 85–86.
12. “O Aposetolo e Toasefululua,” *Liahona*, Ian. 1997, 8.
13. “O Le Toasefululua,” *Liahona*, Me 2008, 87.

Tama e, ou te toe faamanatu atu ia te outou le natura paia o lou vala-auga. Ua ia te oe le mana o le perisitua ua tuusao mai le Alii e puipui ai lou aiga.

O Ou Tiute i le PERISITUA ARONA

Ua faauuina oe i le Perisitua Arona. O le a la lau mea e tatau ona fai nei?

Saunia e Paul VanDenBerghe

Mekasini a le Ekalesia

Atonu o oe o se tiakono fou lava, na faatoa faauuina i le Aso Sa ua mavae, po o se aoao e fesoasoani e tapena le faamanatuga i vaiaso taitasi. Pe o oe foi o se ositaulaga potomasani lelei, atamai i auala o galuega faatino ma le taitaiina o aoao laiti ifo ma tiakono i o latou tiutetauave fou. Ae ua i ai ia i latou uma ua umia le perisitua se valaau e tasi mai le Alii: “Ia tuu atu nei i tagata taitoatasi e aoao lona tiute ma galue i le tofi ua tofi i ai o ia i le filiga atoa” (MF&F 107:99).

Ae o fea e mafai ona e alu i ai e aoao ai e uiga i lenei tiute? O le nofoaga muamua lava e tatau ona vaai i ai o tusitusiga paia. Ae e faapitoa lava, o le a e manao e suesue i vaega o le Mataupu Faavae ma Feagaiga lea o loo faataatia mai ai tiute o le Perisitua Arona: vaega e 20:46–60, 72–79; ma le vaega e 84:111.

O le isi punaoa lelei lava o le tamaitusi *Faataunuina o Lo’u Tiute i le Atua: Mo e Umia le Perisitua Arona*. O lenei tamaitusi o loo vaevae atu ai ou tiutetauave o le perisitua i ni vaega se tolu: (1) “Faatautaia o Sauniga o le Perisitua,” (2) “Auauna Atu i Isi,” ma le (3) “Valaau Atu i Tagata Uma ia O

Mai ia Keriso.” I le vaega o “Tiute o le Perisitua” mo tofi taitasi—tiakono, aoao, ma ositaulaga—o le a e maua ai mau faaopoopo e suesue ma fautuaga mo le faia o la oe lava fuafuaga e fesoasoani e te malamalama atili ai i ou tiute o le perisitua.

Sei o tatou vaavaai mo sina taimi i nisi o tiute autu o e umia le Perisitua Arona.

Tiakono

O se tiakono na te faia se faataitiga lelei mo isi tagata o le korama ma isi tagata o le Ekalesia. E ola o ia i se olaga amiotonu ma tumau le agavaa e faaaoga le perisitua.

Na te tufaina le faamanatuga. O le tasi lenei o tiute e sili ona paia o se tiakono. A o faatino e se tiakono lona tiute, e fai o ia ma se sui o le Alii. E tatau ona agavaa o ia e tuuina atu faatusa o le faamanatuga i tagata o le Ekalesia. E tatau ona fai ona laei ma amio i se auala o le a atagia ai le natura paia o le faamanatuga. Afai e mafai, e tatau ona ofu sona ofutino paepae.

O se tiakono e aveva ma se faifeau tumau, “tofia e leoleo i luga o le ekalesia” (MF&F 84:111). E tatau foi

O le faauuina i le Perisitua Arona e aumai ai aia tatau faapitoa, tiutetauave, ma tiute. Ina ia aoao po o a nei mea, ia sue muamua i tusitusiga paia. O le isi punaoa lelei lava o le tamaitusi *Faataunuina o Lo’u Tiute i le Atua: Mo e Umia le Perisitua Arona*.





ona ia “lapatai, folafola, apoapoi, aoao ma valaau atu i tagata uma ia o mai ia Keriso” (MF&F 20:59). O lenei tiutetauave e aofia ai le faaaumeaina o tagata o le korama ma isi alii talavou, logoina o le au paia i fonotaga a le Ekalesia, faasoa atu le talalelei, ma tuuina atu le molimau.

E fesoasoani atu i le epikopo i le “faataunuuna . . . mea tau le tino” (MF&F 107:68). O lenei tiutetauave e ono aofia ai le aoina o le taulaga anapogi, tausia o e matitiva ma le tagolima, tausia o falelotu ma lotoa, ma le avea ma avefeau mo le epikopo i fonotaga a le Ekalesia.

E auai o ia i aoaoga a le korama e ala i le avea ma se tagata aoga malosi o le talalelei. O isi tiute e aofia ai le fesoasoani i le au paia ia maua o latou manaoga faaletino, sauniuni mo le, ma le tuuina atu o le auaunaga faafaifeautalai, lagolagoina ma le fesoasoani i peresitene o le korama, faaotagaina o alii talavou o le vaitausaga o le korama, ma le aoaoina o le talalelei.

Aoao

O se aoao e i ai tiutetauave uma o se tiakono. O ia foi e i ai tiutetauave nei:



TULAI MAI I LOU TULAGA MALUALII

Ua matou valaau atu ai ia te outou uso talavou maoae ina ia taumafai ma le filiga ia toe 'fanauina.' Tatalo mo lenei suiga tele i lou olaga. Suesue i tusitusiga paia. Ia sili atu le manao e iloa le Atua nai lo se isi lava mea ma ia avea e faapei o Lona Alo paia. Olioli i lou talavou ae ia 'tia'i [ese] mea a tamaiti':

"Ia taumamao mai talanoaga leaga ma le le aoga.

"Sola ese mai mea leaga uma.

"Aloese mai finauga.

"Salamo pe a manaomia.

"O le a fesoasoani lenei mea ia te oe e te tulai mai ai i lou tulaga malulalii faatamatane. O uiga lelei o le lototele, faatuatua, lotomauualo, faatuatua, ma le lelei o le a fai ma oe. O le a faaaloaloga oe e au uo, o le a viia oe e ou matua, o le a faalagolago atu uso o le perisitua ia te oe, ma o le a faamemelo tamaitai talavou ia te oe ma oo ina lelei atili i latou ona o oe. O le a faamamaluina oe e le Atua ma faamanuiaina au auaunaga faaleperisitua i le *mana mai luga*."

Epikopo Keith B. McMullin, Fesoasoani Lua i le Au Epikopo Pulefaamalumu, "O Le Mana o le Perisitua Arona," *Liahona*, Nov. 2011, 48–49.

Na te tapenaina le faamanatuga. O le tiutetauave o aoao le saunia i taimi uma o le faamanatuga mo le sauniga faamanatuga. O le tapenaina o le faamanatuga o se faataitaiga lelei lea o le faia o se auaunaga e aunoa ma le faamoemoe e viia ai i le faia o lena mea. E tele lava ina le iloa e le au paia o le au aoao e tapenaina le faamanatuga ae e faataunuuna lava le auaunaga, ma e fiafia ai le Alii aua o le auaunaga moni lena.

"O le tiute o le aoao o le leoleo lea i luga o le ekalesia e le aunoa, ma faatasi ma faamalosi i latou" (MF&F 20:53). O se tasi auala e fai ai lenei mea o le avea ma se faiaoga o aiga.

E tatau ona ia "vaai ia leai se amioletonu i totonu o le ekalesia, po o se faitagai ma le tasi, po o se pepelo, faatuaupua, po o se tautala leaga" (MFF 20:54). O lenei tiutetauave e aofia ai le avea ma se tagata e faatupuina le filemu e ala i le fesoasoani i le au paia ia fiafia le tasi i le isi. E tatau ona ia uunaia i latou e siomia o ia e vaai i taimi uma i itu lelei o isi tagata.

Na te "vaai ia potopoto soo faatasi le ekalesia, ma vaai foi ia fai e tagata uma o le ekalesia o latou tiute" (MF&F 20:55). O se vaega o lenei tiutetauave o le valaaulia lea o isi e o i le lotu.

Ositaulaga

O se ositaulaga e i ai tiutetauave uma o se tiakono ma se aoao. O ia foi e i ai tiutetauave nei:

E taitai o ia i le laulau o le faamanatuga. O le faamamaluga o le taulimaina o le faamanatuga e tuuina atu i ositaulaga, o e faia tatalo o



le faamanatuga. E tatau ona masani lelei se ositaulaga i tatalo o le faamanatuga, fai faalelei lavalava, ma fufulu ona lima a o lei faatinoina lenei sauniga. Ae maise lava, e tatau i ositaulaga ona agavaa e faatino lenei sauniga paia o ni sui o le Faaola.

O le isi tiute o ositaulaga o le faia lea o papatisoga pe a faatagaina ai e le epikopo po o le peresitene o le paranesi (tagai i le MF&F 20:46). O le papatisoina i le pule e tatau ai o se tasi lea o sauniga e sili ona taua ma paia i le Ekalesia, aua o le sauniga lea e avea ai i tatou ma tagata o le Ekalesia, faamagalaga ai a tatou agasala, ma ulu atu ai i le ala o le malo selesitila.

"O le tiute o le ositaulaga o le talai

atu, aoao atu, faamalamalama atu, [ma] apoapoai atu” (MF&F 20:46). O lona uiga o se ositaulaga e valaauina e aoao atu i isi le mataupu faavae o le talalelei. Ma ina ia mafai ona aoao atu mataupu faavae o le talalelei, ioe, e tatau ona ia aoaoina muamua na mataupu faavae. O lenei tiutetauave o le a avea ma se fesoasoani tele a o sauni o ia e auaua atu i se misiona talai.

E tatau ona ia “asiasi atu i fale o tagata taitoatasi o le ekalesia, ma apoapoai atu ia te i latou ia tatalo atu ma le leo ma i le mea lilo ma faasaga atu i tiute uma faaleaiga” (MF&F 20:47). E fai e se ositaulaga lenei mea a o ia faataunuaina lona tiute o le avea ma se faiaoga o aiga ma asi aiga na tofoti atu ia te ia.

O loo ia te ia le pule e tuuina atu ai le Perisitua Arona ma fauu ai isi ositaulaga, aoao, ma tiakono ae seiloga e faatagaina ai e le epikopo po o le peresitene o le paranesi (tagai i le MF&F 20:48). O le mana e tuu atu ai le Perisitua Arona e paia.

Tamaitai Talavou ma le Perisitua

E ui o le pule o le perisitua e na o alii agavaa o le Ekalesia e tuuina atu i ai, ae o faamanuiaga o le perisitua e maua e tagata uma—ma o nei faamanuiaga e tutusa lava mo alii ma tamaitai, teine ma tama, mauoa ma le mativa. Ua i ai i fanau uma a le Atua le faamanuiaga o le mauaina o na sauniga faaola o le perisitua.

I le avea ai ma afafine filifilia o le Atua, o tamaitai talavou uma o e ua papatisoina ua mauaina foi le meaalofa o le Agaga Paia. Ua ia i latou le aia tatau e saili ai ma ia

faamanuiaina i faamanuiaga faaleagaga, e pei o “le meaalofa o gagana, valaoaga, faaaliga, faaaliga vaaia, faamaloloina o ma’i, ma isi mea faapena” (Mataupu Faavae o le Faatuatua 1:7). A ola tamaitai talavou i ni olaga amiotonu ma taumafai e auaua atu i isi e ala i le mauaina ma le atiina ae o nei meaalofa o le Agaga, o le a avea a latou faataitaiga mo le lelei o se faatosinaga malosi i alii talavou e siomia i latou.

E mafai faapefea ona fesoasoani tamaitai talavou i alii talavou ia avea ma e agavaa e umia le perisitua? Sa tali se tasi o alii talavou: “Ou te manatu o mea tetele lava e lua latou te faia o le fai o lavalava tauagafau ma ia agalelei i tagata uma. O faia o lavalava tauagafau e fesoasoani e faatuuina ai ou mafauaoga mama, ma e mafai ona ou tilotilo atu ia i latou a o talanoa!”

O Le A Fesoasoani Le Tama Faalelagi Ia te Oe

A oo ina malamalama outou o tiakono, aoao, ma ositaulaga ma faataunuu o outou tiute o le perisitua, o le a outou oo i le olioli lea e sau mai le taulimaina o sauniga o le perisitua, mai le auaua atu i isi, ma mai le valaaulia o tagata uma e o mai ia Keriso. I la latou savali i e umia le Perisitua Arona, sa tusia ai e le Au Peresitene Sili: “Ua ia te oe le faatuatua ma le talitonuga tele o le Tama Faalelagi, ma ua i ai se misiona taua mo oe e te faataunuaina. O le a fesoasoani o Ia ia te oe pe a e liliu atu ia te Ia i le tatalo, faalogo logo mo uunaiga a le Agaga, usitai i poloaiga, ma tausii feagaiga ua e osia” (*Faataunuaina o Lo’u Tiute i le Atua* [2010], 5). ■



E ui o le pule o le perisitua e na o alii agavaa o le Ekalesia e tuuina atu i ai, ae o faamanuiaga o le perisitua e maua e tagata uma, alii ma tamaitai.

FAAMATALAGA ATILI I TIUTE O LE PERISITUA

Asiasi i le DutytoGod.Ids.org mo faamatalaga, vitio, ma tala e uiga i tiute o le perisitua ma le Tiute i le Atua.

ALU I LE OFISA O LE MISIONA!

O le taeo ina ua ou toe foi atu ai i le fale i Ghana mai la'u misiona i Ivory Coast, sa ou ala ai i le 6:00 i le taeao. O lo'u taimi faatulagaina e vaai ai le peresitene o le siteki mo lona faamaloloina o a'u na faatoa fai i le aoauli, o lea sa ou filifili ai loa e moe umi. A o ou moe, sa oo mai se manatu i lo'u mafaufau: "Alu i le ofisa o le misiona i Cape Coast." Sa ou iloa le ofisa o le Misiona i Ghana Cape Coast, ae sa ou matuai le iloa pe aisea na tatau ai ona ou alu iina i lena taeao.

Ina ua mavae le oo mai o nei mafaufauga, sa amata ona ou lagona le popole i nei lagona, o lea sa ou alu

ai loa i le ofisa o le misiona. A o ou alu sa ou popole po o le a sa'u tala e fai atu i le peresitene o le misiona. Sa ou iloa o le a fesili mai i le mafuaaga o lo'u oo atu, o lea sa ou taumafai ai e tapena se tali talafeagai.

Ina ua ou taunuu atu, sa ou le iloaina lava le tali. Sa valaaulia au e le peresitene o le misiona o Melvin B. Sabey, i totonu o lona ofisa, ma le manatu sa ou alu atu iina na te faamaloloina au. Ina ua uma ona fai mai ni nai fesili, sa fai mai Peresitene Sabey ou te alu i lo'u peresitene o le siteki e faamaloloina au.

"Ua ou iloa, Peresitene," o la'u tali lea.

Sa fesili mai le peresitene o le misiona i le fesili tonu lea sa ou taumafai e tali: "Aisea ua e sau ai iinei i lena taeao?"

Sa nofo o ia mo nai sekone ona fesili mai lea o le fesili tonu lea sa ou taumafai e tali: "Aisea ua e sau ai iinei i lena taeao, Elder Mobio?"

"Peresitene Sabey, e leai sa'u tali talafeagai i lena fesili," o la'u tala lea. "Ae o ananei i le taeao sa ou maua ai se lagona malosi ou te sau iinei."


Sa toe nofo o ia mo se taimi ma fai mai ia te au ma le malu, "Elder Mobio, o lou i ai iinei o le fesoasoani lea sa ou tatalo ai ananafi." Sa ia faamatala mai, na faatoa taunuu atu lava ona fesoasoani ma ni faifeautalai fou. O se tasi o i latou o se tagata Aivori, o le faifeautalai muamua lea e tautala faaFarani ua ia mauaina, ma na te le iloa pe faapefea ona ia talanoa atu ia te ia. Ona ia tautino mai lea, "Ua ou mautinoa na faafofoga le Tama Faalelagi i lo'u atugaluga i le po ananafi."

Na iu ina ou iloa le mafuaaga o le lagona na ou maua i le taeao. Sa vave ona ma faatasi atu i faifeautalai fou, ma sa ou faamatalaupu mo le alii faifeautalai Aivori a o amataina lana misiona.

O le fitu masina mulimuli ane, sa ou toe malaga atu ai i Ivory Coast e toe faafou lo'u tusifolau ma faasoa atu lena aafiaga matagofie i le peresitene o la'u misiona. Sa ia tau mai ia te au, "O i tatou o tufagaaao o le Alii. Na te silafia le auala ma le taimi e faaoga ai i tatou i Lana galuega."

Ou te iloa afai tatou te faatofu i tatou lava i le galuega matagofie a le Tama Faalelagi, e le tatau ona tatou popole. Ae tau lava o le tatou usitai i uunaiga a le leo, malu ma le itiiti ae tuu atu i le Alii e taitaia i tatou. ■

Felicien Dogbo Mobio, Ghana



SA OU FAALOGO I LE TAIMI LONA LUA

Sa ou faagalegale moe i le po a o lumanai se malaga, ae ou mauaina se lagona e faatau se uili fou ma se pa'u foi o le matou tamai veni ua 15-tausaga, lea sa aumai e aunoa ma se pa'u faaleoleo. Sa ou pisi i le aso na sosoo ai, ma galo ai ia te au le uunaiga. Sa matou utaina le taavale i le ma fanau e toatolu ma mea e faa-aoga ma o atu loa i le fale o lo'u tamā e fa itula le mamao ese.

A o matou malaga, sa faapea ona pa se pa'u o le veni. Sa toso le veni i se aai lata ane e sui ai le pa'u. Na faatoluina le tau nai lo le mea e i ai pe ana faatau se uili ma se pa'u i le matou nuu, ma ua alu le 90 minute i le faatalitali. Sa ou maua se agaga faafetai mo uunaiga a le Agaga ma ou filifili loa ia ou mulimuli lelei i ai i le lumanai.

I le fa tausaga mulimuli ane ma se isi toalua o le fanau, sa matou toe fuafua ai foi e asiasi atu i lo'u tamā, o lē ua 13 itula le mamao o le mea ua nofo ai nei. O le taimi lena ua ese le matou veni na i ai., o se veni ua 14 tausaga. Pe a ma se vaiaso ae matou te le'i o, sa ou lagonaina e tatau ona ou suia le pa'u faaleoleo o le veni. O le manatuaina o lo'u aafiaga muamua, sa ou mulimuli ai i le uunaiga. O ni nai aso mulimuli ane, sa ou maua ai se uunaiga e faatau ni faaū e faa-aoga i ni mea sa matou faa-aogaina ai muamua ni maea e faamaumau ai. E lua ni mea sa ou manaomia, ae sa ou faatauina mai ni mea se fa. Sa ou tuua le lua sa sili i le matou pusa o mea e faa-aoga mo ni mea e tutupu faafuasei.

O le matou foiga mai i le asiga o lo'u tamā, sa matou tutu ai e faatau se matou meaai o le afiafi. A o ou aveeseina mai nisi o aitema mai se

konetina i le tauluga o le veni, sa pipii atu lo'u afafine e tolu taulaga le matua i le faitotoa toso. Na pau i lalo o le palapala! Sa matou faafetai ona sa le lavea o ia i le faitotoa. Sa tusa ua 500 maila (805 km) lo matou mamao mai le fale i le po o se Aso Faraile, o lea sa ou faapipiina le faitotoa i lona tulaga ina ia mafai ona matou toe o, ae sa le taatia lelei i lona tulaga, o lea sa matou faalogoina ai le pao o le alu i le auala maualuga a o matou o. Sa ou toe afe i tua ma faa-aoga se tasi o faaū na sili e faamau ai le faitotoa.


O ni nai itula mulimuli ane, ae amata ona maluelue atoa le veni. Sa sau se patatu leotele mai le faitotoa

maluelue, ae sa mau lava le faaū. Sa afe i tua le veni ma iloa ai ua leai se fusi o le isi pa'u. Sa vave ona ou suia i le pa'u faaleoleo, lea sa ou faatauina mai i ni nai vaiaso na muamua atu, ma matou toe malaga loa.

Ou te faafetai mo uunaiga a le Agaga Paia, lea sa faasaogalemuina ai i matou i le taimi o a matou malaga. Ou te iloa e puipuia i tatou e le Tama Faalelagi pe a tatou faalogo i le "leo itiiti ma le filemu" (1 Tupu 19:12; tagai foi i le 1 Nifae 17:45; MF&F 85:6), Usitai i Ana uunaiga, ma ole atu mo le fesoa-soani i taimi tatou te manaomia ai. ■

Matthew D. Flitton,
Mekasini a le Ekalesia

***Sa amata ona maluelue atoa le veni.
Sa afe i tua le veni ma iloa ai ua leai
se fusi o le isi pa'u.***



SA OU TOTOINA NI FATU

I se vasega o amioga lelei faa-pisinisi mo la'u polokalama o le matuaofaiva i le Iunivesite o Schiller International i Heidelberg, Siamani, sa faatonuina ai tagata aoga taitasi e fai se tautalaga e 20-minute i le faaiuga o le semesa. Sa fai mai le polofesa pe mafai ona ou talanoa e uiga i amioga lelei mai se vaaiga a se Au Paia o Aso e Gata Ai.

Sa papatisoina au i le 18 o ou tausaga ma sa valaauina au e faia se misiona i Pasila i se tausaga mulimuli

ane. Talu mai lena taimi sa faaaauu lava ona ou faasoaina atu le talalelei i le toatele o tagata.


Sa ou iloaina o le a avea ma se luitau le talanoa o mataupu faalelotu i le siosiomaga o le iunivesite, ae sa ou taliaina le luitau. Sa ou filifili loa e tapena se aoaoga e aofia ai faamatalaga mai le Mormon.org.

O la'u iunivesite e i ai tagata aooga mai soo se mea o le lalolagi. O la'u vasega o le suesuega o amioga lelei e atagia ai lena eseese, i le i ai o

ni tagata aoga e toa 18 mai atunuu eseese.

Sa amataina tautalaga e uiga i amioga lelei i ni tagata aoga se toalua mai Initia ona sosoo ai lea ma se tagata aoga mai Myanmar. O a'u lava le tagata mulimuli. Sa ou talanoa e uiga i le "O Le Aiga: O Se Folafolaga i le Lalolagi," Mataupu Faavae o le Faatuatua, ma isi autu o le talalelei. Mo le toatele o tagata aooga, o le taimi muamua lea ua latou faalogo ai e uiga i le Ekalesia.

Ina ua uma la'u tautalaga, sa tu'i mai a'u i ituaiga o fesili eseese. O la'u tautalaga e 20-minute, sa iu ina tasi le itula.



NA FAAPEFEA ONA E ILOA E TATAU ONA E SAU?

Sa ou faaiuina i la'u molimau e uiga i le talalelei ma le taua o le faia o le mea sa'o e ui lava i luitau e siomia ai i tatou. O le mea mulimuli lava, sa ou tuuina atu ai i tagata uma se Tusi a Mamona i a latou lava gagana. Ina ua uma la'u tautalaga, sa tu'i mai a'u i ituaiga o fesili eseese. O la'u tautalaga e 20-minute, sa iu ina tasi le itula.

O le aso aoga na sosoo ai, sa fai mai sau uo mai Initia, sa faagaetia lava o ia i la'u tautalaga ma ua uma ona ia faitauina se vaega o le Tusi a Mamona. O lana uo foi, mai Initia, sa fesili mai mo sana kopi. Mulimuli ane, sa fai mai sau uo mai Myanmar sa fiafia o ia e faalogo e uiga i le Ekalesia, ae maise lava i aoaoga e uiga i aiga ma le tulafono o le legavia aua e talitonu o ia i na mataupu faavae. Sa folafola mai o le a faitau i le Tusi a Mamona.

Sa faafetai mai au uo mai Ghana i lo'u tauina atu ia i latou e uiga i le Toefuataiga, ma folafola mai o le a latou taumafai e o e matamata i le malumalu i Accra. Na fai mai la'u uo mai Laipiria, o la'u savali sa o se faamalosiua ia te ia ma tuuina atu ia te ia se faamoemoe mo le lumanai.

Sa ou fiafia ona sa faamautuina atu e le Agaga o le Alii la'u savali. Atonu e le o taimi uma tatou te vaaia ai le aafiaga o a tatou upu, ae ua ou iloa o la'u tautalaga i la'u vasega o le a fua mai i le lumanai. Ou te faamoemoe e i ai se aso o le a talia ai e nisi o tagata sa i ai i totonu o lena potuaoga le talalelei ma avea ma ni tufugaa o le Alii e faasalalau atu le savali o le Toefuataiga i atunuu, malo, gagana, ma tagata uma (tagai i le MF&F 133:37). ■

Abel Chaves, Siamani


I le 33 o o'u tausaga, sa maliu ai lo'u toalua ona o le kanesa o le faiai. Sa faafuasei ona avea au ma se matua nofofua e tausia toatasi se fanau e toatolu. Sa o se taimi luitauina o lo'u olaga, ae o le fautuaga a le Alii "o nei mea uma e te maua ai le poto masani, ma o le a avea mo ou lelei" (MF&F 122:7) na tuuina mai ia te au le lototele e agai ai pea i luma.

Mulimuli ane, sa ou toe faaipoipo ma siitia atu i se uarota fou, lea sa valaauina ai au e avea ma peresitene o le Aualofa. I se tasi aso, a o ou tapenaina lo'u fale, sa ou maua se uunaiga manino e asiasi atu i se uso e le toaga i le lotu, o le sa le'i leva ona maliu lana tane. Sa ou tuleieseina le mafaufauga, ma le manatu e i ai mea e manaomia ona ou faia i lena aso. Ou te matamuli e tau atu, sa faalua ona ou toe mauaina lena lava uunaiga ona faatoa ou faia lea.

Ina ua ou taunuu atu i le fale o le uso i lena afaia, sa pogisa. Sa ou faatagiina le logo o le faitotoa ma faatalitali. Sa ou tuituia leotele ma toe faatalitali pea.

E fetau lava lo'u liliu ou te aluese, ae ola loa le moli o le polotito, ma matala lemu mai le faitotoa. Sa falo mai ma le musua le ulu o le uso i le avanoa. O le a le galo lava ia te au lana fesili: "Na faapefea ona e iloa e tatau ona e sau?" Sa fai mai o ia, ua alu le aso atoa o tagi ma lagona ai e le mafai ona ola e aunoa ma lona toalua.

Sa ma talanoa mo le tele o itula i lena po. Ou te le manatuaina le tele o mea sa ma talanoa ai, ae ou te manatua lo'u tauina atu ia te ia, "Ou te iloa lelei lava le mea o loo feagai ma oe." Sa ou



E fetau lava lo'u liliu ou te aluese, ae ola loa le moli o le polotito, ma matala lemu mai le faitotoa. Sa falo mai le ulu o le uso i le avanoa.

faamautinoa atu ia te ia o le taimi o lana uo lea ma o le a puipuia o ia e le Alii. A o ma talanoa, sa ou matauina o le vaaiga atuatuva sa i ona foliga ua suia i foliga o le toafilemu.

I le faaiuga o le ma talanoaga, sa ou opoina o ia ma le lotoatoa. Sa ou matuai lagona le agaga faafetai ona sa uunaia au e asiasi atu ia te ia. Sa ou iloa sa faatagaina au e lo tatou Tama Faalelagi agalelei e fesoasoani ia te Ia e fesoasoani atu i lena uso lelei i ona taimi o puapuaga. ■

Sherrie H. Gillett, Iuta, ISA

Faapotopoto I SE Lotogatasi O LE FAATUATUA



O nofoaga autu mo le autalavou matutua e ofoina atu ai ni avanoa mo le aoaoina o le talalelei, gaoioiga faafiafia, galuega faa-faifeautalai, ma taumafaiga e toe faatoaaga mai ai.



Saunia e Stephanie J. Burns

O Barbara Matovu mai Uganda. Sam Basnet mai Nepal. Ma Elisabeth Olsen mai Nouei. O ni tagata eseese e toatolu, i atunuu eseese e toatolu. Ae o Barbara, Sam, ma Elisabeth na faapotopoto uma i se nofoaga e tasi, o le nofoaga autu mo le autalavou matutua i Oslo, Nouei, i lalo o le upumoni e tasi: o le talalelei toefuataiina a Iesu Keriso.

O le toatolu lenei sa auai i le Ekalesia i Olso, na mauaina lesonea a faifeautalai i le nofoaga autu mo le autalavou matutua. O fale e pei o le fale i Oslo ua faapaiaina e saunia ai se nofoaga e fegalegaleai ai i gaoioiga, aoao i vasega inisitituti, fiafia i le maua ai o komepiuta ma le Initoneti, suesue mo le aoga, ma faapena foi ona kuka ai taumafataga o le afiafi.

O Barbara sa siitia mai Uganda i Nouei i le 1998, a o iva ona tausaga. O le sefulu tausaga mulimuli ane, a o nofo ai i Oslo, sa valaaulia ai o ia e ni faifeautalai se toalua e aoao e uiga i le talalelei toefuataiina, ma tau atu ia te ia e mafai ona latou feiloai i le nofoaga autu mo le autalavou matutua. Sa matuai le talitonu ia Barbara.

“Sa ou faapea ifo ia te au lava, ‘Ia o se isi lava foi nofoaga mo le autalavou,’” na ia tau-tino ai. “E tele ni nofoaga faapena sa ou alu i ai muamua, ae o le mea moni ou te le’i lagonaina ai le lagoonalelei i se tasi o na nofoaga,”

Ae o le nofoaga autu lenei sa mautinoa lava le ese. “Sa matuai faateia lou mafaufau ina ua ou tuvae i totonu o le faitotoa,” na manatua ai e Barbara. “Sa ou tutulalai mo se taimi, ma taumafai ia ou iloa po o le a lea lagona na ou maua. Sa ou lagonaina le mafanafana ma le alofa. Sa ou lagonaina le mautinoa sa ou i ai i le nofoaga sa’o, ma tagata sa’o, mo le mafuaaga sa’o.”

Faapotopoto Atu i Nofoaga Autu mo le Autalavou Matutua

O le taulamua ina ia fausia ni nofoaga autu mo le autalavou matutua sa amatalia i le 2003. Sa faalatele atu nofoaga autu ia oo atu i inisitituti e ala i le ofoina atu o mea e tele nai lo na o vasega o aoaoga faalelotu; e maua ai foi e le autalavou nofoaga matutua ni avanoa e auaua atu ai i se aufono o gaoioiga a le nofoaga autu, galulue ma faifeautalai faamisiona e fesoasoani e aoao ma faamalosi i a latou tupulaga, ma fegalegaleai ai ma ulugalii matutua o e o loo faagaioioia le faatinoga atoa. O taitai perisitua i le lotoifale, i lalo o le taitaiga a Fitugafulu Eria, e iloiloina le faia o nofoaga autu i o latou lava eria.

O nofoaga autu muamua lava e 4 sa i Copenhagen, Tenimaka, ma i Perelini,



Luga, mai le pito i luga: Barbara Matovu, Sam Basnet, Elisabeth Olsen.



E mau e le autalavou matutua ni avanoa e auauna atu ai i se aefononoga gaoioiga a le nofoaga autu, galulue ma faifeautalai faamisiona e fesoasoani e aoao ma faamalosi o latou tupulaga, ma fegalegaleai ma ulugalii matutua.



Hamburg, ma Leipzig, Siamani. O na uluai nofoaga autu e 4 ua faateleina i le 141 i le 2011, i nofoaga eseese e pei o Suetena ma Cyprus. E tele isi nofoaga autu ua i ai i tulaga eseese o le atinaega i isi vaega o le lalolagi, e aofia ai le Iunaite Setete ma Aferika.

O Gerald ma Nancy Sorensen sa galulue i le nofoaga autu mo le autalavou matutua i Trondheim, Nouei. O iina sa la feiloai ai i talavou matutua mai atunuu eseese o le kelope, e aofia ai Afakanisitani, Saina, Ghana, Airani, Iraki, Mozambique, ma Netherlands, Nigeria, Rusia, Take, ma Iukureini.

“Sa tele ni gagana, aganuu, ma siosiomaga faaleaoaoga ma faalelotu,” o le faamatalaga lea a Brother Sorensen, “ae o nei tagata talavou matutua uma sa i ai se sootaga e tasi o le fia iloa atili e uiga i lo latou Tama Faalelagi ma Lona Alo, o Iesu Keriso. A o matou masani ia i latou ma o latou miti ma luitau patino, sa faigofie ona vaavaai atu ia i latou taitoatasi o se atalii/afafine o le Atua. Sa faigofie ona iloa sa tali le Atua ia latou tatalo ma taialaina o latou ala, ma faaalua Lona alofa tele mo i latou.”

E lagona e Peresitene Armand Johansen o le Misiona a Nouei Oslo, e taitaiina atu le autalavou matutua i le nofoaga autu mo se faamoemoega, e aofia ai le aoaoina faamasani mo tiutetauave i le lumanai, “O le Ekalesia i Nouei o le a faateleina pea le eseese,” o lana saunoaga lea. “E fesoasoani ia nofoaga autu i le autalavou matutua e iloa le ala e taulima ai lena mea, ia iloa le taua o le Ekalesia o le elemene masani e fesoatai ai aganuu ma tagata uma,” o le saunoaga lea a Peresitene Johansen, “Ou te vaai atu i nofoaga autu o ni sootaga maoae, nofoaga e te maua i ai le maualalo o pa pupuni o fegalegaleaiga ma le faailoga tagata.

O Le Tasi ia Keriso

E manatua e Barbara Matovu le taimi muamua na aumai ai o ia e faifeautalai i le nofoaga autu mo se gaoioiga e feiloai ai i isi talavou nofofua matutua. Sa faapea o ia ua ia iloina le mea o le a vaai ai.

“I lo’u olaga atoa, sa i ai lava se vaega sa



O uluai nofoaga autu e 4 mo le autalavou matutua ua faateleina i le 141, ma le tele ua fuafuaina mo isi vaega o le lalolagi.

ou auai,” o le tala lea a Barbara. “Ma o vaega sa faailogaina i taimi uma i se mea—o oe o le vaega e fiafia e taaalo po o le vaega mai atunuu i fafo, po o nisi lava vaega. O lea, ina ua amata ona gasolosolo mai tagata i le nofoaga autu, sa ese lava ona sa foliga mai sa leai se tasi na i ai se uiga e faapea ‘O a’u ou te i ai i le vaega lauiloa, e le mafai la ona ou talanoa atu ia te oe.’

“O le taimi muamua, sa ou faapea, ‘Pe o faafoliga ea le vaega lea? Pe o se faaaliga?’ Ae ina ua mavae sina taimi, sa ou iloaina ai o le mea moni e le afaina po o ai oe, po o fea e te sau ai, pe o le a le gagana tatou te tautatala ai. O le alofa o lo tatou Tama Faalelagi e mo tagata uma. E masani lava ona tau umi se taimi e sue ai la’u vaega, ae o le taimi lenei, sa ou lagonaina lo’u le manaomia o se vaega. O a’u lava o Barbara, ma o a’u lava o Barbara i tagata uma.”

Fai mai Elisabeth Olsen e lagona lona faamaulalo i le vaaia o lona nofoaga i lona aiga faalelagi. “A e feiloai i tagata e mai se aganuu po o se faalapotopotoga ese, e faigofie lava ona faailoga i latou. Ua ou aoao e vaai faalelei ou mata ma vaai atu i tagata e ala i fofoga o Keriso,” o lana tala lea. “I le nofoaga autu e tofu i matou uma ma aganuu eseese, ae e tasi le mea ua laugatasia ai i matou uma: matou te mananao e toe faatasi ma Iesu Keiso ma le Atua.”

Avea ma e Tasi ae Le Tutusa

Atonu ua masalo nisi i le manatu e uiga i le lotogatasi aua latou te manatu e ao ona oo mai i le tau o le ositaulagaina o le olaga o le tagata lava ia. “E toatele tagata e fefefe i mea tau lotu, ona latou te manatu e tutusa uma ai i tatou, aua e tutusa lava poloaiga tatou te ola ai,” o le tala lea a Elisabeth. “Peitai e le faapena. Na fai i tatou e le Atua o ni tagata taitoatasi. E mafai ona tutusa o tatou talitonuga, ae eseese o tatou amioga ma meaalofo, ma o le mea lena e aveai ai i tatou ma ni tagata taitoatasi. E finagalo le Atua ia tatou eseese uma lava aua e eseese uma foi a tatou misiona.”

Sa taulimaina foi e Sam Basnet ni atugaluga mai ni uo o e sa talitonu o tulafono faalelotu o ni taofiofiga. “Sa fai mai se tasi o uo ia te au, ‘Afai e te alu i le Lotu, e tatau ona e mulimuli i tulafono a isi,’” o lana tala mai lea. Ae e mulimuli Sam i tulaga faatonuina a le Ekalesia aua ua ia sailia ma le agaga tatalo ia faaaliga faaletagata lava ia e faamautuina ai ana mea e fai.

Ma e ala mai i le talanoa taitoatasi mai i Lana fanau, e faapena ona tasi ai le Atua ma i latou, o le faamalamalama mai lea a Sam. “Na fetalai le Atua o atunuu uma ma gagana uma o le a tapuai ia te Ia” (tagai i le Mosaea 27:31), o lana tala lea. “O le feiloai i tagata eseese, ua ou iloa ai ona talisapaia aganuu eseese. Ae o le iloaina o lena eseese ou te lagona ai foi, ioe, o loo i ai i le Atua se fuafuaga sili e faatasia ai i tatou i le filemu.”

Taunuu atu i le Nofoaga Sili e Faapotopoto Ai

E ui lava ina talisapaia e nei talavou matutua le mana o le faapotopoto atu i se nofoaga autu mo le autalavou matutua, ua malamalama nei taitai o le lumanai o le Ekalesia, ua na o le amataga lea. E pei ona aoao mai Elder David A. Bednar o le Korama a Aposetolo e Toasefululua, o le tasi o nofoaga e sili ona taua e faapotopoto ai o le malumalu.¹

Ua sauni Sam e ulu atu i le maota o le Alii e ala i le siomia o ia lava i uo lelei i le nofoaga autu. “O le faamasani atu i tagata mai le tele o atunuu eseese, ua fesoasoani ia te au e maua ai lagona lelei e uiga i le lalolagi,” o lana tala lea.



MALOSIAGA I LE ILOA O I TATOU UMA O FANAU A LE ATUA

“E i ai le malosiaga e ui lava i o tatou lava eseese. Ae o loo i ai se malosiaga sili atu i le poloaiga ua tuuina mai e le Atua ia i tatou taitoatasi e galulue mo le siitaina ma le faamanuiaina o Ona atalii ma afafine uma, e tusa lava po o a o latou atunuu po o mea e o mai moni ai po o isi eseese.”

Peresitene Gordon B. Hinckley (1910–2008), *Teachings of Gordon B. Hinckley* (1997), 664.

“Ou te fia avea ma se faataitaiga lelei i a’u uo, ma o lenei mea ua ou saunia atili ai mo le Atua ma saunia atili ai e ulu atu i Lona malumalu.”

E tasi le masina talu ona uma ona papatiso, ae amata ona mafaufau Barbara e uiga i le auai atu i le malumalu a o i ai o ia i se lesona o le afiafi faaleaiga i le nofoaga autu. Ina ua uma le lesona, sa amata ona ia tuufesilisili.

“O le i ai o ni uo e malamalama i le uiga o le malumalu ia i latou sa fesoasoani ou te malamalama ai i le uiga o le malumalu mo a’u. A o latou faamalalama mai ia te au e uiga i le malumalu, sa ou lagona le Agaga Paia,” o le faamatalaga lea a Barbara. “Sa ou iloaina o nofoaga uma sa ou mafaufau ou te faaipoipo ai—o se falesa manaia po o se matafaga—e le mafai ona faatusalia i le malumalu. Mai lava i lona taimi, sa le toe avea ai le malumalu ma na o se isi lava fale. O se mea sa ou manao e tepa taulai i ai ma o se nofoaga e i ai se aso ou te ulu i ai ma so’u toalua i le lumanai.”

Ua faaafia foi e Elisabeth le malumalu ma se tasi o ana sini e sili ona taua. “Soo se taimi lava e mafai ona ou malaga atu ai i se malumalu, ou te ataata e pei lava ua ou manumalo i se miliona talā,” o lana tala lea. “Ou te iloa e finagalo le Atua ia o atu tagata uma iina ma maua faamanuiaga uma ma meaaloa ua Ia teuina mo i tatou. O le alu i le malumalu ma le agavaa mo le malumalu o le manuia moni lea. E mafai ona ou ulu atu i le malumalu ma avea ma se e sili ona latalata atu i le Atua—ma se e sili ona latalata atu i le aiga—i le mafai ona ou faia ai i lenei lalolagi.”

O le malo selesitila o le, e mautinoa lava, o le nofoaga sili lea e faapotopoto ai, o le nofoaga e le manao Barbara e i ai se nofoa e avanoa. “Na fetalai Keriso e na o Ia lava e mafai ona tatou o atu ai i le Tama Faalelagi, ae ua Ia fetalai mai foi, o le tasi o mea e sili ona tele e mafai ona tatou faia i lenei olaga o le auauna o le tasi i le isi [tagai i le Ioane 21:15–17]. Ma o le auauna atu o le tasi i le isi o le fesoasoani lea i se tagata e sau i le aiga i le Tama Faalelagi, aua e te le manao e te alu na o oe.” ■

FAAMATALAGA

1. Tagai David A. Bednar, “Taofia ma le Mamalu o se Igoa ma Tulaga,” *Liahona*, Me 2009, 97.

FAAPOTOPOTOINA I LE KELOPE ATOA

O nofoaga autu mo le autalavou matutua a le Ekalesia ua faatulagaina i lalo o le taitaiga a le pule o le perisitua, e masani lava i le tulaga o le Fitugafulu Eria. E oo mai i le 2011, ua i ai nofoaga autu i atunuu e 3 o Aferika, 28 atunuu i Europa, 7 setete o le Lunaite Setete, ma le Ripapelika Tominika. Mo nisi faamatalaga, susū atu i lou epikopo po o le perisitene o le paranesi.



Aferika	Egelani	Sikotilani
Aferika i Saute	Eleni	Silovenia
Ripapelika Tominika o Congo	Farani	Suetena
Zimbabwe	Finelani	Suitiselani
	Hanikeri	Tenimaka
	Iselani	Uelese
Amerika Tutotonu	Italia	
Ripapelika Tominika	Molokova	Lunaite Setete
	Netherlands	Arisona
Europa	Nouei	Georgia
Aialani	Peleseuma	Initiana
Alepania	Polani	Kalefonia
Auseteria	Potukale	Luisseana
Cape Verde	Romania	Niu Mekisiko
Cyprus	Sepania	Uisikonesini
Czech Republic	Siamani	

“O nisi taimi ou te lagona ai le lofituina pe a ou mafaufau atu i mea uma e manaomia ona ou faia e ola ai i le talalelei. O fea ou te amata atu ai?”

Ole olaga e mafai ona lofituina pe a e taumafai e soona fai ni mea se tele i le taimi e tasi. Mo se faataitaiga, afai e te taumafai e alu i le seminare, aoga, galuega, ma le malumalu, ma le Mutuale i le aso e tasi, o le a lagona le lofituina. Ae afai e te faamuamuaina gaioioiga o le talalelei ona fuafua lea o le taimi mo na mea, o le a alualu i luma. O gaioioiga o le talalelei e pei o le seminare, tatalo, ma le Tiute i le Atua po o le Alualu i Luma o le Tagata Lava Ia, o nisi ia o mea e sili ona taua e mafai ona e faia o se tagata talavou. Ioe, e manaomia ai ni taimi faapoopo, ae o le a faamanuiaina oe mo ositaulaga uma e te faia e te usiusitai ai.

Ina ia iloa ona fuafua le taimi o nei gaioioiga, ia saili musumusuga e ala i le tatalo ma e ala i le mafaufau pe faapefea ona e faaaluina lou taimi. O le Aso Sa o se aso lelei lea e fuafua ai gaioioiga o le talalelei ma isi gaioioiga taua mo le vaiaso. O le a aoga foi le talanoaina o lenei fesili ma ou matua ma taitai o le Ekalesia.

A e mafaufau i mea uma e manaomia ona e faia, ia manatua o vasega, polokalama ma gaioioiga a le Ekalesia e musuia—o le a fesoasoani e faamalosi ai lau molimau, tausi poloaiga, ma sauni ai e fai se misiona ma faaipoipo i le malumalu.

A o e taumafai e faamaoni i le talalelei, o le a “saunia [e le Alii] se auala” (1 Nifae 3:7) e fesoasoani e te tausia ai Ana poloaiga, e tusa lava pe e te lagonaina le lofituina. O le tausia o poloaiga o le a valaaulia ai le Agaga i lou olaga. Ma o le lagonaina o le Agaga o le a e iloa ai o loo e i ai lava i le ala sa’o faaleagaga.

Fai Mea Laiti ma Faatauva



E le o taumafai le Alii ina ia tatou atoatoa i mea uma lava i le taimi lenei, ae e finagalo o Ia ia tatou faia ni mea se tele e mafai ona tatou faia. Afai o le uiga o lenei mea o le amata mai i mea autu e pei o le suesueina o tusitusiga paia ma tatalo i aso uma, o le a fiafia o Ia i a tatou taumafaiga. A o tatou naunau e ola i le talalelei ma fai mea laiti ma faatau-

vaa e manaomia mai ia i tatou, o mea uma e foliga mai e lofituina e fetalai mai o Ia tatou te faia, o le a le toe avea ma mea e lofituina tele.

Hunter D., 17 tausaga, Tennessee, ISA

Ola i le Talalelei ma Lou Aiga



E taua tele le ola i le talalelei faatasi ma lou aiga. E mafai ona tatou amata ola ai ma i latou e ala i tatalo faaleaiga, suesueina faaleaiga o tusitusiga paia, afiafi faaleaiga, ma le faia o talafaasolopito faaleaiga. O nei mataupu faavae autu o ni fesoasoaniga tele e malamalama loloto ai i le mea e mafai ona faia e le talalelei a Iesu Keriso i o tatou olaga.

Cherry O., 19 tausaga, Davao, Filipaina

Fai le Mea Sili E te Mafaia



Ua ou aoaoina a e taumafai e fai mea uma, o le a faapea ona e lagona ai le atuatuva. Ae afai e te taumafai e fai le mea sili e te mafaia i aso taitasi, o le a e manuia lava. Afai e te faa-

logo i le Agaga Paia ma faalatalata i le Alii e ala i le tatalo ma le suesue i tusitusiga paia, o le a fetui lelei lava mea uma ma e le umi ae avea oe ma le tagata ua faamoemoe le Alii e avea ai oe. Sa ou taumafai ia ou latalata i le atoatoa ma sa ou popole i le avea o au ma se tagata e le lava lo’u lelei, ae e le o le mea lena e finagalo i ai le Alii. O le lagonaina o le le atoatoa ma le faanoanoa ona o oe lava e lē a le Alii lea. O lea tau lava o le avatu ia te Ia o le mea sili e te mafaia, ma o le a e maua ai le toafilemu ma le olioli i lou olaga.

Zandi C., 16 tausaga, Wyoming, ISA

Saili atu i le Fesoasoani a le Alii

Faitau tusitusiga paia ma tatalo i aso uma. Ia saili e le aunoa e faalogo i le Agaga Paia. O le a fesoasoani le Tama Faalelagi ia te oe e ola i le talalelei. Ia saili mo Lana fesoasoani i taimi uma. Ia ole atu mo Lana taitaiga ina ia mafai ona e faia mea ua Ia faamoe-moe e te faia. O filifiliga sa’o taitasi e te faia, o le a e lagona ai le faatasi mai o le Agaga. O lena mea o le a faapea ona e manao atili ai e fai filifiliga sa’o.

Thais S., 15 tausaga, Rio Grande do Sul, Pasila

Faalagolago i le Alii



Ua iinei le talalelei e fesoasoani ia i tatou, ae le o le faapopoleina o i tatou. Afai tatou te faalagolago i le Alii, ona mafai lea ona tatou

faatuatuaina Lana talalelei. Afai e ia te oe le faatuatua, o le ola i le talalelei o le a le toe lofituina aua ua e malamalama i le pogai e te ola ai [i le talalelei].

Charlotte R., 14 tausaga, Iuta, ISA

Tepa Taulai i le Galuega ua i Ou Lima



Aua le mafaufau i mea uma e manaomia ona e faia i lou olaga atoa, mafaufau i mea e manaomia ona fai i le taimi nei. Ia fai le mea

sili e te mafaia, ae o le Tama Faalelagi o le a faaausiaina. Mo se faataitaiga, a o ou sauni e aoao atu se lesona o le seminare e uiga ia Peresitene Thomas S. Monson, sa ou mafaufau pe o le a faapefea ona ou faatumauina


ni tamaiti se toafitu (o i latou uma e matutua atu ia te au) ia faalogo, aoao, ma fiafia [i le lesona]. Sa ou filifili e taumafai ia faateleina lo latou auai, i se mafai ou te mafaia. Sa manaia lava le faaiuga! O lea tau lava o le fai o le mea sili e te mafaia i le galuega ua i ou luma.

Bethany F., 15 tausaga, Kentucky, ISA

Faasolosolo Malie le Alualu i Luma

Ua fetalai mai le Alii, o le a Ia tuuina mai ia i tatou aoaoga faavae o “lea fuaitau i luga o lea fuaitau, ma lea mataupu i luga o lea mataupu, o sina mea itiiti i i ma sina mea itiiti i o” (2 Nifae 28:30). E le mafai ona tatou faamoemoe tatou te malamalama uma i le talalelei i le taimi e tasi, ae a tatou amata mai i mea autu—alofa, faatuatua, ma le faamoemoe—ma a o tatou suesue i tusitusiga paia, faaoga i aso uma, ma tatalo e le aunoa, o le a faasolosolo malie lava lo tatou alualu i luma ma iloa ai ua tatou latalata atili atu ia Keriso.

Riley C., 16 tausaga, Iuta, ISA



AMATA I MEA FAIGOFIE

“E faaaluina e tagata vane faatagata ma tagata tusi ata maoae le anoano o itula e faaleleia ai a latou taleni. Latou te le

siiina ae se tofi po se pulumu ma ni vali eseese, ma le faamoemoe o le a atoatoa le galuega i le taimi lena. Ua latou malamalama o le a tele ni mea sese latou te faia a o latou aoao, ae latou te amata atu i mea faigofie, i mea autu muamua.

“E faapena foi ia i tatou.

“E avea i tatou ma matai tufuga o o tatou olaga i lea lava ala e tasi—e ala i le taulai atu muamua i mea e aupito sili ona taua. Ua tofu i tatou uma ma ni nai manatu lelei o filifiliga e aupito sili ona taua e tatau ona tatou faia—o filifiliga o le a faapea ona faaleleia ai o tatou olaga ma aumaia ia i tatou le olioli ma le filemu sili atu. O iina e tatau ona tatou amata ai. O iina e tatau ona tuu i ai a tatou taumafaiga sili.”

Elder Joseph B. Wirthlin (1917–2008) o le Korama a Aposetolo e Toasefululua, “O Filifiliga E Tolu,” *Liahona*, Nov. 2003, 80.

O LE ISI FESILI

“O lo’u tuagane e i ai lona faafitauli i ponokalafi. O loo la galulue i ai ma le matou epikopo, o lea ou te manao ai e lagolago atu ia te ia, ae ua aafia ai lo’u faatuatuaina o ia. E faapefea ona ou taulimaina lenei mea?”

Auina mai lau tali a o lei oo i le aso 15 o Iulai, 2012, i le liahona.lds.org, i le i-meli i le liahona@ldschurch.org, pe meli mai i le:

Liahona, Questions & Answers 7/12
50 E. North Temple St., Rm.2420
Salt Lake City, UT 84150-0024, USA

E ono faapupuaina tali mo le uumi po o le manino.

O le faamatalaga ma le faatagaga o loo i lalo e tatau ona aafia mai ai: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e i lalo ifo o le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.



**Saunia e Elder
Neil L. Andersen**

O Le Korama a Aposetolo
e Toasefululua

Ua Lava Mea Ua E Iloa

O lo tatou liua e oo mai i lea laasaga ma lea laasaga, i lea mataupu ma lea mataupu. E muamua ona tatou fausia se faavae o le faatuatua i le Alii o Iesu Keriso.

Ua silia ma le 40 tausaga talu ai, a o ou mafaufau i le luitau o se misiona, na ou lagona lava lou matuai le agavaa ma le le saunia. Ou te manatua na ou tatalo, “Le Tama Faalelagi e, e mafai faapefea ona ou faia se misiona ae e matua itiiti se mea ua ou iloa?” Na ou talitonu i le Ekalesia, ae na ou lagonaina na matuai le lava lou malamalama faaleagaga. A o ou tatalo, na oo mai se lagona: “E te le iloaina mea uma, ae ua lava mea ua e iloa!” O lena faamautinoaga na ou maua ai le lototele e fai le isi laasaga e agai atu i le misiona.

O la tatou malaga faaleagaga o se faagasologa o le olaga atoa. Tatou te le iloa mea uma i le amataga pe o le aluga foi o le olaga. O lo tatou liua e oo mai i lea laasaga ma lea laasaga, i lea mataupu ma lea mataupu. E muamua ona tatou fausia se faavae o le faatuatua i le Alii o Iesu Keriso. Tatou te faatauaina mataupu faavae ma sauniga o le salamo, papatisoga, ma le mauaina o le meaalofa o le Agaga Paia. Tatou te faaofiaina ai se tautinoga faifai pea o le tatalo, o se naunau ina ia usiusitai, ma se molimau faifai pea o le Tusi a Mamona.

Ona tatou tumau ai lea ma le mausali ma le onosai a o tatou faagasolo i le olaga faaletino. E i ai taimi, e oo mai ai le tali a le Alii, “E te le iloa mea uma, ae ua lava mea ua e iloa”—ua lava e tausi ai poloaiga ma fai ai le mea sao.

Manatua i upu a Nifae: “Ua ou iloa e alofa o Ia i ana fanau; a e ui i lea, ou te le iloa le uiga o mea uma” (1 Nifae 11:17).

E tofu i tatou taitoatasi ma taimi o le mana faaleagaga, o taimi o musumusuga ma faaaliga. E tatau ona tatou faagotoina ifo i o tatou agaga. A o tatou faia, ua tatou saunia ai o tatou faleteuoloo faaleagaga mo taimi o faigata faaletagata lava ia. Na fetalai Iesu, “Tuu lenei mea i o outou loto, ina ia outou faia mea o le a ou aoao atu, ma poloaiina ai outou” (Faaliliuga Iosefa Samita, Luka 14:28 [i le Luka 14:27, vaefaamatalaga e]).

O ni nai tausaga ua mavae na maliu ai se afafine talavou o sa’u uo i se faalavelave matuia lava. Na nutimomoia faamoemoega ma moomooga. Na lagona e la’u uo se faanoanoa le magafatia. Na amata ona ia fesiligia mea na aoaoina ai o ia. Na tusi mai e le tina o lau uo se tusi ia te au ma talosagaina pe mafai ona ou tuuina atu ia te ia se faamanuiaga. A o tuu ou lima i luga o lona ulu, o le uunaiga na oo mai ia te au o le: O le faatuatua e le gata o se lagona; ae o se filifiliga. E moomia ona ia filifilia le faatuatua.

Sa lei iloa e la’u uo mea uma, ae na lava mea na ia iloaina. Na ia filifilia le ala o le faatuatua ma le usiusitai. Na alu ifo o ia i ona tulivae. Na toe foi mai ia te ia lona tulaga paleni faaleagaga.



O ni nai tausaga talu ona mavae le faamanuiaga o lau uo, na ou maua ai se tusi mai lona atalii o loo auuana nei faamisiona. Na tumu i tautinoga ma molimau. A o ou faitauina leni tusi matagofie, na ou vaaia ai le faamanuiaina tele o le augatupulaga na sosoo ai i le filifilia e se tama o le faatuatua i se taimi na sili ona faigata.


O luitau, faigata, fesili, ma masalosologa—o vaega nei o lo tatou olaga i le tino. Ae e le o tuulafoaiina i tatou. I le avea ai ma soo o le Alii o Iesu Keriso, ua i ai ni a tatou faatanoa tetele faaleagaga o le malamalama ma le upumoni ua faaavanoaina mo i tatou. E le mafai ona o mai faatasi le matau ma le faatuatua i le taimi lava e tasi i totonu o o tatou loto. Na fetalai Iesu, “Aua e te mata’u, tau lava ina e faatuatua” (Mareko 5:36).

O le aluga o tausaga tatou te laasia faafia ai nei laasaga taua faaleagaga. E amata ona tatou iloa ai “o le talia foi le malamalama, ma tumau pea i le Atua, e faateleina atu i ai le malamalama, ma e tuputupu pea le pupula o lea malamalama seia oo mai le aso atoatoa ona lelei” (MF&F 50:24). E taliina a tatou fesili ma masalosologa pe tuuitiitia foi le faapopoleina ia i tatou. O o tatou faatuatua e faatauvaa ma mama. Tatou te iloa ai mea ua uma ona tatou iloa. ■

Mai se lauga na tuuina atu i le konafesi aoao o Oketopa 2008.

*Pe e te tuua se avanoa e tuli-
tulimatagau ai lau sini ua
leva ona e moemiti i ai ina
ia e faia se misiona?*

Saunia e Elyse Alexandria Holmes



Malolo mo se MISIONA

O le sisina ifo o le afu i ona foliga, sa mataituina ai e le alii lauiloa i Ausetalia i le lakapi o Viliamu Hopoate le polo. O lana au, o le Blues, e fai ma sui o Niu Saute Uelese, o loo fetau ma le latou fili, o le Maroons mai Kuiniselani, i le tauvaga e sili ona taua o le tausaga. Ina ua uma le 20 minute muamua, sa i tua le au a Uili ma e tatau ona vave le latou tulituli atu. E tele mea e tatau ona faamaonia e Uili aua o lana tauvaga muamua lenei i le au. O ia foi o le tagata taalo aupito laitiiti o lana au ma o le tagata lona lua e sili ona laitiiti ua taalo i le taamilosaga o le State of Origin [Setete o le Afuaga].

Sa tilotilo atu Uili a o pasi atu le polo i lana au ona togi mai lea ia te ia. Sa puna o ia i luga e pue. Maua! Faatasi ai ma le polo i lona lima, sa eli atu ai Uili i le laina sikoa. Faatasi ai ma le puipuiga i ona autafa tonu lava, sa emo atu ai i le isi itu o le malae. Toe lava o ni nai iata. I le tulimanu o le malae, i le va o le faia o se sikoa ma le sili i fafo le vae, na toetoe lava a uma le taimi o Uili. Sa tulei malosi atu i luma, aapa atu i le laina sikoa ma le faatuatua, ma tatao le polo i le palapala. Sa sãō tagata mo sina taimi. Pe na ia sikoa? Ona ia faalogoina lea o le feei o le au maimoa i le tapuaiga!

Ola Ae ma le Lakapi

A o 4 tausaga o Uili, sa lesitala ai o ia e ona matua i le kalapu lakapi i le lotoifale. E foliga mai e laitiiti tele, ae o lena lava foi taimi sa fiafia ai Uili i le “futi” (o le agaga e ta’u ai le “lakapi”). E atoa ane le 12 o Uili, ua avea le lakapi ma se mea e sili atu nai lo na o se taaloga mo ia, ma sa filifilia o ia e taalo i se au liki laiti. E 16 ane ona tausaga ua taalo mo se au liki laiti faapolofesa.

I Ausetalia, a atoa le 20 tausaga o tagata taalo, ua lava

lo latou matutua e taalo faapolofesa ai i se au liki matutua. E ui lava ina sa 18 tausaga o Uili, ae sa oo atu tauofoga mai le taumatau ma le agavale. Sa avea o ia ma se tagata fou iloga. Sa ofo atu e se tasi o au ia te ia se konekarate e 1.5 miliona tala Ausetalia—o se ofo e seãseã faia i tagata taalo o lana tupulaga. Peitai, e le o le mea lena sa vaaia e Uili i lona lumanai i le taimi lena. Sa filifili Uili e fai se misiona.

Faia o le Filifiliga o le Misiona

Ina ua oo i le taimi na tatau ai ia Uili ona faailoa atu pe o le a alu e fai se misiona pe talia se konekarate lakapi liki, sa faigofie ia te ia le faaiuga. “Sa ou tuuina le misiona i lo’u mafaufau ma lo’u loto a o ou talavou, ma sa ou faia se folafolaga ia te au lava o le a ou le faatagaina manao o le lalolagi e pulea a’u,” o lana tala lea.

E ono fesili le lalolagi, Ae faapefea le tupe? o konekarate? o le taalo lakapi faapolofesa—lana miti i le olaga atoa? O le a se eseese e i ai lona olaga pe ana ia taliaina se konekarate faapolofesa? “Semanu e mafai ona fesoa-soani ai i lo’u aiga i mea tautupe. Semanu e mafai ona mautu ai foi lo’u lumanai mo nai isi tausaga e sosoo ai,” na ia tautino ai.

Aisea la na ia le taliaina ai le ofo? “O se misiona o se mea e manaomia mai e le Alii mai ia te a’u, mai i alii talavou o le Ekalesia,” o lana tala lea. “O se auala e faafetai atu ai i le Alii mo mea uma ua Ia faia mo a’u i o’u tausaga e 19 iinei i le fogaeleele. Ma o le iuga, ailoga ou te fiafia pe ana ou nofo. Sa ou faia le filifiliga e faia se misiona aua o le a i ai lava le lakapi iina.”

O le faasilasilaga a Uili sa le mautonu ai ma faateia ai le toatele. I se faamatalaga e uiga i ana uo le lolotu, sa ia

fai mai, “Latou te le malamalama i le pogai moni ua ou alu ai; pau lava le latou matau ua ou savali ese mai le taaloga mo le lua tausaga.” Sa ta’u atu e Uili ia i latou, “O loo ou aoaoina tagata e uiga ia Iesu Keriso ma auuana atu i isi. O se mea ou te manao e fai.” Ina ua latou faalogo i le faamalalamamaga a Uili, sa faapea loa ona lagolago atu ana uo.

Saunia e Auauna Atu

Sa iloa e Uili sa le lava le na o le manao e fai se misi-ona. Sa ia iloaina sa taua le saunia. O le mea e tasi sa ia faia o le o ma faifeautalai faamisiona i le aoaoina atu o ni lesona sa atofaina. “A fai mai faifeautalai ou te tali i fesili, sa foliga mai e o mai upu ou te le’i iloa e mafai ona fesoasoani i le tagata sailiili e malamalama teisi ai,” o lana tala lea. “Ma o nisi o tagata sailiili sa latou aoaoina—lea sa ou fesoasoani e aoao—na papatisoina talu ai nei. O se faamanuiaga ia te au le vaaia o lena mea.”



O loo auuana atu nei Uili i le Misiona a Ausetalia Brisbane, peitai na te le’i tuua atoa le lakapi. E ui ina e le mafai ona taalo o ia, e galue o ia o se faifeautalai ma le naunautai lava e tasi lea e i ai mo le lakapi. A o le’i alu i lana misiona, sa ia ta’ua, “O loo i ai lava iina le faamemelo ma le finafinau e tasi i le taalo lakapi ma le auuana i le Alii. I taaloga e tatau ona e galue malosi e saili le manumalo. E mafai ona e faatataua lena mea i le galuega faafaifeautalai aua o loo ou galue malosi e taumafai e saili tagata o e fia faalogo i le talalelei.”


Foi Mai ma le Mamalu

Soo se taimi lava e tuua ai e se tagata lauiloa i taaloga le tulaga mo se taimi umi, ae maise lava mo le lua tausaga, e masalosalo tagata po o le a le mea o le a tupu pe a foi mai o ia? Ua iloa e Uili o le faia o se misiona, na te ono lafoaia ai ni mea se tele, ae ua ia iloa foi ua ia lafoaiina mo se mea e sili atu le matagofie. “Ou te manatu o se ositaulaga tele lea, ae o se mea ua ou naunau e fai,” o lana tala lea. “E mafai ona tupu soo se mea, ma o le lua tausaga o se malologa talafeagai lea mai le taaloga. Ia te au lava ia, ou te fia toe foi mai ma taalo lakapi.”

E ui lava o le taalo lakapi faapolofesa sa avea ma ana miti i taimi uma lava, ae ua iloa e Uili faamanuiaga e faavavau e oo mai mai le auuana atu i se misiona. “I le lakapi liki, e i ai i taimi uma le olioli i le manumalo ma le sikoa, ae o lena olioli e na o ni vaiaso lava e tumau ai po o ni nai aso. E le umi se taimi e te faapelepeleina ai,” o lana faamatalaga lea. “Ae o se uo po o se tagata sailiili e sau i le Ekalesia ma le vaaia o le mafai e le talalelei ona faamanuia o latou olaga e faavavau, e mafai ona tuuina e faavavau se ataata i ou foliga. ■



MAI LE MISONA



O LE VAVEGA O LE FAAMALOLOINA FAALEAGAGA

Saunia e Elizabeth Stitt

se tasi aso a o ma o atu ma la’u soa e asi se tagata fou liliu mai i Colombo, Pasila, sa tumu le fale i tagata o le aiga. Sa tau le ofi, ae sa latou valaaulia lava i maua i totonu e faasoa atu se savali. E fetau le tau amata atu [o le savali] ae sau loa i totonu le tuagane o le tagata liliu mai. Sa le o ia o se tagata o la tatou Ekalesia ma sa le fiafia i le ma asiasiga. Sa foliga mai sa ia sailia soo se auala e tete e ai ia i maua.

Sa ia te ia se tamaiaipi o tagata uma o lana aulotu ma o latou gasegase. Sa fai mai ia i maua pe ma te talitonu i le meaalofa o le faamalologa. “Ioe, ma te talitonu i ai,” sa ma tali atu ai. “Ia la,” sa ia faaauau ai, “ua ou

faamaloloina uma lava tagata o loo i lenei tamaiaipi. E toafia ni tagata ua oulua faamaloloina?”

Sa ma taumafai e faamatala atu le perisitua, faatuatua, ma le ala e tutupu ai mea e tusa ai ma le finagalo o le Atua, ae ina ua mavae sina taimi, sa ma lagonaina le pei ua tulituliapū i maua ma osofaia.

Ma “i le itula tonu lava” (MF&F 100:6) sa ma manaomia ai, sa musumusumu mai le Agaga i le mea e ta’u atu. Sa ma faamalalalama atu e ui ina ma talitonu i le faamalologa, ae o la ma galuega o ni faifeautalai O Le Ekalesia a Iesu Keriso o le Au Paia o Aso e Gata Ai, o le aumaia o le faamalologa faaleagaga ia i latou matou

te aoaoina, o lea faamalologa e na o le taliaina o le Togiola a Iesu Keriso e maua ai e ala i le faatuatua, salamo, papatisoina i le faatofuina, mauaina o le meaalofa o le Agaga Paia, ma le tumau seia oo i le iuga.

Sa ma faamalalalama atu, e ui ina tatou talitonu i faamalologa faaletino, ae o le faamalologa aupito taua o le faamalologa faaleagaga. Ma o le ituaiga faamalologa lena sa ma vaaia i aso uma. E le afaina lava la pe na faamaloloina faaletino ia tagata pe afai e le’i salamo ma sui o latou olaga e mulimuli ia Keriso.

A o taialaina i maua e le Agaga e tali atu i se agaga toafimalie, sa faapea ona mou ese ia lagona le lelei mai le potu, sa tuu le taumafai o le tuagane e faasagatau mai, ma sa mafai ona faasoa atu le ma savali.

O masina mulimuli ane, ina ua uma la’u misiona, sa ou faitau ai i le faamatalaga lenei i le *Liahona* mai le api talaaga a le misiona a Ioane Tana: “O le liuaina o le vavega silisili lea. E sili atu foi le matagofie nai lo le faamaloloina o e mamai po o le faatuina mai o e ua maliliu. Aua e ui o se tagata na faamaloloina e iu ina toe gasegase foi, ma iu ai ina maliu, ae o le vavega o le liuaina e mafai ona tumau e faavavau ma e aafia ai le faavavau mo le tagata liliu mai faapea ma ana fanau. Ua faamaloloina ma faaolaina augatupulaga atoa mai le oti e ala i le vavega o le liuaina.”¹

Ou te matuai fafetai ona sa uunaia e le Agaga ni faifeautalai se toalua na tautoai ina ia manatua lo tatou faamoe-moega, o le faaolaina o agaga. ■

FAAMATALAGA

1. John Tanner, siiina mai e Susan W. Tanner, “Helping New Converts Stay Strong,” *Liahona*, Feb. 2009, 21.

TOOTULI FAAMAULALO

“O le tatalo faamaulalo, ma le faatuatua
e aumai ai le taitaiga ma le filemu.”

Elder Richard G. Scott o le Korama a Aposetolo e Toasefululua,
“Faaogaina o le Meaalofa Faalelagi o le Tatalo,” *Liahona*, Me 2007, 8.



Mataupu Faavae ma Feagaiga 135:3

A o lei maliufasia o ia, sa aumaia e le Perofeta o Iosefa Samita le tele o mea e faamanuia ai tagata uma.



Ta'uta'ua ma se Igoa E Le Mafai Ona Faaumatia

“E ui o mea na tutupu i le aso 27 o Iuni, 1844 [o le Maturoina o Iosefa Samita ma Ailama Samita],

e matautia, ae ua tatou maua ai le mafanafana i lo tatou iloina lea o le Maturoina o Iosefa Samita e le o le mataupu mulimuli lea o lenei faa-
maumauga. E ui o i latou o e sa saili e aveese lona ola na lagona o le a muta ai le Ekalesia e aunoa ma ia, ae o lana molimau mamana o le upumoni, o aoaoga na ia faaliliuina, ma lana folafolaga i le savali a le Faaola o loo olaola pea i aso nei i loto o le silia ma le 12 miliona o tagata [o le Ekalesia] i le lalolagi atoa, o e o loo tautino atu e faapea o ia o se perofeta a le Atua.”

Peresitene Thomas S. Monson, “O Le Perofeta o Iosefa Samita: O Se Faiaoga e Ala i Faaitaiga,” *Liahona*, Nov. 2005, 69.

Meaalofa ma le Mana o le Atua

Sa faaliliuina e Iosefa Samita le Tusi a Mamona “e ala i le alofa muti-mutivale o le Atua, i le mana o le Atua” (MF&F 1:29) ma “i ala na saunia muamua” (MF&F 20:8), e aofia ai le Urima ma le Tumema.

3 O Iosefa Samita, le “Perofeta ma le Tagatavāai a le Alii, e tele atu mea na ia faia, vagana ai lava le su, mo le faaolataga o tagata i lenei lalolagi, nai lo se isi lava tagata na ola ai. I le va puupuu o le luasefulu tausaga, na ia aumaia le Tusi a Mamona, lea na faaliliuina e ia i le meaalofa ma le mana o le Atua, ma sa avea ma ala na faasalalau atu ai i konetineta e lua; auina atu le ‘atoatoaga o le talalelei tumau-faavavau, ua i ai i ona totonu, i itu e fa o le lalolagi; aumai faaaliga ma poloaiga ua i ai i le tusi lenei o Mataupu Faavae ma Feagaiga, ma le tele o isi tusi ma aoaoga poto mo le manuia o le fanauga a tagata; fa-potopoto le tele o afe o le Au Paia o Aso e Gata Ai, faavae se ‘aai tele, ma tuua se ta’uta’ua ma se igoa e lē mafai ona faaumatia. Sa soifua maua-luga o ia i luma o fofoga o le Atua ma lona nuu; ma e pei o le toatele o le ‘au faauuina a le Alii i taimi anamua, ua faamau faailogaina lana misiona ma lana galuega i lona lava ‘toto; ma ua faapea foi lona uso o Ailama. Sa lei fevaevaea’i i laua i le soifuaga, ma sa lei tuueseeseina i laua i le oti!

Ua Faamau Faailogaina Lana Misiona ma Lana Galuega i Lona Lava Toto

Faitau i upu o le viiga “Viia Le na Fetaia’i ma Ieova” (*Viiga*, nu. 15) ona tusi lea i lau api o talaaga ia ou lagona e uiga i le Perofeta o Iosefa Samita.

Tagatavaai

O se tagatavaai:

- Ua faatagaina e iloa e [ona] mata faaleagaga “mea sa le vaaia e mata faalenatura” (tagai i le Mose 6:35–38).
- O se talifaaaliga ma o se perofeta (tagai i le Mosaea 8:13–16).
- E iloa mea ua tuana'i, taimi nei, ma le lumanai.

Tagai i le O Le Taiala i Tusitusiga Paia, “Tagatavaai,” i lalo o le “Study Helps” i le scriptures.lds.org.

E Tele Atu Mea Na Ia Faia

“O le galuega ua faia e Iosefa Samita ua le faapito lea i le na o le olaga nei, ae aofia ai foi ma le olaga a sau, ma le olaga sa i ai. I se isi faaupuga, e faatatau ia i latou sa soifua mai i le lalolagi mo i latou o loo soifua ma i latou o le a soifua pe a uma i tatou. E . . . faatatau . . . i le aiga uma o tagata mai le faavavau i le faavavau.”

Peresitene Iosefa F. Samita (1838–1918), *Aoaoga a Peresitene o le Ekalesia: Iosefa F. Samita* (1998), 13–14.

O le faamatalaga a le faatonu: O lenei itulau e le o se faamalamalama atoa o mau na filifilia, ae ua na o se amataga mo au lava suesuega.



O FEA O LE A TAU ATU I AI AU FILIFILIGA?

Saunia e Adam C. Olson

Mekasini a le Ekalesia

Mata e mafai e Karina ona suia lona ala e ala i le suia o ana filifiliga?

Sa mou ese atu le ataata o Karina. Sa amata ona sau lona afu— ma e le ona sa le masani ona vevela faapea i lena vaiaso. Sa fetilofilofa'i solo o ia mo se fesoasoani. Ma e ui lava i le tumutumu o le fale tatala, ae sa leai se tasi na foliga mai na matauina le i ai na o ia ma le tagata failipoti ma ana fesili uma.

Seia oo mai i lena taimi, sa fiafia lava Karina e 17 ona tausaga e volenitia i le fale tatala o le Malumalu o Kyiv Iukureini. Ae o lenei, faatasi ai ma le tagata failipoti o le nusipepa na faatalitali ma le naunautai, ae na foliga mai ua le mafai ona tautala o ia.

Sa popole Karina ona o ni mea sese ua tuanai sa taumafai o ia e faatoilalo, o le a faapea ona le fesoasoani mai ai le Atua ia te ia.

O Le Mea e Tau Atu i Ai le Tumutumu [o Tagata]

O le ola ae i le Ekalesia, sa moemiti ai Karina i se faaipoipoga i le malumalu. Peitai, e pei o le toatele o le tupulaga, sa faananau o ia i le taliaina [e tagata].

Sa manao o ia ina ia aulelei ma lauiloa e pei o lona uso matua. Sa moemiti o ia ia taulamua ma ia faamemelo i ai tagata, ae sa fefe i le matilatila ese ai ma le tauemulina. O le manao e mulimuli i tulagavae o lona tamā i le aoga faaleoleo sa atili faateleina ai le mamafa. Mai le 2,000 o tagata aoga, sa na o le 70 tamaitai. Sa fiafia o ia i

le taulai atu [o tagata ia te ia] ae sa fa'atu ai foi.

I lona manao ina ia taliaina [e tagata] o lea sa ia faia ai ni filifiliga le lelei. “Sa malosi le faatosina a le lalolagi,” o le tala lea a Karina. “O tagata sa siomia au sa inupia ma ulaula. Sa latou tauanauina au ma sa ou gauai atu i ai. Sa ou fiafia i le avea ma se tagata o se vaega sa lagonaina le leai o se mea e popole ai.”

Sa ia iloa o le mea sa ia faia e sese, ae sa le'i mafaufau o ia po o fea e tau atu i ai ana filifiliga a o mulimuli atu o ia i le tumutumu o tagata e o ese mai le Atua (tagai i le Mataio 7:13–14).

O Le Filifili e Suia o Lona Uiga o le Suia o Au Filifiliga

I se tasi aso sa fai atu ai se alii talavou sa fiafia i ai o ia, na te faaaloaloga talitonuga a lana ekalesia.

O le ma ona sa le'i lelei ona ola o ia i na talitonuga, sa iu ai ina nofo Karina ma mafaufau i le ala sa i ai o ia (tagai i le Hakai 1:5–7). Sa ia iloaina o ana faaiuga na taitaieseina ai o ia mai le Atua, le mafutaga a le Agaga Paia, ma lana miti mo se aiga e faavavau.

Na pau lava le ala e suia ai lona ala o le suia o faaiuga sa ia faia i aso taitasi.¹ Ae sa mafaufau o ia pe ua mamao tele o ia i le auala sese. Mata ua tuai tele ona [ou] sui?

Sa tonu ia Karina e amata ona sui e ala i le tatalo ma le faitauina o tusitusiga paia i aso uma. Sa amata ona tusitusi



**FILIFILI E
SALAMO**

“Afai e oo ina ave faapagota outou e le fili ona o a outou agasala, ou te faamanatu atu ia te outou o loo outou umiaina le ki o le a tatala ai le faitotoa o le falepuipupi mai totonu. E mafai ona faamamaina outou e ala i le taulaga togiola a le Faaola o Iesu Keriso.

“Atonu tou te manatu i ni taimi o o outou puapuaga ua le aoga ona laveai outou ona ua outou faia ni mea sese, ogaoga pe faatauvaa, ma ua outou manatu ua outou leiloloa. E *le* moni lava lena mea! . . . E *mafai* e le salamo ona faamaloloina mea ua tiga, e tusa lava pe o le a.”

Peresitene Boyd K. Packer, Peresitene o le Korama a Aposetolo e Toasefululua, “Fautuaga i le Autalavou,” *Liahona*, Nov. 2011, 18.

i lana api o talaaga, lea sa fesoasoani na te iloa ai le fesoasoani a le Tama Faalelagi i aso taitasi. Na te suia le autu [o talanoaga] pe a faasolo ina leaga ia talanoaga.

O lana faaiuga na sili ona faigata o le filifili lea ia leai ni ana uo mo se taimi nai lo le filifilia o uo e i ai se uunai-iga le lelei. Sa amata ona vaavaai o ia mo uo e maualuluga atu tulaga faatauaina.

O Le Taua o le Faamoemoe

I le aluga o masina na sosoo ai, sa velo atu e le fili ia le masalosalo ma le fefe i ona foliga i ana faaiuga uma. O nisi taimi sa mafaufau ai pe na aoga le taumafaiga ia mulimuli i le Faaola. O le tagata sa manao e avea ai o ia, sa foliga mai e le mafai ona oo i ai.

Ae a o vaavaai atu o ia i le ala na ola ai ona matua ma isi e malolosi molimau, sa ia iloa ai e i ai se mea e sili atu le malosi nai lo le masalosalo ma le fefe—sa ia iloina ona o le salamo, ua i ai ma le faamoemoe.

“Sa ou vaai e mafai ona ola i le auala sa’o,” o lana tala lea. “E le tausalaina i tatou i a tatou mea sese. Ua tuuina mai e le Tama Faalelagi ia i tatou le avanoa e salamo ai ma sui [o tatou] ala.”

O le liliu ese mai ana filifiliga tuai ma taumafai e mulimuli i le Faaola i aso taitasi, ua aoina ai o ia o le Tama Faalelagi e onosai. “Ua Ia tuuina mai ia te au lea avanoa ma lea avanoa e sui ai ma avea ma se tagata lelei atu,” o lana tala lea. “Sa fesoasoani mai o Ia ia te au i taimi faigata.”

O Loo lina le Fesoasoani Pe Afai Tatou te Filifili e Mulimuli Ai

Sa faasasao tauau o Karina ma toe liliu atu i le tagata failipoti. Sa fiafia atu lana ataata. E tele mea ua uma ona fai e le Tama Faalelagi mo ia ua ia iloa ai o le a fesoasoani mai o Ia i le taimi lenei.

Ina ua uma ona fai atu fesili a le tagata failipoti, sa ataata Karina ma talotalo atu. Sa ataata atu i ai le failipoti ma savali ese. Sa le tele ni mea sa tauina atu e Karina na ia manatuaina, ae o le a ia manatuaina mo se taimi umi le lagona sa ia lagonaina, i le iloina e latalata mai lava le Tama Faalelagi ia i latou o e filifili e mulimuli ia te Ia. ■

FAAMATALAGA

1. Tagai i le Thomas S. Monson, “O Le Auala i le Faatoatoaina,” *Liahona*, Iulai 2002, 111–14.



Saunia e Shaneen Cloward

Sa tonu i o matou taitai o Tamaitai Talavou o se malaga mo se moe tasi o le mea tonu lea e saunia ai i matou mo le toluapiga. Sa latou filifilia le auvai o le Vaitafe o San Pedro i Arisona i saute, ISA, e faatu ai

O Se Faataitaiga **LELEI ATU**

la matou toluapiga faataitai.

Ina ua uma ona fofola ato moe, sa matou mananao ma nisi o teineiti e suesue ma o i totonu o le vai. Sa manatu taitai e tatau ona fai muamua ni lesona e uiga i le saogalemu ma le fesoasoani muamua. O lea sa matou saofafai uma ai i lalo o se mea paolo i talaane o le vaitafe mo le lesona.

Sa le faigofie le taumafai e faalogo ma le toto a o matou vaai atu i le iila o le vaitafe i le susulu o le la. Sa agiagi le savili i laau o le vavae a o tautala ia Sister Brown (ua suia igoa). Sa matou faalogo muamua uma foi i le lesona, ae ou te le malamalama pe aisea na tatau ai ona matou faalogo

i ai i le taimi lenei. Sa matou iloina uma lava e oomi se manua e taofi ai le toto, ae sa ia toe tauina mai foi ia i matou.

Ae latou te le'i tuuina mai i matou e o, sa faafia ona tau mai e taitai e aua nei o matou o i totonu o le vaitafe e aunoa ma ni seevae. "Tou te le iloa lava po o a ni mea o i ai iina, ma e tatau ona puipui tou vae."

A o ou oo atu i autafa o le vaitafe, ua amata ona faapisipisi nisi o teineiti i totonu o le vai. Sa enaena le vai i le palapala. Sa itiiti ifo ma le futu le loloto o le vaitafe e tau lava i le isi itu, ma ou te le'i talitonu sa matautia.

Sa ou filifili e aveese o'u seevae. Sa na o le tasi la'u pea seevae na aumai, ma ou te le iloa le uiga o le faasusu o seevae ma see susu ai

Maimau pe ana matou faalogo i faatonuga a o matou taitai, ae matou te le'i manatu e faatatau ia i matou.

lona vae, sa tamoe atu i ai o ia ma taualaga atu, "Oomi malosi le mea o loo lavea!"

O le lesona o le 10 minute na muamua atu ua amata ona gofo ifo. O teineiti, na tutu faataamilo ia Elisapeta ma matamata i le toto o lona vae, sa latou faamaualugaina teisi lona vae ma oomi malosi le manua.

Sa ave atu Elisapeta i le falemai, lea sa ta'u ifo ai ia te ia na toetoe lava a afa lona vae i le lavea. Sa manaomia ai ni filo se tele ma o le a umi se taimi ona faatoa toe lelei lea. O le isi taimi na ou vaai ia ia te ia, sa ia faaaogaina ni tootoo.

Ou te le'i mafaufaui lava e mafai pe o le a ou tauanauina la'u uo lelei e fai se mea o le a tigaina tele ai o ia. Ou te le'i vaai ia te a'u lava o se faatosinaga le lelei i se taimi muamua.

O le taimi nei, o loo ou taumafai e avea ma se faataitaiga lelei atu i au uo, ma ua sili atu lo'u naunau e faalogo i o'u taitai. Latou te iloa mea o loo latou fai mai ai. ■



FAALOGO

"Faamolemole aua le toe fatuina le uili o amioga lelei! Aua nei e manatu e tatau ona e aoaoina e oe lava ia lesona leaga uma o le olaga.

"Faalogo i fetalaiga a le Alii. Faalogo i ou taitai. Faalogo i ou matua. Faalogo i le mea sili o loo i totonu ia te oe. Ma le mea sili lava, faalogo i le musumusuga malie, malu, e le mateenaina o le Agaga lea o le a aoaoina oe i mea uma."

Elder Jeffrey R. Holland o le Korama a Aposetolo e Toasefululua, "Matou te Mananao i le Mea Sili mo Outou," *New Era*, Ian. 2010, 5.

i le aso atoa. O a'u uo lelei lava e toalua, o Mafa ma Elisapeta, sa la tau fai faamanatu mai le mea na fai mai ai taitai. Ae sa ou aveeseina lava ou seevae ma ta'u atu i ai a'u mafuaaga. Sa aveese foi e Mafa ona seevae. Ae o Elisapeta sa musu lava. Sa ou asa atu i le vai ma i se leo tau faalili sa ou fai atu ai, "See pea ou seevae pe a e manao ai."

Sa saofai o ia i lalo, aveese ona seevae, ma momoe mai i totonu o le vai. Pe a ma le lima o laa ona tu lea, suia ona foliga vaaia, ma fai mai

i se leo malu," Oi, aue." Ina ua sii ae lona vae mai le vai. Sa ou iloa atu le tafe mai o le toto i se lavea. Na tu o ia i se atigifagu ta'e.

O le vaaia o le toto na pei ai e pe lo'u faiai. E ui ina sa le'i leva atu ona ou faalogo i se lesona i le fesoasoani muamua, ae sa matuai ou le iloa le mea e fai. Sa ou filifili e momoe atu mo se fesoasoani. Sa fesoasoani le isi toalua e aumai o ia mai le vai.

Sa ou maua ia Sister Brown ma ta'u atu i ai le mea na tupu. Sa faapea o ia o sa'u tala ula. Ae ina ua ia iloa atu Elisapeta o saofai i le auala ma le toto o loo pasi mai i

O Se UO Moni



Saunia e Sarah Chow

E faavae i se tala moni

*“O loo tutu au uo i ou tafatafa”
(MF&F 121:9).*

O le tusi sa tusia i se pepa lanumoana ma ni laina fepi-opioa'i na faataamilo i tulimanu, e ui la o Ieremia sa na tuuina atu ia te ia, ae na iloa e Melania o le tusi na aumai ia Rasela. Sa fetilofa'i solo Melania. Ua uma le taimi o le faitauga tusi, ma ua tuu ese e tamaiti o lana vasega a latou tusi.

Sa iloa e Melania le ituaiga amata o le a amata ai le tusi: “Le Uo Sili Peleina.” Sa ataata o ia ia te ia lava. Sa la faauo mai lava ma Rasela mai le vasega lua. “O loo avea pea i maua ma se uo sili ona lelei, e ui ma te matuai eseese lava,” o

mafaufauga ia o Melania a o ia tata-laina le tusi.

**Le Uo Sili Peleina,
E te ulaula?
—Rasela**

Sa te'i Melania. “Ma te o faatasi ma Rasela i taimi uma lava,” o ona mafaufauga ia. “Na te le'i iloa ou te le ulaula?”

Sa ia tusia i le pito i lalo o le pepa:

**Leai. Ou te manatu o se mea leaga. Aisea e te fia iloa ai?
—Melania**

Sa toe tuu atu e Melania le tusi ia Ieremia. E le'i leva ae toe pasi mai foi. Sa faitau e Melania:

**Sa ou nanaina mai se pepa sikaleti mai le fale o le fafine o lo'u aiga. E te manao ta te o ta te faataitai ai pe a tuua le aoga?
—Rasela**


Sa sioa atu Melania i le tusi. Ona ia tusia lea:

**Rasela! Aisea e te fia ulaula ai? E leaga mo oe! Ou te iloa e te fiafia e faataitai ni mea fou, ae ou te le fia vaai atu ua e afaina mai.
—Melania**



I se tasi aso sa ou i ai i le fale o la'u uo, ma sa i ai ni pia i totonu o le pusaaisa. Sa inu e la'u uo se vaega ona ofo mai lea o se vaega ia te a'u. Sa ou ta'u atu ia te ia ou te le inu pia. Sa fesili mai pe aisea, ma sa ou fai atu i ai, fai mai la'u Ekalesia e le tatau ona tatou inuina aua e leaga mo o tatou tino. Ou te faafetai ou te le'i inuina le pia. Ou te faafetai foi ua tatou maua le Upu o le Poto e tumau ai lo tatou ola maloloina ma saogalemu.

Sarah C., 8 tausaga, Nevada, ISA



“O le a ou le faaao-gaina mea e leaga mo a'u.”

O Ou Tulaga Faatonuina Faaletalalelei

Sa toe tusi mai Rasela:
O le a ou le afaina i ni nai sikaleti. Atonu foi e le uma ia te au le pepa atoa.
—Rasela

Sa lagona e Melania e pei o le a tagi. Sa ia tusia:
O oe o la'u uo ma ou te alofa ia te oe. Aua e te ulaula.
—Melania

Sa tilotilo atu Melania a o faitau e Rasela le tusi. O le taimi lenei sa foliga mai o le a tagi Rasela. Sa umi

se taimi o ia uuina le tusi. Ona toe tusi mai lea. Ina ua maua e Melania le tusi, sa ia faitauina:

Faafetai. Ou te alofa foi ia te oe. O le a ou le ulaina ia sikaleti.

Sa faafetai Melania ona sa ia filifili e avea ma se faataitaiga. Sa ia lagona le agaga faafetai ona sa fai e Rasela le filifiliga sa'o. ■

O La Tatou Itulau



**Nefi H., 11 tausaga,
Kalefonia, ISA**



O LE A AVEA I MATOU O SE AIGA E FAAVAVAU

Ou te faafetai i le umiaina e lo’u tama o le perisitua, sa ia papatisoina au, ma sa faamauina i matou i le malumalu. Ua ou fiafia aua o le a avea i matou o se aiga e faavavau. Ou te iloa o loo soifua le Tama Faalelagi ma e moni upu a perofeta.

Ariana C., 9 tausaga, Peru



**Thayná C., 12 tausaga,
Pasila**



**Vimean M., 7 tausaga,
Kemupotia**



**Ou te Fiafia e Alu i le Malumalu,
Nathan P., 7 tausaga, Italia**



Brian C., 7 tausaga, Costa Rica



O SE NOFOAGA E SILI ONA FAAPITOA

Oa’u e iva o’u tausaga, o lea, ina ua ou alu i le malumalu mo le taimi muamua lava, sa ma faatalitali i fafo ma lo’u tama. Sa ma savavali faataamilo i le malumalu e matamata i lona fausaga. Sa ma asiasi i le potu faatalitali matagofie ma olioli i le toafimalie ma le filemu iina. Sa ma talanoa lemu e uiga i le soifuaga o lesu Keriso ma Ana Au Aposetolo i aso la ma aso nei. A o ma saofafai ma lo’u tama, sa ou lagonaina o le malumalu o se nofoaga e sili ona faapitoa.

Raphael R., 9 tausaga, Suitiselani



**O Lo’u Aiga Faavavau, saunia e
Camila T., 7 tausaga, Kuatemala**



Esteban A., 11 tausaga, Kolomupia



Rosteek Z., 4 tausaga, Iukureini



Saunia e Elder Per G. Malm

O Le Fitugafulu

O Faamanuiaga o le Galue Malosi

“Ia tatou faia ai ma le fiafia mea uma ua i ai i lo tatou mana” (MF&F 123:17).



Ao ou laitiiti i Suetena, sa avea lo’u tamā ma se fesoasoani i nisi o peresitene o misiona. O lenei valaauga e manao-mia ai lona femalagaai i le tele o faaiuga o vaiaso. Sa avea o ia ma se faataitaiga ia i matou ma nai ou tei i le taua o le auauna atu i le Alii, e tusa lava po o lona uiga e ao ona tatou faia ai ni osigataulaga.

Sa ou aoaoina ai foi le taua o le galue malosi a o o’u laitiiti lava. I taimi o le taumafanafana e vili atu la’u uila i se faatoaga vine e na o ni nai maila le mamao ese atu. Ou te tauina le vine mo ni itula se tele i aso taitasi e maua mai ai se tupe.

E i ai se fale o le taumafanafana

o le matou aiga i se faatoaga. Sa le’i i ai se eletise po o ni paipa, o lea sa matou tātāina ai a matou lava fafie ma la’u mai vai mai le vaieli. Sa tuuina mai e le faifaatoaga e ana le faatoaga le faatuatuga ia te au e ave atu ai povi i le fale o manu manu i ni isi o taeo mo le tatauina o le susu ma toe faafoi atu. Sa matou seleseleina ma faaputu vaomago ma faaoga solofanua e la’u ai tau vaomago i le fale o manu.

O ou aafiaga i le galue malosi ma faataitaiga a lo’u tama i le tuuto atu o ia lava i le galuega a le Alii, sa fesoasoani ia te au i la’u misiona muamua. I le na o le 16

o o’u tausaga, sa valaauina ai au e leiina le piliki mo fale o le Ekalesia i Suetena, Finelani, Siamani ma Netherlands. E tele ni musumusuga faaleagaga sa ou maua i le taimi o la’u auaunaga. Sa ou aoaoina o le galue malosi ma le faamaoni o se tasi lea o auala e fai ai le mea sa’o ma, e faapea foi ona fiafia ai le Atua.

O se faamamaluga le maua o se tofiga ma lipoti atu sa e faia le mea sili e faamae’a ai. A tatou taliaina ni tofiga ma faaoga o tatou taimi ma taleni e fausia ai le malo o le Alii, o le a tatou maua ma vaai i faamanuiaga o loo teuina e le Tama Faalelagi mo i tatou. ■

E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

Ou Te Filifili le Mea Sa’o e ala i le Ola Ai i Mataupu Faavae o le Talalelei

Sa faatatagi e Lamoni ia siliva sa i totonu o lana taga ina ua uma ona ia faatauina atu fuamoia o ana moa i le maketi a le nuu. Sa mafaufau o ia i le fagu o loo i le fale o loo i ai ana sene o le sefuluai. O le Aso Sa, o le a ia aveina atu ia sene i le epikopo. Sa oo atu se lagona mafanafana i le loto o Lamoni. Sa fiasia o ia e totogi le sefuluai.

Sa tumu laulau i le maketi i mea e faatau atu. Sa vaai Lamoni i se mitiafu felanulanuai sa i ai le igoa o le au soka e sili ona fiasia i ai. Sa ia vaaifaalemafaufau i lona ofuina o le mitiafu, momoe ane i le malae, ma le sikoaina o le sikoa malo. Sa tilotilo Lamoni i le tau sa pipii ai. E mafai ona ia faatauina mai le mitiafu pe a ia faaaogaina uma le tupe o ana fuamoia faapea ma sene o lana sefuluai.

Sa matauina e Lamoni ua aluese atu le lagona mafanafana. Sa matuai manao lava i le mitiafu, ae sa ia iloa e le finagalo le Tama Faalelagi na te faaaogaina ana sene o le sefuluai. Sa amata ona savalivali atu Lamoni i le fale. Sa filifili o ia e totogi muamua lana sefuluai. Ona ia teuina lea o nisi tupe i le faatauina atu o fuamoia seia oo ina mafai ona ia faatauina mai le mitiafu ma totogi lana sefuluai e pei ona finagalo ai le Alii ia te ia. ■

NA O OE

Atotogi a tatou sefuluai, tatou te faatumuina se lisiti o le sefuluai. Tatou te tuuina le tupe ma le lisiti i totonu o se teutusi ma tuuina atu i se tasi o le au epikopo po o le au peresitene o le paranesi. E mafai ona e aoao i le auala e faatumu ai la oe lava lisiti o le sefuluai i le tilotilo i le ata o loo i lalo.

The diagram shows a form titled "Sefuluai ma Isi Taulaga" placed inside a grey envelope. The form has several sections:

- Header:** "Sefuluai ma Isi Taulaga"
- Form Fields:**
 - Aso
 - Uarota po o le paranesi
 - Igoa (faaiu, muamua, ogatonu). Ia faaoga le sipelaga e tasi i au pepa uma [o Sefuluai ma Isi Taulaga].
 - Numera a le tagata
- Table:**

Sefuluai		
Taulaga Anapogi		

Labels with arrows point to specific parts of the form:

- Aso:** Points to the "Aso" field.
- Lou igoa:** Points to the "Igoa" field.
- Igoa o lau uarota po o le paranesi:** Points to the "Uarota po o le paranesi" field.
- E fia le tupe o le sefuluai o loo e tuuina atu:** Points to the "Sefuluai" row of the table.

E ese mai i le tusia o lau sefuluai, o le a se isi mea e te faatumuina i le lisiti o le sefuluai? Fesili i se matua e uiga i isi auala e mafai ona e foai ai i le Ekalesia.

GAOIOIGA FMT: FAAMANUIAGA O LE SEFULUAI


O Malaki o se perofeta o le Feagaiga Tuai o lē sa aoao mai a tatou totogi le sefuluai, o le a toina pupuni o le lagi ma sasaa mai faamanuiaga i o tatou luga (tagai i le Malaki 3:10). Ia talanoa faatasi o se aiga po o a faamanuiaga ua outou maua mai le mulimuli i le tulafono o le sefuluai. Tuu se fatupi, faamau, po o se maamaa laitiiti i luga o faamalama e faatusa i ai faamanuiaga ua outou olioli ai.



Faateleina le faatuatua




Molimau malosi atu



Faalagolago i le Alii



Fiafia i le talalelei



Lava meaa



O le tasi o mea e sili ona fiafia Carly e fai i le malaetaalo o le i ve'a ma ana uo.



O Se **MALAETAALO** mo CARLY

Saunia e Chad E. Phares

Mekasini a le Ekalesia

O Carly W. mai Rexburg, Idaho, ISA, o se tagata fesoasoani pisi tele. I le fale e fesoasoani Carly i le vaaiga o pusi, taifau, ma moa a le latou aiga. Ona o Carly o se tasi o tamaitiiti aoga e

sili ona lelei i lana vasega i le aoga, o lea e fesoasoani ai i isi tamaiti i le matematika ma le faitauga tusi. I le Peraimeri, o le pese a Carly e fesoasoani ai i isi tamaiti ia lagona le Agaga.

Ona o le lelei tele o le galuega a Carly na fai i le fesoasoani atu i isi, o lea sa filifili ai nisi o ana uo e

fesoasoani atu foi ia te ia.

O Carly sa fanau mai ma se faama'i e ta'ua o le maeafao. O lenei faama'i e faigata ai ia Carly ona faaaoga uma ona maso. O le faia o mea e pei o le savali i eleele le laugatasi ma le a'ea'e i luga o faasitepu e faigata tele mo ia. I le aoga, sa le mafai e Carly ona taalo i le malaetaalo ona o mea taalo i le malae sa faigata ona ia faaaogaina. Sa i ai foi isi tamaiti sa le mafai foi ona taalo i mea taalo i le malaetaalo.

“O isi taimi ou te faanoanoa ai ma le fiafia i le malologa puupuu ona e le mafai ona ou taalo i le



E fiafia Carly i musika. E i ai o ia i se vaega pepese ma o loo ia aoaoina le taina o le piano.

O le fola pa'u o le malaetaalo ua faigofie ai ia Carly ona savali ai i luga.



Carly ma Halli Jo (taumatau) e fiafia e taaalo i pepe meataalo, savalivali i fafo ma valivali ata faatasi.

malaetaalo,” o le tala lea a Carly.

O se tasi o uo a Carly, o Halli Jo, ma le tina o Halli Jo sa filifili e sue se tupe e fau ai se malaetaalo e mafai e Carly ma isi tamaiti aoga uma i le aoga ona faaaoga.

O Halli Jo, lona tina, ma le toatele o isi tagata sa galulue mo le mauaina mai o tupe mo le malaetaalo fou. Sa tele se galuega na alu ai, ae sa mafai ona lava se tupe na latou maua e fau ai se malaetaalo fou e mafai e tamaiti aoga uma ona taaalo ai.

“Sa matuai tele lava le galuega sa fai,” o le tala lea a Halli Jo. “Ae ou te le'i faanoanoa ai lava i le faiga

o le galuega—na atili faateleina ai lo'u alofa ia Carly.”

Ua fiafia Carly ua mafai ona taalo i le malaetaalo ma ana uo. Fai mai o ia, “Ou te fiafia e savalivali i luga o matie ma alu i lalo i faasee. Ua matou maua faatasi ma a'u uo se taimi fiafia.” ■



FAAMATALAGA ATILI E UIGA IA CARLY

E fiafia Carly e pese “Lototele o Nifae” (*Tusipese a Tamaiti*, 64).

E fiafia Carly e ai fasimoo ma sanuisi.

E pese lava Carly i soo se mea e alu i ai.

E faigofie ona faauo atu ia Carly.

O le mea e tasi e fesoasoani ia Carly e aoao ai le faapaleni o le tietie solofanua.



O Le LESONA a le Au Liki Laiti

*“E i ai so’u aiga i lalo nei.
Alolofa ia te a’u. Ou te fia mau
pea ma i latou e faavavau”
(Tusipese a Tamaiti, 98).*



Saunia e Lindsay Stevens

E faavae i se tala moni

“**A**isea e manaomia ai lo’u i ai iinei?” o le tomumu lea a Linisei.

“E manaomia lou lagolagoina o lou tuagane,” o le tala lea a Tina.

“Ae e le manaia,” o le tala lea a Linisei. “O le tele o le taimi ou te le matamata ai ia te ia.”

O le tuagane laitiiti o Linisei, o Mikaele, sa auai i se au pesipolo o le Liki Laiti, ma e ave ai e Tina ia Linisei i faataitaiga uma ma taaloga uma. E le fiafia ai lava Linisei i le taimi atoa. A o taumafai Mikaele e ta le polo pesipolo, e faalogologo Linisei i musika, faitau ni tusi, ma tusi ni ata mo lona uso laitiiti.

Sa mapuea Linisei ma matamata atu i lona tuagane o tutu mai i le talituaā ma lana au. Sa matamata atu ia te ia ao tamoe e sapo le polo, le maua, ona togi atu lea i le tagata sese.

“Faamalosi, Mikaele!” O le valaau lea a Tina. “O loo manaia lava lau taalo!”

“Ae, Tina,” o le fai atu lea a Linisei, “e le o manaia lana taalo.”

“O le mafuaaga lena o le ta i ai iinei, Linisei,” o le tala lea a Tina. “E valaau faamalosi ia Mikaele, ae maise pe a le lelei lana taalo. Ana fai ta te le i ai iinei ma faapea Mikaele ua toilalo, atonu o le a ia le toe taumafai. Ou te manao ia te ia e taumafai pea lava. E pei foi ona ou manao ia te oe e te taumafai pea i lau tusiata.”

“E leai se isi e valaau faamalosi mai ia te au i le vasega tusiata,” o le tala lea a Linisei. “E le sau lava Mikaele e valaau mai, ‘Manaia tele!’ pe a sa’o lo’u tuufaatasia o lanu.”

“Leai, ae o taimi uma lava e faamalo atu ai mo au ata pe a e faaalai mai ia i matou,” o le tala lea a Tina.

Sa mafaufau Linisei i lena mea. Sa ia manatuaina le aveina e Tina o ia i ana vasega tusiata ma o nisi taimi sa tietie atu ai ma Mikaele i le taavale, e tusa lava pe na manao e taalo ma ana uo. Sa matamata atu o ia ia Mikaele o talituaā. Na faatoa uma lava ona ta e le tagata o le isi au le polo. Ma sa alu atu sa’o lava ia te ia!

“Faamalosi, Mikaele!” o le valaau faamalosi atu lea a Linisei. “E mafai ona e sapoina!”

Sa momoe atu Mikaele i le polo ma faaloloa atu ona lima. Sa ia sapoina le polo!

Sa tau fai tutu i luga Linisei ma Tina ma tapuai leotetele. “Malo lava, Mikaele! O oe o lo’u tuagane e sili ona ou fiafia i ai!” o le alaga atu lea a Linisei.

“Ua na o a’u lava lou tuagane!” o le alaga mai lea i ai o Mikaele ma se ataata lapoa i ona foliga.

Sa toe saofai i lalo Linisei, ma se ataata lapoa foi.

“Atonu e tatau ona ou taulai atu ma tapuai ia Mikaele,” o ona mafau-fauga ia. “O le matamata atu ia te ia a o ia sapoina lena polo o le mea aupito manaia lea na tupu i le aso atoa. Ma sa foliga mai sa matuai taua lava ia te ia lo’u matamata atu. Ou te mitamita lava ia te ia.”

“Tina, ou te manatu e sa’o oe,” o le tala lea a Linisei. “E tatau ona ta lagolago ia Mikaele.”

Na ataata Tina. “Ua ou fiafia ua sui lou mafaufau.”

“Ia ta tapuai atili!” o le tala lea a Linisei.

“Faamalosi Mikaele!” o le valaau faamalosi atu lea a Linisei ma Tina. “E mafai ona e faia!” ■

“**I**a faamalolosia ou sootaga ma ou uso ma tuafafine. E mafai ona avea i latou ma au uo e aupito sili ona outou vavalalata. Lagolago i latou i mea e fiafia i ai, ma fesoasoani ia i latou pe a fetai ai ma luitau.”

Mo Le Malosi o le Autalavou (2011), 15.



O Le Faamanuiaga a Tana

Saunia e Jane McBride Choate

E faavae i se tala moni

1. Sa fanau mai Tana ma se pu i ona laugutu ma totonu o lona gutu (tulou). Ua uma ni ona taotoga se fa e taumafai ai e faaleleia. O ananei sa atofaina ai se feiloaiga a Tana ma ona matua ma le fomai e talanoa ai e uiga i se isi taotoga.



I le taimi o le taotoga, o le a matou aumaia ai se vaega o le ponaivi mai lou puimanava e faaaoga i lou gutu.

2. Sa popole Tana i le mea e ono tulai mai pe a uma le taotoga.

E mafai a la ona inu sa'u susu sukalati?

A pe ma lelei lou gutu, ona mafai lea ona e inuina uma susu sukalati e te manao ai.


3. O le po a o lumanai le taotoga, sa fai ai e le tama o Tana ma se tamaloa o lona aiga sona faamanuiaga faaleperisitua. O Uncle Ailama sa faauuina Tana i le suaau paia. Ona fai lea e Tama le faamanuiaga.



Ou te faamanuia ia te oe ia o le a malosi lou tino ma o le a vave ona manuia pe a uma le taotoga. Ia manatua e alolofa tele ou matua ma lou Tama Faalelagi ia te oe.

4. O le taeao na sosoo ai, sa o ai Tina ma Tama e ave Tana i le falemai.

5. Sa sau le tausii soifua e avatu Tana i le potu e fai ai taotoga. Sa fusi e Tana ia Tina.




Ou te alofa ia te oe, Tana.

Aua le popole Tina. Ou te le o fefe. Sa tuuina mai e Tama lo'u faamanuiaga.




6. Ina ua uma le taotoga sa manuia Tana. Sa fiafia ona sa mafai e Tama ona tuu atu ia te ia se faamanuiaga faapitoa e fesoasoani ai ia ona maua ni lagona lelei.





SAUNI MO FAAMANUIAGA
Saunia e Hilary M. Hendricks


I le taimi e fai ai se faamanuiaga faaleperisitua, tatou te faaali atu lo tatou faatuatua e ala i le faaali o le faaloalo e pei ona tatou faia i le taimi o se tatalo. Lio ia ata o loo faaalua ai mea lelei e fai i le taimi e fai ai se faamanuiaga.



TAIMI MO SE FAAMANUIAGA
Saunia e Hilary M. Hendricks

E tele ituaiga o faamanuiaga faaleperisitua. Atonu sa e maua se igoa ma se faamanuiaga a o e pepe. E mafai ona e fai atu mo se faamanuiaga pe a e ma'i, lavea, faanoanoa, pe fefe foi. E toatele tamaiti e maua se faamanuiaga faaleperisitua a o le'i amataina le aoga i tausaga taitasi.

Vaai i ata nei. O le a lou manatu, aisea ua maua ai e tamaiti nei ia faamanuiaga faaleperisitua?





Ou te filifili le mea sa’o e ala i le ola ai i mataupu faavae o le talalelei.

“Ou te alu atu ma fai ia mea ua poloaiina e le Atua, aua ua ou iloa, e le aumai e le Atua ni poloaiga i le fanauga a tagata, sei iloga Na te saunia le ala mo i latou ia mafai ai e latou ona fai le mea ua Ia poloaiina ai i latou” (1 Nifae 3:7).

Tala Fou o le Ekalesia

Asiasi i le news.lds.org mo se faaopoopoga o tala fou ma mea e tutupu i le Ekalesia.

Faalauiloa atu le Uepisaite a le Ekalesia mo Tagata e I Ai Manaoga Faapitoa i Gagana Faaopoopo e Iva

Saunia e Melissa Merrill

Tala Fou ma Mea e Tutupu i le Ekalesia

I na ua faatoa faalauiloa mai le lds.org/disability i le 2007 i le gagana Peretania, na toe tuufaatasia ai ni faamatalaga lea na taape solo i tusitaulima, tusi lesona, ma isi uepisaite, ma ua faafaigofie ai ona maua ia fesoasoaniga ma manatu i se nofoaga autu.

O le taimi nei, i le 2012, ua maua na punaoa (lea e aofia ai ni faamatalaga e uiga i ni vaega eseese se 10 e faatatau i manaoga faapitoa ma le tele o isi fesoasoaniga eseese) i ni gagana faaopoopo se iva: Saina, Farani, Siamani, Italia, Iapani, Korea, Potukale, Rusia, ma le Sipaniolo.

O lenei faalauiloaga lata mai o le a fesoasoani i aiga e pei o le au Varins o Pale, Farani. O Raymond ma Isabelle Varin sa toatasi le la tama tama o, Jérôme, ae fanau loa le tama tama lona lua o, Jérémy, lea na fanau mai e ma'i i le Down syndrome [o se ma'i e mafua mai le tuasivi ma afaina ai le mafaufau]. E ui sa avea le mauaina o le mai o Jérémy ma se popolega i ona matua—aua sa itiiti lava so la malamalama e uiga i le Down syndrome i lea taimi—ae na lelei lava le tele o aafiaga o le aiga o Varin e faatatau i manaoga faapitoa o Jérémy. Fai mai Brother Varin o le toatele o tagata sa matua alolofa ia Jérémy, na matauina foi o tagata o le

Ekalesia sa faapitoa lava le agalelei atu ma na siosiomia ma faaalua le alofa ma le talisapaia o ia.

E talitonu o ia o le a fesoasoani le uepisaite e atiina ae ai na ituaiga o amioga. “O le a mafai ona fesoasoani i taitai ma faiaoga o le Ekalesia ona malamalama i manaoga faapitoa ma le auala e fetuutuunai ai ma tau-lima ai na tulaga,” sa ia fai mai ai.

Ae e tutusa lava le taua o le saite i tagata e i ai manaoga faapitoa ma o latou aiga, na ia fai mai ai—e le o se auala e faailoa mai ai ae o se punavai o le faamalosiaga.

“E taua lenei saite mo aiga e i ai se tagata o le latou aiga e i ai manaoga faapitoa ona o le

lagolagosua o loo tuuina atu ai,” o lana tala lea. “Ua tuuina atu ai ia te oe se vaaiga e uiga i le aafiaga ma molimau a isi, lea e maua atili ai se vaaiga lelei o le lumanai. Mo ia mafuaaga uma, o le mea taua o le maua lea o ia faamatalaga i gagana eseese.”

Na ioe i ai Elder Keith R. Edwards o le Fitugafulu, lea e faufautua i le Auaunaga mo Tagata e I Ai Manaoga Faapitoa mo le Ekalesia.

“O le a silafia e tagata o le ekalesia e i ai manaoga faapitoa, o latou aiga, ma e tausua i latou o loo tatou galulue faatasi uma lava mo le faamoemoega e tasi—‘ia aumaia le tino ola pea ma le ola faavavau o le tagata’—ma e

O le a maua le Saite a le Ekalesia o Manaoga Faapitoa i le 2012 i gagana e 10: Saina, Peretania, Farani, Siamani, Italia, Iapani, Korea (o loo faaali atu i i), Potukale, Rusia, ma le Sipaniolo.



manaomia e lena faamoemoega i tatou ina ia ‘tasi le lotu ma tasi le mafau,’ o le tala lea a Elder Edwards (tagai i le Mose 1:39; 7:18). “O le a silafia ma malama-lama tagata i le mea latou te o i ai mo se fesoasoani ma o le a iloa ai afai o loo galue le Ekalesia a le Alii e pei ona tatau ai, o le a leai lava se tasi e tuua e tau na o ia lana taua.”

O Fatima Alves mai Potukale, lea e faaletonu lona tuasivi, na iloina le fesoasoani o le uepisaite ia te ia e iloa ai: e le o tuua na o ia.

“E taua ia te au le i ai o se uepisaite a le Ekalesia e fesoasoani i tagata e i ai manaoga faapitoa ina ia tatou lagona ai le lotogatasi i le avefa ai ma tagata o le Ekalesia. E taua le iloina o loo popole ma naunau le Ekalesia e fesoasoani ma lagolagosua i tagata e i ai i tulaga faapitoa,” o lana tala lea.

O le faalauiloaina atu o le saite o se tasi lea mai le tele o taumafaiga o loo faia e le Ekalesia ina ia aapa atu ai i tagata uma o le Ekalesia, o le tala lea a Elder Edwards.

“O se vaega o lo tatou ‘tiute’ mai le Alii o le tuuina atu lea o le talalelei i tagata uma i se auala e mafai ai e i latou ona malama-lama ma faaaogaina ma le tatau,” na fai mai ai Elder Edwards.

“Matou te naunau lava ia aua nei misia soo se vaega o fanau a le Alii i le tuuina atu o avanoa taua o le talalelei.

“E le gata o le a fesoasoani lenei uepisaite i tagata taitoa-tasi ae ua mamanuina foi ina ia fesoasoani i taitai ia iloa le auala e fesoasoani ai po o fea foi latou te o i ai mo se fesoasoani e auauna atu ai ia i latou e i ai manaoga faapitoa,” na ia faaauau ai.

E moni, e le o le faamoemoega o le uepisaite ia suia ai

fegalegaleaiga patino a tagata taitoatasi ma tagata o le Ekalesia.

“E eseese auala o loo faamanuiaina ai le taulimaina o manaoga faapitoa e le Ekalesia i le aluga o tausaga,” o le tala lea a Elder Edwards. “E oo mai faamanuiaga i ni auala tetele pe afai ua i ai se naunautaga i totonu o le tagata lava ia e fai se suiga. O le ki e fesoasoani ai i tagata uma—e tusa lava pe i ai se manaoga faapitoa pe leai—o le alofa lea ia i latou ma saili le taitaiga mai le Agaga e aapa atu ai ma fesoasoani atu.

“Ua tuuina mai ia i tatou uma se tiute ina ia alolofa i o tatou tuaoi e pei o i tatou lava (tagai i le Mataio 19:19). Ua na ona saunia lava e le Ekalesia o se isi ala o fesoasoaniga e fesoasoani ai ia i tatou ina ia malama-lama ma faamanuiaina o tatou manao e lagolago i le galuega a le Alii.” ■

I gagana uma o loo maua ai le saite, o loo aofia ai ma nisi o polokalama:

Disability List [Lisi o Manaoga Faapitoa]: O loo maua i le vaega lenei o le saite ni faamatalaga e patino i manaoga faapitoa ua faatulagaina i ni vaega se 10 ma e tuuina mai ai ni manatu i le ala e fesoasoani ai i se tasi o i ai manaoga faapitoa taitasi.

Families [Aiga]: O le vaega lenei o le uepisaite, e aofia ai ni faamatalaga e fetau mo tagata o le aiga e i ai ni fanau e i ai manaoga faapitoa, ma ua ofoina atu ai ni fautuaga mo le faamalolosia o aiga.

Questions and Answers [Fesili ma Tali]: O i, e mafai ai e le au faitau ona maua ia tali i fesili e masani ona fesiligia i ni vaega se fa: pe faapefea ona, aoaoga faavae ma aiaiga faavae, punaoa, ma faamatalaga faafuainumera.

General Information [Faamatalaga Lautele]: O le vaega lenei ua tuuina atu ai se vaega lautele e uiga i le saite ma faailoa atu ai faapea, e ui o nisi taimi e le lelei le tali atu a tagata i tulaga o le le atoatoa, ae o le aoao e uiga i le tulaga o le tagata o le a mafai ai ona faateleina le malamalama ma le taliaina.

Leaders and Teachers [Taitai ma Faiaoga]: O le vaega lenei o le saite o loo faamanatu atu ai i taitai ma faiaoga ia mea e manatua ao galulue faatasi ma tagata e i ai manaoga faapitoa.

Scriptures and Quotes [Mau ma Upusii]: O lenei faaputuga o mau ma saunoaga faaperofeta ua faamoemoaina e avefa ma se punaoa o le faamalosiuga, faamafanafanaga, ma le faamoemoe mo tagata o loo i ai i tulaga faigata.



O Loo Faailoa atu i le Prophets.LDS.org ia Talaaga Fou o Soifuaga o Apose-tolo Soifua

Na amata faalauiloa atu ia Fepuari ia tala fou o soifuaga o le Korama a Apose-tolo i le prophets.Lds.org, i lalo o le ulutala “Meet today’s prophets and apostles [Feiloai i perofeta ma apose-tolo o aso nei].” Na maua tala o soifuaga o le Au Peresitene Sili i luga o le saite talu mai Oketopa 2011. O le a faaliliuina ia tala o soifuaga i gagana e tele i le faagasologa o le tausaga pe a maua ia punaoa. O le tele lava o faamatalaga na muai lolomiina i le *Liahona* i gagana eseese.

“O le iloaina o taimi na latou talavou ai, tausaga aoga, olaga faaleaiga, ma galuega ao le i valaauina i o latou tofi faaaposetolo o le a fesoasoani ia i tatou e iloa ai le aao o le Alii i o latou soifuaga ma o le a avea foi o se isi molimau o le auala na la valaauina ai ma faalatele ia alii ma tamaiti le taualoa e auuina atu i le malo,” o le faamatalaga lea a Elder Paul B. Pieper o le Fitugafulu. O le a aofia ai i tala o soifuaga ni faamatalaga ma ni tala o soifuaga o taitai taitasi, ae o le mea sili lava, o le a latou faaalua mai le auala na saunia ai i latou e le Alii e auuina atu. ■

O Tusigāmanatu Konafesi e Avatu Ai i Tagata Faitau se Vaaiga o Mea e Faamamafa mai i Konafesi

O le a fesoasoani i tagata faitau se vaega fou, ma masani ai o mekasini o le *Liahona* ma le *Ensign*—Tusigāmanatu Konafesi—e suesue ma faaoga ai ia aoga mai lauga lata mai nei na tuuina mai e perofeta ma apose-tolo soifua o aso nei.

Na amataina ia Ianuari 2012, o le a i ai le vaega i lomiga e valu i le tausaga atoa—ma e tasi le tusigāmanatu mo masina uma e ese mai i lomiga o Me, Iuni, Novema, ma Tesema. O lomiga o Me ma Novema o le a aofia ai lauga o le konafesi lava ia.


E faaopoopo atu i le faaafua ai o ootootoga pupuu, atatusi lanu, motugaafa mo suesuega, ma mau e

faatatau i ai, o Tusigāmanatu Konafesi o le a aofia ai ni gaoioiga faigofie. O le a aofia ai foi ni tala tagata o le ekalesia po o ni fesili o le talalelei na taliina i lauga o le konafesi.

E ui o nisi o mea o loo faailoa mai i Tusigāmanatu Konafesi ua mamauina e faamanatu ai i tagata faitau ia lauga na tuuina mai i le konafesi aogo lata mai, ae o isi mea o loo faaalua ai e saunia ai le au faitau mo le konafesi o loma.

O vaega taitasi o Tusigāmanatu Konafesi o le a tasi i le fa itulau le uumi ma o le a suitulaga i le vaega masani o Mea Laiti ma Faatauavaa i mekasini o le *Liahona* ma le *Ensign*. ■

O le a fesoasoani le vaega fou o le Tusigāmanatu Konafesi o le Liahona ma le Ensign i tagata faitau e manatua ai mea na faamamafa mai i le konafesi i masina pe a mavae le konafesi aogo.



Ua Feiloai Elder Nelson ma le Au Paia i Amerika Tutotonu

Saunia e Jose Peña

Sui Sooupu o le Liahona

Ia lanuani, ao i ai Elder Russell M. Nelson o le Korama a Aposetolo e Toasefululua i se tofiga mai le Au Peresitene Sili, sa ia malaga ai i Amerika Tutotonu e aoao ia taitai perisitua ma tagata o le ekalesia i le lotoifale.

El Salvador

O le Aso Toonai, aso 14 o Ianuari, sa feiloai ai Elder Nelson ma taitai perisitua mai El Salvador i totonu o se falelotu i le lotoa o le Malumalu o San Salvador El Salvador. Sa latou faatasi ai ma Elder L. Whitney Clayton o le Au Peresitene o Fitugafulu; Elder Enrique R. Falabella o le Fitugafulu, Peresitene o le Eria o Amerika Tutotonu; Elder Carlos Rivas, Fitugafulu Eria; Walter Ray Petersen, peresitene o le malumalu; ma David L. Glazier, peresitene o le Misiona a San Salvador El Salvador.

Sa aoaoina e Elder Nelson ia taitai i le auaunaga ma le taua o le aveai ma leoleo mamoe o Isaraelu. Sa ia faamamafa atu le suesue i tusitusiga paia ma le faaogaina o le Agaga Paia e aveai o se taiala tumau. Sa ia saunoa foi i faamanuiaga o le lomiga fou a le AAG o le Tusi Paia i le gagana Sipaniolo.

O le aso na sosoo ai, sa pulefaamalumalu ai Elder Nelson i le konafesi a le Siteki a La Libertad San Salvador El Salvador, ma sa latou faatasi ai ma lona faletua o, Wendy, ma Elder Rivas.

I lana saunoaga, sa tuuina atu ai e Elder Nelson se faamanuiaga faaaposetolo i luga o tagata ma taitai o El Salvador o e o la i le talalelei ma o loo faamaoni i a latou feagaiga.

Nicaragua

Ona oo lea i le aso 18 o Ianuari, 2012, sa feiloai ai Elder Nelson ma tagata o le au paia i Nicaragua, ma sa faatasi ai ma Elder Enrique R. Falabella ma Elder James B. Martino, o Fitugafulu uma i laua.

Sa ia uunaia le au paia ina ia faateleina le paia ma ia

faaauu pea ona galulue i o latou faamaumauga o talafaasolopito o aiga. “Ou te folafola atu ia te outou afai ua outou saunia, o le a faataunuaina e le Alii Lana vaega ina ia outou mauaina se malumalu,” o lana saunoaga lea.

E tatau ona faatupuina i totonu o i tatou lava ia uiga auau mama o le Faaola, na saunoa ai Elder Nelson, e amata lea i le alofa.

“E mafai ona tatou aoao ia alofa atu e ala i auaunaga,” na ia saunoa ai. “O le isi uiga auau mama o le gauai atu lea i sauniga: papatisoga ma le faamanatuga. E faatatau ia mea i le Faasatauroga o le Faaola.”


O isi mausa lelei na saunoa i ai Elder Nelson e ao i le au paia ona faatupuina, o le tatalo e pei ona tatalo le Faaola, ma ia maua le malamalama e ala i le suesueina o tusitusiga paia. “Faitau tusitusiga paia i lau fanau, atiina ae le fiafia i [tusitusiga paia], ma ou te faamautinoa atu ia te outou, o le a outou lagona le olioli ao outou faatatauina [mea na outou aoaoina] i o outou olaga,” o lana saunoaga lea.

O le mea mulimuli na saunoa ai Elder Nelson, “Atiina ae le tutumau; tumau e oo i le iuga. Na sili atu le mafatia o Iesu Keriso nai lo se isi lava tagata ma e lei toilalo foi. Sa la faalagolago i Lona Tama e oo i le iuga. Manatua lenei mea pe afai tou te feagai ma ni luitau o le olaga.”

I le faaiuga, sa faaali atu e Elder Nelson le agaga faafetai mo le faatuatua, tuuto, ma sefuluai ma taulaga a le au paia i Nicaragua, ma sa ia molimau atu e uiga i le Togiola.

“O le Toetu o lo tatou Alii ua faamautinoa mai ai ia i tatou ma tatalaina ai le faitoatoa i le ola e faavavau e ala i le faatuatua ma le salamo, pe afai tatou te tumau e oo i le iuga,” na ia saunoa mai ai.

Ina ia saili atili e uiga i taitai o le Ekalesia, a latou aoaoga, ma a latou galuega, asiasi i lenews.lds.org ma le prophets.lds.org. ■



Ao asiasi atu i le au paia i El Salvador ma Nicaragua, sa patipatia e Elder Russell M. Nelson i latou o e o la i le talalelei ma o loo faamaoni i a latou feagaiga.

Ua Fesoasoani Saite ua Faaleleia i Alii Talavou i le Faataunuaina o o Latou Tiute i le Atua

Ua toe faafou le uepisaite o le Tiute i le Atua (DutytoGod.Ids.org) ma ua avea nei ma se punaoa fesoootai i le initoneti lea e matua lelei lava e fesoasoani ai i alii talavou e fatu ai, siaki, ma sefe o latou alualu i luma i le polokalama o le Tiute i le Atua.

Ua mafai nei e tiakono, aoao, ma ositaulaga ona matamata i le tusi atoa o le *Faataunuaina o Lo'u Tiute i le Atua: Mo e Umia le Perisitua Arona* i luga o le initoneti i gagana e 50, ma o le saina i totonu e faa-aoga ai le latou Faitotoa a le AAG, e mafai ai ona latou fatuina ni faamatalaga i luga o tusi o talaaga e faamaumau ai lo latou alualu i luma i le polokalama. O loo aofia ai foi i lenei tamaitusi atoa o loo i luga o le initoneti ia gaoioiga uma e aoao ai ma sootaga i mau ma isi punaoa.

Faalauaitele le Saite a le Autalavou mo Musika Ofo Fua Mai

Ua faalauaitele le vaega o musika a le youth.Ids.org e ofo fua mai ai, musika ma pese e sii mai mai tagata pepese o ona po nei mai le vaega faasalalau ua mavae o le Faapitoa lava mo le Autalavou (FMA). O faaopoopoga na amataina ia Fepuari, ma o se aofaiga o pese e 30 o le a faaopoopo i le saosasoa o le tasi le pese i le vaiaso.

O loo maua le saite i le gagana Peretania, Potukale, ma le Sipioli, ma o loo faagasolo fuafuaga e saunia ai nisi pese i le gagana Potukale ma le Sipioli. O le taimi nei, e tasi le pese o loo i luga o le saite—Jenny Phillips's "Strong and Courageous"—ma o loo maua i le gagana Potukale ma le Sipioli. ■



ATA NA PEIINA E MICHELLE SÁ, MATAUPU TAU I LE VA I FAFO A LE ITU O AMAPÁ, MACAPÁ, PASILA

E toa 50 tagata volenitia o Mamona Lima Fesoasoani na galulue i le Aso Toonai, 21 Ianuari, 2012, e tapena mama, ma vele ese ia vao, ma toe faafou le a'oga faaitumalo o Maria Ivone de Menezes i Macapá, Pasila.

Ua Toe Faafou e Mamona Lima Fesoasoani le A'oga Faaitumalo i Macapá, Pasila

Pe a ma le 50 tagata volenitia o Mamona Lima Fesoasoani—e aofia ai tagata o le Ekalesia, a latou uo, ma faifeautalai o le Au Paia o Aso e Gata Ai—na potopoto faatasi i le Aso Toonai, 21 Ianuari, 2012, e fesoasoani e tapena mama, ma vele ese ia vao, po o i se isi foi itu o le toe faafou o Maria Ivone de Menezes, o se a'oga faaitumalo i Macapá, Pasila.

O le gaoioiga, na faamaopoopoina e taitai o le aoga ma faatulagaina e le faatonusili o mataupu tau i le va i fafo o le Itu o Amapá Macapá Pasila o, Kleber Sainz, ma na faailoa ma faasalalauina e nisi o le au faasalalau i le lotoifale. Na fesoasoani le faatonusili o le aoga o, Adelia Danin, i le galuega faatino. "Sa faafiafiaina i matou i le sao agalelei na tuuina mai [e le Ekalesia] ia i matou," na ia fai mai ai. "O le a le galo lava lea mea ia i matou."

Ua Lolomi le Tusi Fusitolu Fou i le Gagana Rusia

Ua maua nei i le gagana Rusia le tusi fusitolu fou o tusitusiga paia o loo aofia ai le Tusi a Mamona, le Mataupu Faavae ma Feagaiga, ma le Penina Tau Tele ua tuufaatasia i se tusi e tasi.

O loo maua le tusi fou mai faletusi autu a le Ekalesia i le lotoifale i le taimi lava lenei, mai le store.Ids.org, i luga o le initoneti i le scriptures.Ids.org, ma le polokalama o Potutusi feaveai a le Ekalesia. O lenei lomiga ua oo atu ai le aofai o gagana ua lolomiina ai le tusi fusitolu i le 44.

Ima ia faitau atili i nei tala ma isi tala, asiiasi ane i le news.Ids.org. ■

I le Gagana Na Talanoa Mai ai O Tatou Tina ia i Tatou

Ou te faafetaia le tusiga “I Gagana ma Tagata Uma” na saunia e Lia McClanahan i le *Liahona* o Oketopa 2011. Na faamanatu mai ai ia te au o se faamanuiaga taua le mafai ona suesue i afioga a le Atua i le gagana lava e tasi na talanoa mai ai o tatou tina ia i tatou. Na aumaia foi e lenei tusiga se avanoa ou te faasoa atu ai i sa’u uo mamae i Silovenia le talalelei ma lo’u fiafia i le Tusi a Mamona. Faafetai lava!

Alan Embree, Italia

Malosiaga i le ogatotonu o O’u Luitau

Sa ou mauaina i le ogatotonu o ou lu’itau, se malosiaga e ala i molimau, aafiaga, ma savali sa ou maua i le *Liahona*. O masina taitasi pe a matou maua le mekasini, ma te faitauina ma lou toalua le Savali a le Au Peresitene Sili mo le afiafi faaleaiga. Ma te fetufaai i o ma manatu faaalua ma mea ma te aoaoina. Ou te iloa e alofa le Tama Faalelagi ia te au. Na te taliina au tatalo. Ou te iloa o loo la faafofoga mai ia te au.

Martita de Hernandez, El Salvador

Faamolemole auina mai lou finagalo faaalua po o fautuaga i le liahona@ldschurch.org. E ono faapupuaina tala mo le uumi po o le manino. ■

O lenei lomiga e aofia ai tusiga ma gaoioiga e mafai ona faaaoaga mo afiafi faaleaiga. O nisi nei o faataitaiga.



“O le Anapogi e Faamalolosia ai i Tatou Faaleagaga ma Faaletino,”

itulau 10: Faitau le tusiga, ma fetufaai atu ia manatu o loo tusia i le itulau lona lua. Faailoa atu o le anapogi e aofia ai nisi mea e sili atu nai lo le le ‘ai—e tatau ona o faatasi ma le tatalo, tuuina atu o se molimau, ma taulaga anapogi. Atonu tou te fia fesili i tagata o le aiga pe na faapefea ona faamanuiaina i latou e ala i le anapogi. Mafaufau foi e faasoa atu le tala mai le Feagaiga Tuai o loo maua i le Eseta e 4.

“Gaoioi e Tusa ma Uunaiga,”

itulau 20: Faitau pe otooto mai ia faamatatalaga i autafa “O Faamoemoega e Valu o Faaaliga.” Ona faitau auauai lea o tala i le tusiga ma talanoa i le mafuaaga o le faaaliga i le tala. Uunai tagata o le aiga ina ia nofouta i lenei vaiaso i le taimi ma le

auala latou te lagonaina ai le Agaga. Atonu e te manao e toe tulitatao i le vaiaso a sau ina ia talanoaina ai mea sa latou aoaoina.

“O Fea O Le A Tau Atu I Ai A’u

Filifiliga?” itulau 56: Faitau pe otooto mai le tala; ona faitau lea o le upusii a Peresitene Boyd K. Packer. Faamanatu i tagata o le aiga e mafai ona latou filifili e sui, pe afai na latou faia ni mea sese.

“O Le Lesona a le Au Liki Laiti,”

itulau 68: Atonu e te manao e amata i le usuina o le pese “E Mafai Ona Faavavau Aiga” (*Tusipese a Tamaiti*, 98). Faitau faatasi o se aiga le tala. Aisea e taua ai mo i tatou le faaalua o le lagolagosua mo tagata o o tatou aiga? E mafai faapefea e lou aiga ona lagolagoina atili le tasi ma le isi? ■



Alofa ma le Malamalama i Afiafi Faaleaiga

Ina ua ou faatoa liliu mai ma a’o ou nofo i Kolomupia, sa valaaulia au e se aiga e sili ona faapitoa mai la’u uarota i le afiafi faaleaiga. O se taimi muamua lea ua ou auai ai i se afiafi faaleaiga, ma sa faateia au i le agaga o le alofa ma le faatuatua sa ou maua ai iina.

Ina ua potopoto faatasi tagata uma, sa faia le matou tatalo ona fetufaai lea e uiga i mea sa matou faia i le vaiaso ua tea. Ina ua uma ona matou talanoa, sa faia se matou gaoioiga.

Sa tape moli, ma sa matou tusia ni fuaitau i luga o pepa felanulanuai e foliga i ni natu. Ina ua uma, sa matou toe kiina moli ma faaali atu mea na matou tusia. O nisi e le i lelei, o nisi na leaga, ao isi e pei o a’u na faigata tele ona ou tusitusi; ou te manatu o au na sili atu ona leaga le tusitusi na i lo tagata uma. loe, sa matua manino mai lava le lesona: afai tatou te le mauaina le malamalama o le talalelei i o tatou olaga, o le a foliga pogisa mea uma, e le manino, ma faigata.

Na matua ootia au i lenei lesona. Ma o tausaga talu mai lena aso, ua ou taumafai e faamautinoa ua i ai i lo’u olaga se ala ua faatumulia i le malamalama o le talalelei aemaise lava ina ia avea au ma faataitaiga i la’u fanau. ■

Dina del Pilar Maestre, Kalefonia, ISA

O SE LEO O LE FAITITILI, O SE LEO O LE FILEMU

Saunia e Kristin Boyce

Sa na o ni nai vaiaso talu ona ou i ai i la'u misiona ae fafagu au i le vaeluapo e se pao gogolo. Sa amata mai i se mea mamao ae na faasolosolo leotele a o latalata mai. E le'i umi ae lue le ma fale atoa. Sa fai foi si vave o le uma o le pao, ma mouese atu le gogolo. O le mea na lelei ai, sa lapataia au e la'u soa o mafuie o ni mea e masani ona lulu. E ui ina sa foliga mai sa lelei lava mea uma, o lea sa ou toe fao ai ma toe moe loa.

O ni nai vaiaso talu ona tea le vaeluapo lea na ou ala ai, na ou faalogo ai i tagata o talanoa e uiga i se mafuie na lulu i se taimi na muamua atu o lena taeao. Sa ou faapea po o le se mea o faaletonu ia i latou, aua ou te le'i faalogoina pe lagonaina foi se mea. O le le mauttonu, sa ou fesili ai po o le a le taimi na tupu ai le "mafuie". O le iloaina sa ou faama-lositino pe taele foi i le taimi na ta'ua, sa ou le talitonu ai na tupu moni lava. O le mafuie muamua na ou ala ai, e maui lava la, afai na i ai se isi mafuie a o ou ala, semanu ou te iloaina.

Ae ua na o le mafuie muamua lenei o le tele o mafuie na faapea na lulu. Ou te le'i lagonaina lava na mafuie, o lea sa ou mafau-fau ai pe le iloa e tagata le mea e ta'u o le mafuie.

I le mavae ai o le valu masina o mea sa ou manatu o ni mafuie faafoliga, sa faaselemutu ai i le ogatotonu le fuaiupu a lo'u faiaoga o le Aoga Sa ma fai mai, "O [tou] lagona le mea lena? Sa lulu se mafuie." Sa lue ulu o tagata uma e ioeina—vagana foi

a'u. Sa ou le malamalama. Sa leai se galulu po o se gogolo. Sa le'i maluelue lo'u nofoa. Sa le'i pao ia puipui. Na faapefea la ona i ai se mafuie?

Ona ou taumafai lea e manatua le mea na ou lagonaina ina ua ta'ua e le faiaoga le mafuie. Sa na o si tamai niniva—pei lava sa na o lo'u faataamilo. Mata o se mafuie lena lagona itiiti?



E mafai faa-pefea ona lagona e isi ia mafuie ae sa ou le iloaina? O le tali na aoaoina ai au i ni mea e tele atu nai lo na o le suesuega o mafuie'e.

Ona o lo'u faiaoga, sa amata ai ona ou nofouta ma iloa o mafuie faafoliga sa mo'i lava. Sa ou iloaina ou te le'i lagonaina a o ou faama-lositino pe taele pe moe aua sa na o ni lulu laiti. Ae na faifai malie lava ona ou matuai nofouta i se lagona niniva po o se maluelue laitiiti, ma iloa ai o se faamaoniga o se mafuie.


I se taimi mulimuli ane i la'u misiona, sa maua ai sa'u soa o se faifeautalai fou. I se tasi aso a o ma aoao atu, sa fai mai se tamaitai, "E, o le mafuie," ma sa ou ioeina. Sa tilotilo mai la'u soa ia i maua e pei ma te valea. Ae sa ou faasinoina i

ai le lue malie o le moli tautau ma faamauti-noa atu ia te ia, o le aluga o le taimi, o le a ia lagona ai le feme'iai teisi o le laueleele.


Ou te faafetai lava i mea na aoao mai e mafuie ia te au e uiga i le iloaina o le Agaga. E i ai taimi e le mafai ai ona teena le Agaga, o se leo o le faititili e ati i o tatou loto. Ae o le tele lava o taimi, o le Agaga o se musumusu filemu, o se mafaufauga fou, o se uunaiga, o se lagona maaleale o se mea e tataua ona fai pe ta'u atu (tagai i le Helamana 5:30). Afai e na o le lulu malosi e mafai ona tatou matauina, o le a tatou misia le tele o uunaiga mananaia a le Agaga. Tatou te ono manaomia i nisi taimi ia isi tagata e faasino mai ia lagona o le Agaga ina ia mafai ona taulai atu o tatou mafaufau ma mataalia lelei ai o tatou manatu. A tatou faia, tatou te maua se lalolagi fou atoa o le mataala ma le ofoofogia. ■



Sa Sorama Matitiva



Alema ma faifeautalai



Sa Sorama

O Sa Sorama ma le Rameutoma
Alema 31–32; 35

O le tausaga lenei e tele lomiga o le *Liahona* o le a i ai se seti o faatusa o tagata o loo taua i mau o le Tusi a Mamona. Ina ia faamalō ma faigofie ona faaaoga, ooti ese faatusa ma faapipii pe faamau i ni pepa malo, pepa mamafa, tamai tagapepa, po o fasilaau mo galuega taulima. Ia teu seti taitasi i totonu o se teutusi po o se ato, faatasi ai ma faailoga e ta'u atu ai le mea e maua ai le mau o le tala e o faatasi ma faatusa.



“O le pule o le perisitua e oo mai e ala i le faauuina;” na tusia ai e Peresitene Boyd K. Packer, Peresitene o le Korama a Aposetolo e Toasefululua, “o le mana o le perisitua e oo mai e ala i le ola faamaoni ma le usiusitai i le faamamaluina o feagaiga. E faateleina i le faataitaia ma le faaaogaina ma le amiotonu o le perisitua.” Tagai i le “O Le Mamalu ma le Faatulagaga o le Perisitua,” itulau 28.